

Matiyu

Matiyu belen mere igin Yesu nin yitin kayyin

*Yesuyen megen nin asem yago
(Luk 3:23-38)*

¹ Gabe Yesu Kristuyen asem wen Abraham hitte mat wan wan Israel marte doyan al kurun Dewit hitte, irde yen hitte mat wan wanbe Yesu forok yirin goyen asande katinbe gahade:

² Be, Abraham urminbe Aisak. Aisak urminbe Yekop.

Munan Yekop urmin wenbe Yuda, itin wenyabe kulin yagoya.

³ Yuda urmin waranbe Peresya kulin Seraya. Irde ire itinya gote milinbe Tamar.

Peres urminbe Hesron. Hesron urminbe Ram.

⁴ Be, Ram urminbe Aminadap. Irkeb Aminadap urminbe Nason. Nason urminbe Salmon.

⁵ Salmon urminbe Boas. Boas milinbe Rahap. Bere gobe Yuda mar bere mon.

Boas urminbe Obet. Obet milinbe Rut. Bere gayen wor Yuda mar bere mon. Munan Obet urminbe Yesi.

⁶ Yesi urminbe Yuda marte doyan al kurun Dewit.

Dewit urminbe Solomon. Solomon milinbe Batseba. Bere gayen wor Yuda mar bere mon. Dewit belen un Uria mayke kamkeb tirin.

- 7 Solomon urmiᅇbe Rehoboam. Rehoboam urmiᅇbe Abia. Abia urmiᅇbe Asa.
- 8 Asa urmiᅇbe Yehosafat. Yehosafat urmiᅇbe Yehoram. Yehoram urmiᅇbe Usia.
- 9 Usia urmiᅇbe Yotam. Yotam urmiᅇbe Ahas. Ahas urmiᅇbe Hesehia.
- 10 Hesehia urmiᅇbe Manase. Manase urmiᅇbe Emon. Emon urmiᅇbe Yosaia.
- 11 Irkeb Yosaia urmiᅇbe Yehoiakinya kulin yagoya. Yehoiakinya kulin wenya hinhanyabe Babilon naᅇare niᅇ fuleᅇa mar belen waᅇ gasa yirde bul yirde meten marmiᅇ yirniᅇ yeᅇ Babilon yukamiᅇ.
- 12 Be, Babilon yukamiᅇ go mulgaᅇ heᅇ naᅇamde kwamiᅇ. Irdeb Yehoiakinbe urmiᅇ Sealtiel miᅇyaᅇ hiriᅇ. Sealtiel urmiᅇbe Serubabel.
- 13 Serubabel urmiᅇbe Abiut. Abiut urmiᅇbe Eliakim. Eliakim urmiᅇbe Aso.
- 14 Be, Aso urmiᅇbe Sadok. Sadok urmiᅇbe Akim. Akim urmiᅇbe Eliut.
- 15 Eliut urmiᅇbe Eleasa. Eleasa urmiᅇbe Matan. Matan urmiᅇbe Yekop.
- 16 Irkeb Yekop urmiᅇbe Yosep. Yosepbe Maria uᅇ. Maria biᅇde matbe Yesu Kristu* gogo forok yiriᅇ.
- 17 Niᅇgeᅇ Abraham hitte mat waᅇ waᅇ Dewit hitte hiriᅇ goyen asi basaᅇmiᅇ yagobe tumᅇaᅇ 14. Irde Dewit hitte mat waᅇ waᅇbe Babilon niᅇ mar

* **1:16:** Kristu gobe Hiburu mere matbe Mesaia. Gote miᅇbe alya bereya Al Kurun hitte Yumulgaᅇ teᅇ teᅇ Al.

belen gasa yirde Babilon yukamiñde goyenter wor asi basañmiñ yagobe 14 po. Irdeb gor mat wañ wañ Yesu Kristu kawañ hiriñde gor wor 14 po.

Maria belen Yesu kawañ kiryiñ

(Luk 2:1-7)

¹⁸ Be, Yesu Kristu kawañ hiriñ gobe gahade: miliñ Mariabe Yosep niñ tubul tenj untek yenj merem tiyamiñ gega, Mariabe Yosep goya tumñañ ma henya biñ yan hiriñ. Irkeb Yosep belen keneñ bebak tiyyiñ. Goyenpoga diriñ gobe Holi Spirityen tareñde Maria binde forok yiriñ goyen ma nurdeb kukuwamñeñ nuryiñ.

¹⁹ Gega Maria goyen tetek al Yosep gobe al huwak uliñde merem moñ geb, goyen keneñbe kawan po takira tike al budam nurkeb Maria go memya henj henj ge igiñ ma nurdeb bada henj daha mat kura balmiñ tubul timewoñ yenj nurde hinhin.

²⁰ Goyenbe goke dufay henj hikeyab Al Kurunyen miyon belen mitere forok yenjbe inyiñ. “Dewit asem Yosep, gebe Maria tenj tenj niñ al belen daha wet kura gineñ gineñ niñ kafura henj bada ma hawayiñ. Diriñ binde hi gobe Holi Spirityen tareñde forok yiyuñ. ²¹ Niñgeb binde hi gobe diriñ al diriñ kawañ kiryen. Yenj belen gab alya bereyamiñ mata buluñ tenj hañ bana mat yumulgañ tiyyen. Niñgeb denembe ‘Yesu’† inayiñ,” inyiñ.

²² Be, mata kurun gabe Doyañ Al Kurun belen mere basañ almiñ momoñ irke basañ henj tagalyiñ goyen gogo forok yiriñ. ²³ Mere tiyyiñ gobe

† **1:21:** Dene gote miñbe “Dumulgañ tenj tenj Al”.

gahade: “Bere fonen kura alya ma kuñ hitin belen bin henbe dirin al dirin kura kawan kiryen. Irkeb ‘Immanuel’ innayin,” inyin. Immanuel gote minbe ‘Al Kurunbe nenya hite’.

²⁴ Be, Yosep go mite tiyyinde mat huwardeb Al Kurunyen miyon belen sanin po mere iryin gwahade po Maria goyen ten yaminde kurin. ²⁵ Goyenbe yenya ma ferde hinaryum. Kuñ kuñbe Maria gobe dirin al dirin kawan kiryin. Irkeb Yosep belen “Yesu” inyin.

2

Nanja yenen bebak ten ten mar Yesu kinnin yen wayamin

¹ Be, Yesube Herot Yudia nanare nin doyan al kurun hinhinya Yudia nanã bana gon nin taun dirnen kura Betlehem gor kawan hirin. Be, dirin go kawan hirin kamereb nanã wan wan belen nin mar kura Yerusalem taunde wayamin. Mel gobe dinambe yenenbe kame da mata kura forok yiyyen goyen bebak ten hanyen mar. ² Be, mel go wanbe gusunã hamin. “Yudia nanare nin doyan al kurun hiyyen al gayamuñ ga forok yiyun gobe dare hi? Nanã wan wan belen mat dinambemin kenenbe dolon irnin yen gago wayhet,” yamin.

³ Be, Herot go mere goyen nurdeb, “Dirin gore kame kurun hen asogo nirde gasunne tiyyen,” yenbe kafura hirin. Yerusalem taunde hinhan mar wor budam wor po mere go nurdeb dirin goke ten kanduk bulun kura forok yiyyen yen kafura hamin. ⁴ Irkeb Herot belen Al Kurun dolon ird ird mata doyan marte karkuwanjabe

Moseyen saba tagal tagal marya hoy yirdeb, “Mesaiabe damde kawañ hiyyeñ?” yineñ gusunañ yiryiñ. ⁵ Irkeb wol henbe, “Yudia nañare niñ taun Betlehem gor kawañ hiyyeñ. Al Kurunyen mere basañ al kura belenbe gahade kayyiñ:

⁶ ‘Be, deñ Betlehem niñ mar,
 deñ hitte al kura forok yeñ nere alya bereya
 Israel mar gote doyañ al kurun hiyyeñ.
 Irkeb deñtiñ dirneñ goyen kurun hiyyeñ.
 Niñgeb deñbe Yudia naña bana goñ niñ al deñem
 yañ mar gote folek,’ yitiñ hi. *Maika 5:2*
 Niñgeb Mesaiabe Betlehem forok yiyiyeñ,” in-
 amiñ.

⁷ Irkeb Herot belen dirin gobe daha naña kawañ hiriñ goyen bebak tiye yeñbe naña wañ wañ belen niñ al karwo dinambe yeneñ bebak teñ teñ mar goyen balminde hoy yirdeb, “Daha naña wor po dinambe goyen forok yiyuñ?” yinkeb gwaha naña kintiñ ineñ momoñ iramiñ. ⁸ Irkeb Herot belen usi yirdeb, “Betlehem kunañ. Kuñbe dirin goke kenkela po nanñennayiñ. Keneñbe arañ po wañ momoñ nirnayiñ. Irkeb ne wor kuñbe dolon ireñ,” yinyiñ.

⁹ Be, mel gobe Herot belen gwaha yinkeb Betlehem kuniñ yeñ kwamiñ. Irkeb dinambe naña wañ wañ belen kenamiñ goyen naña kota meheñ heñ kuñbe dirin hinhin ya turte gor bada hiriñ. ¹⁰ Dinambe gore gwaha tike keneñbe mel go amaneñ nuramiñ. ¹¹ Irdeb ya bana hurkun dirinya miliña goyen yeneñbe dokolhoñ yuguluñ teñ dirin goyen dolon iramiñ. Irdeb det kura dirin go unniñ yeñ yawayamiñ goyen hol yirdeb

unamin. Gol horaya det kura toropa yara kake hamin ten hiyen gwahade goyabe guram hamnen igin wor po yawayamin goyen unamin. ¹² Be, Al Kurunyen miyon belen mitere, “Mulgan hen Herot hitte ma kunayin,” yinen hayhay yiriyin. Irkeb belen hoyan mat nanam kwamin.

Yosep belen Yesuya milin Mariaya yade Isip kurin

¹³ Mel go kukeb Al Kurunyen miyon belen mitere Yosep hitte forok yenbe, “Herot belen dirin gayen maymeke kami yen nankenen tiya. Ningeb huwarde dirinya milinya gayen yade busaharde Isip nanare kun gon hinayin. Irdeb ne po doyan nirde hinayin. Mulgan hena dinmeke gab mulgan henayin,” inyin. ¹⁴ Be, Yosep go bin bak yeke huwardeb wawun goyen po ire milinya go yadeb busaharde Isip nanare kwamin. ¹⁵⁻¹⁸ Irkeb Herot gobe doyan hemanbe nana wan wan belen nin mar gobe usi niran yen nurdeb bin ar wor po yirin. Irkeb Betlehemya tiyun muknen binyan bana gon nin al dirin dirnen damam irawa mat bam belen gobe tumnan gasa yirke kamnan yen fulen marmin hulyan yiriyin. Gobe nana wan wan belen nin mar belen hanƙapya wor po nanamde dinambe kenaminde gor mat gagasiya damaya kapyan henbe gogo, “Dirinbe damam irawa mat bam belenbe gasa yirnayin,” yinyin. Go tiyyin gobe bikken Al Kurunyen mere basan al Yeremaia belen yirin goyen forok yirin. Mereminbe gahade:

“Al belen al kura Rama taunde bin misin katen esen obam ten epte ma ten hike nuramin.

Esej gobe Resel belen dirnen wen kamde pasi hamin goke esen hinhin.

Ningeb al kura belen yolna irke bada hetek mon,” yitin hi. *Yeremaia 31:15*

Be, Yosepya dirinmininya go kun Isip hike hikeb Herot go kamyin. Irke gab mulgan hamin. Go tiyamin gobe Doyan Al Kurun belen, “Urnebe Isip nana tubul ten wan wan nin hoy irmin,”* yirin goyen mere basan almin Hosea mere irke basan hen tagalyin goyen gogo forok yirin.

Yosepya dirinmininyabe Israel nanare mulgan hamin

¹⁹ Be, kame Herot go kamkeb Doyan Al Kurunyen miyon belen Yosep Isip hinhinya goyen mitere forok yenbe, ²⁰ “Yosep, dirin ga maynin yen hinhan marbe kaman. Ningeb huwarde ire milinya yade Israel nanare mulgan henayin,” inyin. ²¹ Irkeb huwarde ire milinya goyen yade mulgan hen Israel kwamin. ²² Goyenbe al kura belen, “Akelaus belen naninde gasun ten Yuda nanare nin doyan al kurun Herot† hiyun,” yeke nurdeb kafura hen gor kutek ma iryin. Irkeb sopte po mitere Al Kurunyen miyon belen, “Galili nanare kunayin,” inkeb Galili kwamin. ²³ Kunbe taun kura Nasaret inen hanjyende gor keperamin. Gobe bikken Al Kurun belen, “Nasaret nin al inen hinayin,” yirin goyen mere basan marmin mere yirkeb basan hen tagalamin gwahade goyen po forok yirin.

* **2:15-18:** Hosea 11:1 † **2:22:** Herot gobe Israel doyan irde hinhan doyan mar karkuwan gote denje.

3

*Yon Baptais belen mere tagalde hinhin
(Mak 1:1-8; Luk 3:1-18; Yon 1:19-28)*

¹ Be, dama budam kukeb al kura Yon Baptais inen hinhan goyen Yudia nanare sawsawa po kurun nanana bana gon wanbe saba tagal tagal min uryin. ² Saba ten hinhin gobe gahade: “Al Kurun belen alya bereyamin doyan yirtek nalube bikken binde hihi. Ningeb yen yufuk bana hitek yen nurde han kenem mata bulunin yubul ten yen ge bitin mulgan henayin,” yinen hinhin. ³ Meten goyen ten hinhin al Yon Baptais goke bikken Al Kurunyen mere basan al Aisaia belen gaha yirin: “Sawsawa po kurun nanana bana gon al kura forok yenbe alya bereya belen Doyan Al Kurunyen mere nurde gama ird ird nin du-fay gitik ten ten ge gahade kuware tagalde hiyen:

‘Doyan Al Kurunyen belen kerna.

Belenmin sope irde huwa irnan,’ yen hiyen,”
yen kayyin. *Aisaia 40:3*

⁴ Be, al gote ulinhorbe dapna kamel wuynen belen irtin goyen hor irdeb dapna sikken gore po kanmin irde ulinhor goyen mal temdere giti irde hiyen. Irdeb bin geminbe gusuya yalanqu fiminya po nene hiyen. ⁵ Irkeb Yudia nanana bana gon nin taun kurun Yerusalemnya nanana bana gon nin taun hoyan hoyanyabe Yodan fe sinana bana gon nin marya kurun goyen Yon hitte kunbe ⁶ mata bulunin ge Al Kurun pohogay irkeb Yon belen Yodan fe bana baptais yirde hinhin.

⁷ Be, Yuda marte tikula sañiñ po gama irde hanjen Farisi marya Sadusi marya budam Yon belej al baptais yirde hinhide gor wake yenenbe, “Deñbe mata buluñ po teñ hañ gega, mali baptais tiniñ yeñ wayhañ? Deñ gab dufaytiñ buluñ wor po kunere dirñeñ weñ yara. Goyenbe mali baptais tetek gab Al Kurunjen bearar ma kentek yeñ nurde hañ? Ganuñ belej gwaha dinuñ? Epte ma wor po busaharnayiñ geb!

⁸ Niñgeb Al Kurunjen bearar bana ma hitek yeñ nurde hañ kenem mata buluñtiñ yubul teñ yeñ ge bitin mulgañ hañ gote igineñ Al Kurun diliñde mata igin huwak goyen po teñ hinayiñ. ⁹ Irde dindiken ge yeñ, ‘Neñbe Abraham dirñeñ weñ,’ ma yeñ hinayiñ. Al Kurunbe igin hora gayen yade Abrahamyen dirñeñ weñ yiryen geb, mata buluñtiñ ma yubul tinayiñbe meretiñ gobe miñ miñmoñ wor po hiyyen. ¹⁰ Be, saporbe bikken he miñde kerd kerd niñ ep irtin hi yara Al Kurun belej mata buluñtiñ gote murun gem duntek binde wor po hi. Niñgeb he kura igineñ ma heñ hiyen gobe ilde kak alare temeynayiñ go gwahade goyen po, deñ gayen mata buluñtiñ yubul ma tinayiñbe Al Kurun belej dakira teñ kak alare dimiyyen.

¹¹ “Nebe mata buluñtiñ yubul teñ Al Kurun niñ bitin mulgañ hekeb fe ulin po baptais dirde hime. Goyenbe harhokner al kura wayyen. Al gote tareñbe kurun wor po. Yeñbe al turun yañ wor po geb, ne gahade gare epte ma yeñ ge teñ meten kurun titek hime. Kahañ basanmin teñ kuñ kuñ gobe meten kurun moñ gega, goyen

wor epte moŋ yeŋ nurde hime. Yeŋ beleş gab Holi Spiritya kakya beleş baptais diryeŋ. ¹² Irde yeŋbe al kura wit igineŋ yawareŋ yeŋ kutummiŋ tukun igineŋya sikkenya pota yirde igineŋbe goyen yerd yerd ya bana yerde sikkenbe yade kunga tiyyeŋ go gwahade goyen diryeŋ. Niŋgeb al kame wayyeŋ goreb meremiŋ ma gama irde hinayiŋ marbe kak hugineŋ hitekde gor yimiyyeŋ,” yinyiŋ.

*Yon Baptais beleş Yesu baptais iryiŋ
(Mak 1:9-11; Luk 3:21-22)*

¹³ Goyarebe Yesu gob Yon beleş baptais niri yeŋbe Galili naŋare mat Yodan fete kuriŋ. ¹⁴ Wake keneŋbe Yon beleş pet teŋbe, “Ge beleş gab ne baptais nirtek gega, daniŋ bul mat, ‘Yeŋ beleş baptais niri,’ yeŋ ne hitte wayha?” inyiŋ. ¹⁵ Irkeb Yesu beleş wol heŋbe, “Mekerke haŋkabe ne nurhem gwahade nira. Gogab Al Kurunyen dufay huwak wor po goyen tumŋaŋ deyya beleş kawan forok iryeŋ. Gwaha tiyeŋ gab igiŋ yeŋ nurde hime,” inyiŋ. Irkeb Yon beleş fe alare tukun baptais iryiŋ.

¹⁶ Be, Yesu go baptais teŋbe fe tubul teŋ siŋare wayyiŋ. Wakeb goyare goyen po naŋkiŋ hol yiriŋ. Hol yekeb Holi Spiritbe Yesu hitte nu foy teŋ kattineŋ teŋ yeŋ hende keperke yingeŋ kinyiŋ. ¹⁷ Irkeb al melak kura naŋkiŋde mat, “Al gabe urne bubulkunne wor po. Yeŋ ge amanen wor po nurde hime,” yiriŋ.

4

Ungura belen Yesu tunan uryin (Mak 1:12-13; Luk 4:1-13)

¹ Be, baptais tirin go kamereb Ungura Satan belen tunan uri yenbe Holi Spirit belen bul irde sawsawa po kurun nana bana gon tukurin. ² Be, nan kahalya wawunya 40 gayen binje kutnare hinhin. Ningeb go kamereb binje bulun wor po iryin. ³ Irkeb tunan urtek al belen wanbe, “Ge gayen Al Kurun Urmin kenebe hora ga yinke beret hena,” inyin. ⁴ Gwaha inkeb Yesu belen wol henbe, “Al Kurunyen asande, ‘Albe Al Kurun belen mere titin kurun goyen nurde sanin hen hanen. Munan binje hende po ma hanen,’ gwahade katin hi,” inyin.

⁵ Go kamereb Ungura belen Yesu go Yerusalem Al Kurunyen taun inen hanende gor tukunbe Al Kurunyen ya balem kurun goyen hende hoyan wor pore kura gor tukuke huwaryin. ⁶ Irkeb sopte po inyin. “Al Kurunyen asandebe gahade katin hi:

‘Al Kurun belen ge nin ten miyonmin hulyan yirke
wan haninde ganarkeb solok yawayin
goyen

hora unken belen mun kura kahanje umu-
law ma uryen,’ yitin hi.

Tikin

91:11-12

Ningeb ge gayen fudinde Al Kurun Urmin kenebe solok yawa,” inyin. ⁷ Irkeb wol henbe, “Goyen goke wor, ‘Al Kurunge tunan ma urayin. Yenbe Doyan Al Kurun geb,’ yen asande katin hi,” inyin.

⁸ Be, kura goya po tunan ure yenbe Yesu goyen dugu kurunde kura gor tukunbe megen nin doyan mar karkuwan belen nana doyan yirde han goya tarenmin turnun yana kurun goyen tumnan ikala iryin. ⁹ Ikala irdeb, “Dokolhonje yugulun ten dolon nirke gab det kurun yenha gayen yubul ten gunen,” inyin. ¹⁰ Gwaha inkeb wol henbe, “Satan, hoyan kwa! Asandebe, ‘Al Kurun po ga Doyan Al Kurunge geb yende yufukde po henbe yen po dolon irde hayin,’ yitin hi gobe ma nurde ha?” inyin. ¹¹ Gwaha inkeb Ungura go tubul ten kurin. Irkeb Al Kurunyen miyon belen wan Yesu faran uramin.

*Yesu belen Galili nanare metenmin min uryin
(Mak 1:14-15; Luk 4:14-15)*

¹² Be, kamebe Yesu go Yon Baptais ten fere ten koyare keramin mere momon goyen nurdeb mulgan hen Galili nanare kurin. ¹³ Kun Nasaret tiyunde hinhin. Mun kura hitnen tenbe Kapeneam taunde kurkun gor hinhin. Kapeneam taun gobe Galili fe ala kurun goyen sinare Sebulunya Naptaliyat megenje hinhin. ¹⁴ Be, Yesu go Kapeneam kurkurin gobe Al Kurun belen mere basan almin Aisaia momon irke basan hen tagalyin goyen fudinde wor po forok yirin. Merebe gahade:

¹⁵ “Sebulun megenya Naptali megenyabe Galili makañde kurkun kurkun belen kurunde har.
Yenbe Yodan fe sinan kurhan har. Megen gabe Galili nana bana har.

Gonbe Yuda mar mon al min hoyan manan gon hanj.

¹⁶ Go mar gobe Al Kurun ma nurde unen mata bulun bana po hen kidoma bana hitnen ten hanjen goyen hulsi kurun kura kennayin.

Al kidoma bana hen kamtin yara hanjen gobe hulsi goyen forok yeke gote uren bana hinayin,” yitin hi. *Aisaia 9:1-2*

¹⁷ Be, Yesu go Kapeneam henyabe saba tagal tagal metenmin min uryin. Sabaminbe gahade: “Al Kurun belen alya bereyamin doyan yirtek nalube binde hihi. Ningeb yen yufuk bana hitek yen nurde han kenem mata buluntin yubul ten yen ge bitin mulgan henayin,” yen hinhin.

Komatmin kura hoy yiriyin
(*Mak 1:16-20; Luk 5:1-11*)

¹⁸ Be, Galili makan ferenyan goyen kun henyabe Saimon denem kurabe Pitaya kulin Andruya makede kaman temeyde hike yinyin. Ire itinya gobe makan dapna yad yad mar. ¹⁹ Kun yenenbe yinyin. “Wayyi. Wan gama niryi. Irkeb al yade Al Kurun hitte yukun yukun mar diren,” yinyin. ²⁰ Gwaha yinkeb goyare po kamanmin yago yubul ten Yesu gama iraryum.

²¹ Mun kura kutnen tenbe ire itinya hoyan Yemsa Yonyabe nanin Sebediya hakware hen kamanmin sope yirde hike ²² yenenbe hoy yiriyin. Irkeb ire itinya gore wor nanin Sebedi goyen hakware gor po tubul tenbe Yesu gama iraryum.

Garbam mar sope yiriyin
(*Luk 6:17-19*)

²³ Be, Yesu go Galili naṅa bana goyen kuṅbe Yuda marte gabu yayan saba teṅ Al Kurun belen alya bereyamin doyan yird yird mere igin goke tagaldeb alya bereya garbammin kurayen kurayen manan goyen guram yirke igin heṅ hinhan. ²⁴ Irkeb yeṅ mata tiyyin goyen Siria naṅare nin mar wor nurtin ala tiyamin. Irdeb garbam kurayen kurayen goyen yukuteke sope yiri yeṅ Yesu hitte yawayamin. Alya bereya ulin misin kurun minyan, unguram yan, bu toneṅ minyan, tonan kukuwa minyan yabe ulin kamtin ya goyen yad wayamin. Irkeb tumnan guram yirde sope yiriyin. ²⁵ Be, Galili naṅa, Dekapolis* naṅa, Yudia naṅa, Yodan fe sin a bana gon nin marya Yerusalem taun kurunde gor nin marya budam wan Yesu gama iramin.

5

Aman heṅ hinayin (Luk 6:20-23)

¹ Be, Yesu belen al buda kurun go yenenbe dondonende hurkun kipiriyin. Komatmin yago wor yeṅ hinhide gor hurkamin. ² Irkeb sabamin min uryin. Sabaminbe gahade:

³ “Be, al kura nindikenbe epte mon yeṅ Al Kurun nin po nurde hinayin mar gobe Al Kurun belen alya bereyamin doyan yirde hi bana gon hinayin.

Nin geb goke amanen nurde hinayin.

* **4:25:** Dekapolis gote minbe “10 taun han.”

4 “Al Kura mata bulunminj ge kandukneñ wor po nurde hañ marbe Al Kurun belen binj yurum yiryen.

Ninǵeb goke amanenñ nurde hinayinñ.

5 “Al kura neñ harhet harhet ma teñ hañ marbe kame Al Kurun belen megenñ kurunñ gayen yunke yende hiyyen.

Ninǵeb goke amanenñ nurde hinayinñ.

6 “Al kura Al Kurunñ dilingde mata huwak teñ teñ ninñ feya binǵeya ninñ kamtinenñ teñ hañ marbe Al Kurunñ belenñ mata huwak goyen yunenñ hiyen.

Ninǵeb goke amanenñ nurde hinayinñ.

7 “Al kura al hoyanñ ninñ buninenñ nurde yunenñ hañ mar gobe Al Kurunñ wor buninenñ nurde yunenñ hiyen.

Ninǵeb goke amanenñ nurde hinayinñ.

8 “Al kura binde dufay bulunñ ma kerde hañ marbe Al Kurunñ keneñ hinayinñ.

Ninǵeb goke amanenñ nurde hinayinñ.

9 “Al kura fulenaya kandukya yisikamde awalikde heñ heñ mata forok irde hañ marbe Al Kurunñ belenñ dirinñe weñ yinyenñ.

Ninǵeb goke amanenñ nurde hinayinñ.

10 “Al kura Al Kurunñ dilingde mata huwak teñ hike al hoyanñ belenñ bulunñ bulunñ yirke kanduk kurayen kurayen yenenñ hañ marbe Al Kurunñ belenñ alya bereyaminñ doyanñ yirde hi bana goñ hinayinñ.

Ninǵeb goke amanenñ nurde hinayinñ.

11 “Be, ne gama nirde hike al belenñ goke iginñ ma nurde sukal dirde bulunñ bulunñ dirde mere bulunñ

kurayen kurayen ulitiŋde irde hinayiŋ. Goyenbe goke ma nurde aman heŋ hinayiŋ. ¹² Kanduk teŋ hinayiŋ gote muruŋgembe Al Kurun beleŋ kurun dunyeŋ. Niŋgeb goke amanen nurde hinayiŋ. Mata gobe tiŋen moŋ. Bikken Al Kurunyen mere basan mar yirde hinhan gwahade goyen po, den wor gwaha dirde hinayiŋ,” yinyiŋ.

Hulsiya fawya

(Mak 9:50; Luk 14:34-35)

¹³ Irdeb sopte po yinyiŋ. “Denbe al haŋ kurun gate faw yara. Fawbe meten miŋyaŋ. Goyenbe daha wet kura teŋ bulun hiyyenbe daha mat sopte igiŋ irtek? Epte moŋ. Niŋgeb faw bulun hitiŋ gobe wok irtek. Irkeb al beleŋ ufurka teŋ kuŋ hinayiŋ.

¹⁴ “Irde denbe al megen haŋ kurun gate hulsi yara. Taun kurun kura dondonde hi gobe epte ma banare hiyeŋ. ¹⁵ Gwahade goyen po al kura epte ma hulsi usuŋ urde teŋ koron po aw uryeŋ. Gwahade yarab teŋ hende biŋguŋ irkeb al ya biŋ bana hinayiŋ goyen tumnaŋ hulsire hinayiŋ. ¹⁶ Gwahade goyen po denbe hulsi yara heŋ Al Kurun diliŋde mata wukken goyen al yikala yirde hinayiŋ. Gogab matatiŋ igiŋ goyen yenenbe Al Kurun saŋiŋ miŋyaŋ goyen isoka irde hinayiŋ.

Al Kurunyen mere saŋiŋ ire yeŋ wamiriŋ

¹⁷ “Be, moŋgo ne gayen nenenbe dufaytiŋdeb, ‘Yeŋ beleŋbe Moseyen sabaya Al Kurunyen mere basan marte sabaya goyen walde pasi hewe yeŋ wayyiŋ,’ yeŋ ma nurnayiŋ. Nebe saba goyen wale yeŋ ma wamiriŋ. Gwaha titnenbe mere

gote miɲ wor po goyen teɲ kawan irmeke nurnan yeɲ wamiriɲ. ¹⁸ Fudinde wor po dinesi hime. Megenya nanƙinya hiriryen goya goyen sabamiɲ gote mere bilmiɲ katiɲ goyen unƙuren muɲ kura bana ma kuyeɲ. Heɲ heɲbe sabamiɲ gote iginen tumɲan forok yenayiɲ. ¹⁹ Niɲgeb al kura sabamiɲ kura gama irtek metenɲen moɲ wor po goyen pel irde go ma gama irdeb al hoyan wor go goya gama irde ma inyeɲ al gobe Al Kurun beɲen alya bereyamiɲ doyan yird yird bana goɲ deɲem moɲ hiyyeɲ. Munan al kura sabamiɲ gama irde al hoyan saba yiryen al gobe Al Kurun beɲen alya bereyamiɲ doyan yird yird bana goɲ deɲem kurun wor po hiyyeɲ. ²⁰ Fudinde wor po dinesi hime. Deɲ mata huwak teɲ hinayiɲ goyen Farisi marya Moseyen saba maryat mata huwak goyen fole ma irnayeɲbe fudinde wor po epte ma Al Kurun beɲen alya bereyamiɲ doyan yirde hi bana goɲ hurkunayiɲ.

Kanduk sope ird ird mata

²¹ “Be, bikkenbe Moseyen sabareb taytin yagobe, ‘Al ma gasa yirke kamnayeɲ. Munan al kura gwaha tiyyenbe merere huwarde murungem bulun tiyyeɲ,’ yintiɲ goyen deɲbe nurde hanɲen gogo. ²² Goyenpoga nebe go hende gaha dinesi tihim: al kura kadom inen tiyyeɲ al gobe merere huwaryeɲ. Gwahade goyen po, al kura kadom, ‘Dufaygem moɲ,’ inyeɲ wor merem yan heɲ Yuda marte doyan mar diliɲde huwaryeɲ. Irde al kura beɲen kadom kura, ‘Gebe kukuwa,’ inyeɲbe kak alare kuyeɲ.

²³ “Niŋgeb Al Kurun galak ire yeŋ altare gor det yukun henjab kadge kura beŋ bulun nurd guntin goyen bege bak yeke²⁴ detge go alta dilin mar gor po yubul teŋ kun kadge goya kanduk go sope irde awalik heŋ gab mulgan heŋ Al Kurun galak irayin.

²⁵ “Be, al kura merem yan girde merere gukun hikeyab aran po kanduktirin go belen kun henya sope iriryen. Mongo kun merere huwarkeb mere nurd nurd al beŋ gade kimyan titmin haniŋde giryen. Irkeb kimyan titmin beŋ gade fere girde koyare gernayin geb. ²⁶ Fudinde wor po dinen hime. Kat sinare kwen yenbe hora gwahade kerayin gintin goyen tumnan po kerde pasi irde gab sinare kwayin geb,” yinyin.

Al berem yanbe huwak po hinayin

²⁷ Irde sopte yinyin. “Be, mere kurabe gahade yeŋ hike nurde hanjen: ‘Al berem yanbe bere hoyan ma duwan yirde hinayin. Irde bere wor al hoyan ma duwan yirde hinayin,’ yitin. ²⁸ Goyenpoga nebe go hende gaha dinen tihim: al kura bere kura kenen gwaha irmewon yeŋ bin huwaryen gobe bikken bere hoyanya duwan teŋ teŋ mata bulun goyen binde tiyyen. ²⁹⁻³⁰ Mongo ulge kurhan kura beŋ mata bulun tike ulge tumnan kak alare kwak geb, bulun tiyyen go po teŋ sina irayin. Delge yase beŋ mata bulun tikeb goyen marde temeyayin. Hange yase beŋ mata bulun tikeb go wor walde temeyayin.

Bere takira teŋ teŋ mata

(Matiyu 19:9; Mak 10:11-12; Luk 16:18)

³¹ “Be, denbe ‘Al kura berem takira tiye yenbe takira ten ten asan kan haniinde kerdebe takira tiyyen,’ gwaha yen hike nurde hanjen. ³² Goyenpoga nebe go hende gaha dinen tihim: al kura berem go al hoyan ma duwan irde hikeya epte ma takira tiyyen. Takira tike bere go kun al hoyan tiyyenbe bere goya un gergen goya Al Kurun diliinde leplep mata ten har yen yinyen. Goyenbe Al Kurun belen un bikkek gore yirke tahar yen un bikkek go minge iryen.” yinyin.

Biya ten ten mata

³³ Be, Yesu go sopte gaha yinyin: “Bikken Mo-seyen sabarebe taytin yago, ‘Biya ten henya usi ma ten hinayin. Al Kurun hitte biya tenbe biya tiyayin goyen po gama irayin,’ yintin goyen den wor nurde hanjen gogo. ³⁴⁻³⁵ Goyenpoga nebe go hende gaha dinen tihim: nanjinbe Al Kurunyen maroro gasun. Irde megenbe yende kahan kerd kerd gasun. Irde Yerusalemben Doyan Al Kurun gote taun. Ningeb biya tinin yen goya det goyen goya den ma yurnayin. ³⁶ Tonantin yuwalhen unkenen kura goyen tarentinde epte ma umnam hoyan irnayin. Ningeb biya tenya tonantin ma den urnayin. ³⁷ Huginen mere fudinde po yen hinayin. Ningeb mere kura fudinde kenem, ‘Fudinde,’ yenayin. Munan fudinde mon kenenbe ‘Fudinde mon,’ po yenayin. Go hende mere kura sopte tinayinbe mere gobe Al Bulun hitte mat wayyen.

Wol hen hen mata (Luk 6:29-30)

³⁸ “Be, mere kurabe gahade yeŋ hike nurde hanyen: ‘Al kura belen delge upul tikeb ge belen wor wol heŋ diliŋ upul tiyayiŋ. Irde misiŋge yufele tikeb ge belen wor wol heŋ misiŋ yufele tiyayiŋ,’ yitiŋ. ³⁹ Goyenpoga nebe go hende gaha dinenŋ tihim: al kura buluŋ dirke goya matamiŋ go wol ma hawayiŋ. Al kura waŋ uluŋge yase belen seŋ gurke goya wol ma heŋ kurhan wor tigiri teŋ unayiŋ. ⁴⁰ Irde al kura uliŋhorge goke po teŋ merere gerenŋ tikeb buninenŋ irde meŋe dibage manaŋ unayiŋ. ⁴¹ Irde al kura parsay girde, ‘Kandukne teŋ 1 kilomita kwa,’ ginkeb faraŋ ure yeŋ nurde kandukmiŋ teŋ tebaŋ 1 kilomita kwayiŋ. ⁴² Irdeb al kura det kuraŋ amu heŋ gusuŋaŋ girkeb mali po teŋ unayiŋ. Munanŋ al kura waŋ detge kura belnenŋ tewe ginkeya ga basaŋa ma irayiŋ.

Asogo

(Luk 6:27-28,32-36)

⁴³ “Be, mere kurabe gahade yeŋ hike nurde hanyen gogo: ‘Kadtiŋ yago niŋ amaŋenŋ nurd yunenŋ hinayiŋ. Irde asogotiŋbe buluŋ buluŋ yirde hinayiŋ,’ yitiŋ. ⁴⁴⁻⁴⁵ Goyenpoga nebe go hende gaha dinenŋ tihim: Al Kurunbe al iginya bulunya tumŋaŋde naŋaya kigariŋya yunenŋ hiyen. Niŋgeb asogotiŋ ge amaŋenŋ nurde yunenŋ hinayiŋ. Irde buluŋ buluŋ dirde hinayiŋ mar gobe Al Kurun belen faraŋ yuri yeŋ Al Kurun gusuŋaŋ irde hinayiŋ. Gogabe denbe Al Kurun tareŋmiŋ kurun wor po gote dirnenŋ wenŋ igiŋ hinayiŋ. ⁴⁶ Be, al kura den ge amaŋenŋ nurde dunenŋ hinayiŋ mar goke po amaŋenŋ nurnayiŋbe Al Kurun belen gote

murungem dunyeŋ yeŋ nurde haŋ? Moŋ. Teks yad yad marbe mata buluŋ mar yineŋ haŋyen goyen wor kadom ge amaneŋ nurde igiŋ igiŋ yirde haŋyen. ⁴⁷ Yuda mar moŋ al miŋ hoyan wor kadom mere gird teŋ igiŋ igiŋ yirde haŋyen. Niŋgeb kadiŋ yago po mere yirde igiŋ igiŋ yirde hinayiŋbe matatiŋbe mel gote folek yeŋ nurde haŋ? Moŋ. ⁴⁸ Nantiŋ Al Kurun tarenŋ miŋyanŋ gobe huwak wor po geb, deŋ dirneŋ weŋ wor gwahade go po huwak hinayiŋ,” yinyiŋ.

6

Al faranŋ yurd yurd mata

¹ Be, Yesu beleŋ sopte gaha yinyiŋ: “Be, Al Kurunŋ diliŋde mata igiŋ teŋ hiniŋ yeŋbe keŋkela dufay heŋ ga mata teŋ hinayiŋ. Al denke po ga mata teŋ hiniŋ ma yeŋ hinayiŋ. Gwaha tinayiŋbe Adotiŋ Al Kurunŋ saŋiŋ miŋyanŋ gore matatiŋ gote murungem ma dunyeŋ. ² Usi marbe al beleŋ denenŋ turunŋ dirnanŋ yeŋbe al bunineŋ faranŋ yurniŋ yeŋ gabu yayanŋ, kurabe beleŋyanŋ huwarde bigul fu irde ga mata teŋ haŋyen. Goyenbe deŋ goya gwaha ma teŋ hinayiŋ. Fudinde wor po dineŋ hime. Matamiŋ gote murungembe al beleŋ turunŋ yirde hinayiŋ goya go po tenayiŋ. Kamebe hubu wor po geb. ³ Niŋgeb al bunineŋ kura faranŋ yurniŋ yeŋbe balmiŋ po mata teŋ hinayiŋ. Hantiŋ yase beleŋ mata igiŋ kura tike goya hantiŋ tapa beleŋ go ma nuryeŋ. ⁴ Gwahade goyen po al bunineŋ faranŋ yurniŋ yeŋbe al ma denenŋ hikeya faranŋ yurde hinayiŋ. Irkeb Nantiŋ Al Kurunŋ tarenŋ miŋyanŋ

gore al faran yurd yurd mata banare ten hinayin gote murungem dunyen.

*Al Kurun mere ird ird mata
(Luk 11:2-4)*

⁵ “Be, usi marbe Al Kurun mere irnin yenbe al denen turun dirnan yen gabu yayan, kurabe belen kogorhonyan al budam kun wan ten hanjende gor huwarde Al Kurun mere irde hanjen. Goyenbe den goya gwaha ma ten hinayin. Fudinde dinen hime. Matamin gote murungembe al belen turun yirde hinayin goyare gog po tenayin. Kamebe hubu wor po. ⁶ Nijgeb Al Kurun mere irnin yenbe yatij bana hurkun yame tanbe Nantij Al Kurun banare hi goyen mere irde hinayin. Gogab Nantij belen banare hen balmin mata ten hinayin goyen denenbe gote murungem dunyen.

⁷ “Yuda mar mon al min hoyan belen unguramin dolon yirde henya mereninin nurnayin yen mere sobamde po yen teban ten hanjen. Goyenbe denbe Al Kurun mere irnin yen goya gwaha ma ten hinayin. ⁸ Adotij Al Kurunbe den belen gusunjan ma irkeya bikken det goke nurde han yen nurde hi. Nijgeb mel go ten han gwaha ma ten hinayin. ⁹ Nijgeb Al Kurun mere irnin yenbe gaha yen hinayin:

Adoninin, gebe kurun wor po.

Huginen turun girde hitek.

¹⁰ Gere alya bereya doyan yird yird mata goyen kawan forok irayin.

Irdeb dufayger meten ten gote iginen ge hayende gor igin wor po forok yirde hayen gwahade goyen po,

megen gayen wor forok yirde hayin.

¹¹ Irdeb han kayen bin ge be gwaha mat nene ep nenayin yen be gwahade po dunen hayin.

¹² Irdeb al hoyan belen bulun dirke mata bulunmin halde yunen hityen gwahade goyen po,

mata bulun ninin halde dunen hayin.

¹³ Irdeb dubul tike tunan bulun bana ma kattek.

Irde Al Bulun hani de mat dumulgan tiyayin.

¹⁴ Nin geb al kura bulun dirke mata bulunmin goyen halde yunnayin. Gogab Adotin tarenmin kurun gore wor mata bulun tin halde dunyen.

¹⁵ Munan al kura bulun dirke halde ma yunnayin gobe Adotin tarenmin kurun gore wor mata bulun tin go ma halde dunyen.

Bin ge kutna ird ird mata

¹⁶ “Be, usi marbe bin ge kutna irde hen yabe kimin algup neke tupi sam tikeb al belen yenen mel gabe gwaha ten han yen dennan yen nurde mata ten han yen. Goyen be den goya gwaha ma ten hinayin. Matamin gote murungembe al belen turun yirde hinayin goya po tenayin. Kamebe hubu wor po. ¹⁷ Nin geb bin ge kutna irde hen yabe fe gemde tonan tin par ten kutn are hite yara ma ten kun hinayin. ¹⁸ Gogab bin ge kutn are hinayin goyen al belen gwaha ten han yen ma denen hinayin. Goyen be Adotin banare hi gobe nurde hiyen. Nin geb mata balmin de ten hinayin goyen gote murungem dunyen.

Megen niŋ samuŋ
(Luk 12:33-34)

¹⁹ “Be, megen niŋ samuŋbe sisige belenŋ wal-nayiŋ, kurab kawe mar belenŋ kawe dirnayiŋ. Irde kurabe tiktuk irde buluŋ henayiŋ. Niŋgeb dindikenŋ ge nurde samuŋ yade buda ma yirde hinayiŋ. ²⁰ Gwahade yarabe samuŋtiŋ goyen yade al faranŋ yurde hinayiŋ. Irkeb Al Kurunŋ belenŋ gote muruŋgem igiŋ wor po goyen kame dunenŋ yeŋbe gasuŋmiŋde yerde hiyenŋ. Gobe det kura belenŋ epte ma buluŋ yirnayiŋ. ²¹ Dufaytiŋ kurunŋbe samuŋtiŋ hiyenŋde gor po hiyenŋ geb, gago momoŋ dirde hime.

²² “Be, diltiŋbe ultiŋde hulsi yara. Niŋgeb diltiŋ igiŋ hinayiŋbe hulsire haŋ yara Al Kurunŋyen samuŋ banare hi goyen kenenŋ keŋkela bebak teŋ hinayiŋ geb, heŋ heŋtiŋ igiŋ wor po hiyyenŋ. ²³ Munanŋ diltiŋ buluŋbe samuŋmiŋ epte ma kenenŋ bebak teŋ megen niŋ samuŋ niŋ po nurde hinayiŋ geb, heŋ heŋtiŋ gobe kidoma belenŋ po aw duryenŋ. Niŋgeb Al Kurunŋyen samuŋ banare hi goyen kenenŋ bebak titek yarabe bebak ma tinayiŋbe heŋ heŋtiŋbe buluŋ wor po hiyyenŋ. ²⁴ Albe epte ma wawuŋ uŋkurenŋde po doyanŋ al irawa niŋ metenŋ teŋ yunyenŋ. Epte moŋ wor po. Gwaha titŋenŋbe doyanŋ al kurabe harhok unyenŋ. Munanŋ kurabe amanenŋ nurd unenŋ keŋkela awalik irde hiyenŋ. Niŋgeb gwahade goyen po, epte ma Al Kurunya horaya tumŋanŋde metenŋ teŋ yunnayiŋ.

Heŋ heŋge niŋ ug po ma dufay hawayiŋ
(Luk 12:22-31)

25 “Niṅgeb fudinde dinenṅ hime. Megen gar henya daha mat binṅgeya feya netek, irde ulniniṅdebe da yade umṅa teṅ hitek yeṅbe heṅ heṅtiṅ ge uguṅ po ma dufay heṅ hinayiṅ. Binṅgebe igiṅ gega, gore po epte ma heṅ heṅtiṅ igiṅ iryen. Ultiṅ umṅa manaṅ gwahade po ultiṅ igiṅ ma iryen. 26 Be, nu niṅ nurnaṅ. Yeṅbe binṅge ma harde hanṅyen. Irde sak yeke yade binṅge yadi yerd yerd yare ma yerde hanṅyen. Goyenbe Al Kurunṅ belenṅ paka yirde hiyen. Al Kurunṅ saṅiṅ miṅyanṅ belenṅ nu wor gogo keṅkela po doyanṅ yirde hiyen. Munaṅ deṅbe nu gote folek wor po geb, dahadem Al Kurunṅ belenṅ denenṅ wasak tike binṅge kamnayiṅ? Epte moṅ geb. 27 Deṅ gayen kura megen gar heṅ heṅ niṅ uguṅ po dufay henayiṅbe igiṅ nalutiṅ goyen muṅ kura siṅgir irde ulyanṅde hinayiṅ? Epte moṅ.

28 “Irde daniṅ geb ultiṅ umṅa niṅ uguṅ po dufay heṅ hanṅyen? Yamunṅ fuwalabe yenenṅmiṅ igiṅ muṅ wor po goke nurnaṅ. Yeṅbe uliṅ umṅa niṅ metenṅ ma teṅ uliṅhor kura ma gada yirde hanṅyen. 29 Goyenbe fudinde wor po dinenṅ hime. Bikkenṅ Israelyen doyanṅ al kurunṅ Solomonbe uliṅ umṅa kusamuṅ wor po yerde hinhin. Goyenpoga uliṅ umṅamiṅ igiṅ wor po gore yamuṅ fuwala goyen epte ma fole yirtek hinhan. 30 Yamunṅ fugala gobe nalu sobamde ma hanṅyen. Haṅka hinayiṅ, gisebe al belenṅ walde kakde yemeyde hanṅyen. Be, gwahade goyen po, yamuṅ fugala gobe det kurunṅ kura gogo moṅ gega, Al Kurunṅ belenṅ doyanṅ yirde umṅa yirde hiyen geb, deṅbe daniṅ ulniniṅ umṅa ma gitik teṅ dunyenṅ yeṅ goke uguṅ po dufay

hej hañ? Deñbe Al Kurunj niñ hekkenj wor po ma nurde hañ. ³¹ Niñgeb da binje netek, da fe netek, irde da yade ulniniñ umña titek yeñ goke dufay ugunj po ma hej hinayiñ. ³² Megen niñ mar ne niñ ma nurde hañ gore gab det budam kurunj gwahade goyen yad yad niñ ugunj po dufay hej goke kandukñen nurde hanjen. Goyenbe Adotin Al Kurunj sañin minyanj gobe det goke nurde hañ yeñ bikkenj denen hiyen. ³³ Niñgeb deñbe Al Kurunj beñen doyanj dird dirnya mata huwak ten tenya niñ wa nurde hinayiñ. Irke gab Al Kurunj beñen deñ det kuranj nurde hinayiñ kurunj goyen wor dunen hiyen. ³⁴ Niñgeb sopte fay urkeb daha titek yeñ goke dufay ugunj po ma hej hinayiñ. Fay urke gab gwaha kura tiye yeñ nurnayiñ. Hanj kayen kandukbe hanj kayen po, munan giseyenbe giseyen po geb,” yinyiñ.

7

Kadtiñde mata goke bulun mat ma yawayin (Luk 6:37-38,41-42)

¹⁻² Be, Yesu go sopte gaha yinyiñ: “Al kura kadam mata tike kenenbe, ‘Nebe igin, munan yenbe bulun ten hi,’ yiyyenbe al go wor Al Kurunj beñen gwaha po iryen. Al kadtiñ kurate mata daha mat kennayiñbe Al Kurunj wor gwaha mat dinyen. Niñgeb al kadtiñ beñen mata kura tike goya deñ beñen, ‘Neñbe huwak,’ yeñ nurde, ‘Al gobe daniñ bulun tiya?’ ma yeñ hinayiñ. Monjo Al Kurunj beñen deñ wor gwaha po diryen geb. ³ Deñbe kadtiñde mata bulun mukñen mun wor po mukunj yara goyen yenen goke yeñ hañ.

Goyenbe dindikenđe mata bulunbe he parwek karkuwan yara diltiņ pet teņ haņ goyen go ma po nurde haņ. ⁴ He parwek gore hugiņeņ diltiņ pet titiņ haņ goyen ma yeneņya dahade niņgeb, ‘Kadne, mukuņ delger hi go teņ siņa ire?’ in-nayiņ? ⁵ Duliņ usi mar wor wor, meheņdeb dindikenđe diltiņde niņ he parwek go wa yade siņa yir-nayiņ. Irde gab diltiņ keņkela naņkeneņbe kadtıņ diliņde mukuņ goyen igiņ yad siņa yir-nayiņ.

⁶ “Be, deņbe det kura Al Kurun untek goyen yade kulu ma yuneņ haņyen. Irde selweņ yara det damum hende hoyaņ goyen yade bu binde ma yemeyde haņyen. Gwaha yirkeb samuņ igiņ kura gogo yeņ ma nurde mali yufurka tinayiņ. Niņgeb gwahade goyen po, al kura Al Kurunyen merebe titmiņeņ miņ miņmoņ yeņ nurde haņ mar gobe Al Kurunyen det mali mali ma yuneņ hinayiņ. Moņgo mel gore tigiri teņ buya kuluya belen diseņ sak dirtiņeņ dir-nayiņ geb,” yinyiņ.

*Al Kurun gusunan ird ird niņ bada ma henayiņ
(Luk 11:9-13)*

⁷⁻⁸ Irdeb sopte po gaha yinyiņ: “Be, al kura belen det kuran nurde Al Kurun gusunan irkeb unyeņ. Irde det kuran naņkeneņ kurut yekeb ikala iryeņ. Irde yeņ belen alya bereyamiņ doyaņ yirde hi bana goņ hurkuņ hurkuņ yame goyen mayde tebaņ irkeb yame hol ird unyeņ. Niņgeb deņ wor det kura niņ nurde Al Kurun gusunan irtiņde po hikeb dunyeņ. Det goke naņkeneņ kurut yitiņde po hikeb dikala diryeņ. Irde yeņ belen alya bereyamiņ doyaņ yirde hi bana goņ

hurkun hurkun yame mayde teban irkeb yame hol ird dunyen.

⁹ “Be, den gayen al ganunbe dirinmin belen binje nin yekeb hora ten unyen? ¹⁰ Irde makan dapna nin yekeb kunere ten unyen? ¹¹ Den mata bulun mar wor dirintin yago belen det kuran yekeb det igin po yunnin yen nurde hanyen. Ningeb Adotin Al Kurun sanin minyan gobe den megen nin mar gote folek geb, gusunan irkeb det igin wor po goyen dunyen geb.

¹² “Gwahade ningeb mata ten hinayin kurun gobe al hoyan belen nen gwaha gwaha dirde hiwon yen nurde han gwahade goyen po, den wor gwahade po yirde hinayin. Moseya Al Kurunyen mere basan marya belen saba ten hinhan gote min wor pobe gago geb.

Yame dirnen bana hurkunayin

(Luk 13:24)

¹³⁻¹⁴ “Be, kak alare kun kun yamebe kurun, irde gor kun kun belenbe metenen mon. Ningeb al budam yame goyen bana hurkun han. Munan Al Kurunya hugin hen hen gasunde gor kun kun yamebe dirnen mun wor po. Irde belen manan metenen. Ningeb al yunkuren yunkuren belen mun po gab yame goyen kenen bebak ten han. Ningeb denbe yame dirnen bana gore hurkunayin.

Heya he gote iginenya

¹⁵ “Be, Al Kurunyen mere basan mar falkuk nin kenkela hen hinan ko. Go mar gobe dapna fulenam mon sipsip yara hen wanayin. Mereminbe igin yara gega, bin bana dufayminbe

buluŋ wor po geb, kulu duwi beleŋ al isitiŋ yara heŋ heŋtiŋ buluŋ wor po irnayiŋ. ¹⁶ Gwahade mar gobe matamiŋde po gabe fudinde Al Kurunyen mere basaŋ mar ma usi mar wet goyen yeneŋ bebak teŋ hinayiŋ. Al beleŋ wain igineŋbe kaŋ hoyan hende ma yade hanyen. Fik he igineŋ wor he mali hende ma yade hanyen. ¹⁷ Gwahade goyen po, he igiŋbe igineŋ igiŋ po forok yirde hiyen. Munan he buluŋbe igineŋ buluŋ po forok yirde hiyen. ¹⁸ Niŋgeb he igiŋbe igineŋ buluŋ ma forok yiryen. Munan he buluŋbe igineŋ igiŋ ma po forok yiryen. ¹⁹ Niŋgeb he kura igineŋ igiŋ ma forok yiryen gobe ilde kak alare temeynayiŋ. ²⁰ Niŋgeb gwahade goyen po, matamiŋ beleŋ gab mel gobe gwahade mar yeŋ yeneŋ bebak tinayiŋ.

²¹ “Be, alya bereya megen henya, ‘Doyan Al Kurun, Doyan Al Kurun,’ ninen han gega, al yunƙuren beleŋ po Al Kurunyen alya bereya henayiŋ. Adone Al Kurun saŋiŋ minyan gote duƒay goyen keŋkela nurde go po gama irde han mar po gab Al Kurunyen alya bereya henayiŋ. ²² Nalu funanƒe goyenterbe al budam beleŋ, ‘Doyan Al Kurun, Doyan Al Kurun, neŋbe saŋinger merege basaŋ heŋ tagalde hinhet. Irde tareŋger unƒura yakira teŋ mata tiŋen kurayen kurayen yirde hinhet. Niŋgeb neŋbe gere alya bereya,’ ninnayiŋ. ²³ Goyenbe ne beleŋ kawan po, ‘Mata buluŋ mar, nebe go ma wor po nurd duneŋ hime. Hoyan kunan!’ yinen.

*Al irawayen ya ird ird mata
(Luk 6:47-49)*

24 “Be, gwahade niṅgeb al kura merene nurde gama iryen al gobe ya ire yenbe tola metemin dukun po talde hora po dalun unyen go gwahade goyen. 25 Kigarin kurun katen figilu tenen yan kuyen. Irde mene sanin yare gor kuyen gega, tolambe sanin po yimiytin geb, epte ma tobo tike katyen. 26 Goyenbe al kura merene nurde ga gama ma iryen al gobe al kukuwa kura mulowo hende ya iryen go gwahade goyen. 27 Niṅgeb kigarin kurun katen figilu tenen yan kuyen, irde mene sanin yare gor kukeb tolambe mulowo hende yimiytin geb, ya gobe katen bulun wor po hiyyen,” yinyin.

28-29 Be, Yesu go sabamin pasi irkeb gor hihan mar gore meremin go tonnen yan wor po nuramin. Irdeb hurkunƙat tenbe, “Ey, sabamin gabe Moseyen saba marte saba yara mon be!” yamin.

8

Al busuka minyan sope iryin (Mak 1:40-45; Luk 5:12-16)

1 Be, sabamin go pasi irdeb dugure gor mat katen kun hikeb al budam gama irde kun hihan. 2 Irkeb busuka minyan al kura gore wan kimin mar dokolhon yugulun tenbe, “Doyan Al Kurun, dufayger wilaknen nurdeb sope nirke igin hewen,” inyin. 3 Irkeb al go ulinde hanin kerdeb, “Igin guram giren. Niṅgeb igin hawa!” inyin. Irkeb goyare po busuka go tubul tike igin hirin. 4 Irkeb, “Igin haha gake al kura momon irak yo. Gwaha titnenbe Al Kurun dolon ird ird

mata doyaŋ mar hitte kuŋ sikkenge yikala yirke keneŋbe fudinde igiŋ haha ginnayiŋ. Irke gab Mose beleŋ bikkeŋ yiriŋ mata goyen gama irde dapŋa kura mel go yunnayiŋ. Irkeb ge niŋ teŋ Al Kuruŋ niŋ dapŋa go kumga tinayiŋ. Irkeb al tumŋaŋ fudinde igiŋ hihi yeŋ gennayiŋ,” inyiŋ.

*Fuleŋa marte doyaŋ alyen dufaymiŋ tareŋ
(Luk 7:1-10)*

⁵ Be, gwaha teŋbe Yesu go Kapeneam taunde kuriŋ. Irkeb Roma gabmanyen fuleŋa marte doyaŋ al* kura gore faraŋ nuri yeŋ wayyiŋ. ⁶ Irdeb, “Doyaŋ Al Kuruŋ, metenŋ alne kura uliŋ kamke uliŋ misiŋ kuruŋ wor po kateŋ yare ferde hi,” inyiŋ. ⁷ Irkeb Yesu beleŋ, “Kuŋ sope ireŋ,” inyiŋ. ⁸ Irkeb al gore wol heŋbe, “Doyaŋ Al Kuruŋ, ge beleŋ ne al gahade gate yare kutek moŋ. Niŋgeb duliŋ mere po tikeb metenŋ alne igiŋ hiyyeŋ. ⁹ Ne wor doyaŋ alner yufukde heŋ yende mere po gama irde himyen. Irde ne wor fuleŋa mar kura doyaŋ yirde hime geb, al goyen kura, ‘Kwa,’ inmekeb kuyeŋ. Munanŋ kurabe, ‘Waya,’ inmekeb wayyeŋ. Irde metenŋ alne mananŋ, ‘Det ga ira,’ inmekeb gwaha po tiyyeŋ,” inyiŋ. ¹⁰ Irkeb Yesu beleŋ al gote mere go nurde tulfut yiriŋ. Irdeb gama irde kuŋ hinhan mar goyen fulgan kaŋbe, “Fudinde wor po dinhem. Israel bana ga ne niŋ dufaymiŋ saŋiŋ irtiŋ al kura gahade ma keneŋ himyen. Hubu wor po. ¹¹ Ga nurnanŋ ko. Kame kame Al Kuruŋ beleŋ alya bereyamiŋ doyaŋ yirde hi bana goŋ dula mata kuruŋ forok

* **8:5:** Fuleŋa marte doyaŋ al gabe fuleŋa mar 100 doyaŋ yirde hiyen.

yiyyeñ. Goyenterbe Yuda mar moñ al miñ hoyañ beleş megeñ kurun ga hike kwa gayen kurhan mat mat wañbe Yuda marte asem yago Abraham, Aisakya Yekopya irde gasuñmiñyan gasuñmiñyan keperde dulañ teñ hinayiñ. ¹² Goyenbe Yuda marbe Al Kurun beleş basaña yirtiñ gega, ne niñ dufaymiñ sañiñ ma irnayiñ mar gobe yakira tike siñare kidoma bana goñ hinayiñ. Irde esenbe misin yişen hinayiñ,” yiniñ. ¹³ Irdeb fulenā marte doyañ al goyen, “Iginge kwa. Ne niñ dufayge sañiñ irde ha geb, gwahade forok yewoñ yeñ nurha gwahade po forok yiyyeñ,” iniñ. Irkeb meteñ almiñbe Yesu beleş mere tiyyiñ nalu goyenter po igiñ hiriñ.

*Yesu beleş al budam sope yiryiñ
(Mak 1:29-34; Luk 4:38-41)*

¹⁴ Be, Yesu go Pitayen yare kuñbe Pita teñak aygañ miñyan ferde hike kinyiñ. ¹⁵ Irde kuñ haniñde tanarkeb aygañ go tubul tiyyiñ. Irkeb bere gore huwarde biñge kañ yuniñ.

¹⁶ Be, kuñ hako ga kidoma heñ hikeb unğura ketal yurtiñ mar budam yawayamiñ. Irkeb Yesu beleş unğura go merere po yakira tiyyiñ. Irde al garbam miñyan manañ tumñande sope yirke igiñ hamiñ. ¹⁷ Gwaha teñ hinhin goke bikkeñ Al Kurunyen mere basañ al Aisaia beleş asañde mere kura gahade kayyiñ:

“Al gobe nende mata bulunya garbamniniñya pasi yiryen,” yitiñ hi. *Aisaia 53:4*
Niñgeb mere gote iginenbe mata gogo forok yirde hinhin.

*Yesu gama irninbe det kura yubul tinayin
(Luk 9:57-62)*

¹⁸ Be, Yesu gob al budam waɗ gabu irke yenenbe komatminɗ yago goyen, “Fe ala kurunɗ ga siɗa ironɗ mat kuninɗ,” yinyinɗ. ¹⁹ Irkeb Moseyen saba tagal tagal al kura gore waɗbe, “Tisa, nebe ge kunɗ heɗ taha kurunɗ gobe gama po girde kunɗ heɗ,” inyinɗ. ²⁰ Irkeb wol heɗ, “Kulu duwibe ferd ferd gasunɗ minyanɗ. Nu wor hagam yanɗ. Goyenpoga ne Al Urminɗ† gabe gor kura ferde usanɗ hetek gasunɗnem monɗ,” inyinɗ. ²¹ Irkeb komatminɗ hoyanɗ kura goreb, “Doyanɗ Al Kurunɗ, nebe gama girenɗ gega, kunɗ adone wa tenɗ mete tenɗ gab waɗ gama girenɗ,” inyinɗ. ²² Irkeb Yesu belenɗ, “Waɗ gama nira! Al kamtinɗ gobe tubul tike al ne ninɗ ma nurde Al Kurunɗ dilingɗde kamtinɗ yara hanɗ mar gore gab tenɗ mete tinayinɗ geb,” inyinɗ.

*Yesu belenɗ meɗe kurunɗ masi irke tik yirinɗ
(Mak 4:35-41; Luk 8:22-25)*

²³ Be, gwaha tenɗbe hakwa kura go hende hurkurinɗ. Irkeb komatminɗ yago wor go hende hurkunɗbe yenya kwaminɗ. ²⁴ Irke gwahade forok yewenɗ tiya yenɗ ma nurkeya bemel po meɗe kurunɗ huwaryinɗ. Irkeb duba karkuwanɗ karkuwanɗ fumde waɗ hakwa mayde binɗde hurkunɗ ala heɗ hinhinɗ. Goya goyenbe Yesube firтинɗde hinhinɗ. ²⁵ Irkeb komatminɗ belenɗ kunɗ isanɗ heɗbe, “Doyanɗ Al Kurunɗ, fe nene kamninɗ tihit geb, faranɗ dura!” inaminɗ. ²⁶ Irkeb huwarde, “Daninɗ geb ne ninɗ

† **8:20:** Al Urminɗ gote minɗbe alya bereya Al Kurunɗ hitte Yumulganɗ tenɗ tenɗ Al. Daniel 7:13 gorbe denɗem Al Urminɗ goyen hi.

hekken ma nurde kafura hen han?" yinyin. Irdeb meneya makanya bulun wor po hirin goyen masi yirke kamaryum. ²⁷ Irkeb mel go hurkunƙat tenbe, "Da albe gago? Meneya makanya wor yende mere nurhar!" yen kadam gusunƙan gird tiyamin.

Gadara marte nanare kurin
(*Mak 5:1-20; Luk 8:26-39*)

²⁸ Be, meƙe kamke mel go kun kunbe Galili fe ala sinƙa kurhan Gadara marte nanare forok yamin. Irkeb al irawa kura unƙura ketal yurtin bembayan hen kun haryen gore Yesu hitte waryum. Al irawa gobe misinen yan wor po geb, albe yen haryenyan gor kutek mon. ²⁹ Be, irem gore Yesu hitte wanbe, "Al Kurun Urmin, daha diren wayha? Nalu hako hikeya bulun dire yen wayha?" inen kwep iraryum. ³⁰ Be, goya goyenbe bu buda kurun kura sorte yarham po hen dulan ten hinhan. ³¹ Unƙura gore Yesu goyen esen mere irdeb, "Dakira tiye yen nurdeb dad derke kun bu buda iro ketal yurtek," inaryum. ³² Irkeb, "Kunan!" yinkeb unƙura buda go al irawa goyen yubul ten kun bu buda kurun go ketal yurkeb kun hamulare mat fe alare katen fe nene kamamin. ³³ Irkeb bu doyan yirde hinhan mar gobe busa-harde taunde kunbe al irawa unƙuram hanya bu budaya hitte mata forok yirin kurun goyen goke al momon yiramin. ³⁴ Irkeb al taunde nin gobe tumnan Yesu kinnin yen gir yen wayamin. Irde wan kenenbe, "Nananininde gar ma hayin. Dubul ten kwayin," inen esen mere iramin.

9

*Al uliŋ kamtiŋ sope iryiŋ
(Mak 2:1-12; Luk 5:17-26)*

¹ Be, gwaha irkeb Yesu go hakwa hende hurkuŋbe mulgaŋ heŋ metenŋ teŋ hiyen taunde Kapeneam kuriŋ. ² Irkeb al uliŋ kamtiŋ kura goyen sapir hende tawayamiŋ. Irkeb Yesu belenŋ mel gote dufaymiŋ yeŋ ge tareŋ irtiŋ go yenenbe al goyen, “Diriŋ, kandukneŋ ma nurayiŋ. Mata bulunŋe halhem geb,” inyiŋ. ³ Gwaha yekebe Moseyen saba mar kura belenŋ go nurdeb, “Ey, Al Kuruŋ belenŋ po ga alyen mata bulunŋ halde yunenŋ hiyen gega, al gare gwaha tihim yeŋ hi geb, al gabe Al Kuruŋ sukal irde hi,” yeŋ dufay hamiŋ. ⁴ Irkeb dufaymiŋ yenenŋ bebak teŋbe, “Daniŋ geb bitiŋde dufay bulunŋ kerde haŋ? ⁵ Damiŋbe meteneŋ yeŋ nurde haŋ? ‘Mata bulunŋe halde gunhem,’ yihim goyen ma ‘Huwarde kwa,’ yewenŋ goyen? ⁶ Dufaytiŋdebe al garbam sope ird ird gobe meteneŋ yeŋ nurde haŋ. Niŋgeb nebe denŋ belenŋ meteneŋ nurde haŋ goyen ireŋ tihim. Irmeke gab megen garbe ne Al Urmiŋ gabe alyen mata bulunŋ halde halde saŋiŋ miŋyaŋ yeŋ nenenŋ bebak tinayiŋ,” yinyiŋ. Irdeb al uliŋ kamtiŋ goyen, “Huwarde gasunŋe teŋ yager kwa,” inyiŋ. ⁷ Irkeb al go huwarde yamiŋde kuriŋ. ⁸ Irkeb al buda gor gabu iramiŋ goyen mata go kenenbe hurkuŋkat tiyamiŋ. Irdeb Al Kuruŋ belenŋ al guram yird yird tareŋ al yuntiŋ goke Al Kuruŋ turuŋ iramiŋ.

*Yesu belenŋ Matiyo hoy iryiŋ
(Mak 2:13-17; Luk 5:27-32)*

⁹ Be, gwaha tenj Yesu go gor mat hoyande kunj henyabe al kura denem Matiyo goyen teks yad yad gasunde hike kinyinj. Irdeb, “Wañ gama nira,” inyinj. Irkeb al gore huwarde Yesu gama iryinj.

¹⁰ Be, Yesuya komatminya Matiyuyen yare hen bingge nene hikeb teks yad yad marya* al kura Moseyen saba kenkela ma gama irde hike, “mata bulun mar” yinen hanjen mar goya wañ yenya hen dulan tenj hinhan. ¹¹ Irkeb Farisi mar belen go yenenbe Yesuyen Komatmin gusunjan yirdeb, “Daninj geb tisanjbe teks yad yad marya ‘mata bulun mar’ yinen hityen mar goya bingge nene hanj?” yinaminj. ¹² Irkeb mere go nurdeb Yesu belen, “Al ulinde iginj po hiyenbe guram al ninj ma nuryen. Al garbam minjan belen gab guram al ninj nuryen. ¹³ Nebe nenj al huwak yenj nurde hanj mar goyen hoy yire yenj ma wamirinj. Goyenpoga nenbe mata bulun mar yenj nurde hanj mar goyen hoy yire yenj wamirinj. Goke tenjbe Al Kurun belen, ‘Nebe al belen galak nird nird ninj ma nurde hime. Kadom buninenj gird gird mata goke amanenj nurde hime,’ yitinj goyen kunj minj gwahade yenj kenkela dufay henj nurnan ko,” yinyinj.

*Bingge kutja mata ninj Yesu gusunjan iraminj
(Mak 2:18-22; Luk 5:33-39)*

* **9:10:** Teks yad yad marbe Israel mar ninj ma meten tenj hinhan. Roma gabman ninj tenj teks yade hinhan. Irde teks hora kurabe yingen ge yade hinhan geb, mel goke Israel mar belen iginj ma nurde yunen hinhan.

14 Be, gwaha yinenbe gor hinhin. Irkeb Yon Baptaisyeen komatmin beley wanbe, “Nenya Farisi maryabe binje kutna irde hityen gega, dahade geb komatge wenbe gwaha ma ten han?” inen gusunan iramin. 15 Irkeb Yesu beley wol henbe, “Albe tikiñ mere min alya tumnan henyaabe daniñ esen hinayin? Epte mon. Goyenbe tikiñ mere min al goyen asogom beley wan ten kuke gab yen ge nurde binje kutna irde hinayin,” yinyin. 16 Irde yenbe saba gergen tagalde hi goyen goke maya mere mat gaha yinyin: “Al kura amil gergen walde ten ulinhor bikkek erek yitiñ goyen ma pet ten gada iryen. Gwaha irkeb amil parwek gergen gore ulinhor bikkekde nin kan goyen yulun tenbe erek yitiñ yamen gobe sopte bulun wor po iryen. 17 Gwahade goyen po, al wain fimiñ gergen yade dapna sikken po wain fimiñ hen hen irtiñ bikkek bana gon ma unnayin. Gwaha irnayinbe wain fimiñ gergen goreb dapna sikken bikkek go kunga tikeb erek niyyen. Irkeb wain fimiñ wok yiyyen. Dapna sikken go manan gog po bulun hiyyen. Albe gwaha ma ten hanyen. Wain fimiñ gergenbe wain fimiñ hen hen dapna sikken gergen bana po unen hanyen. Irkeb det irawakde bulun ma hiriryen,” yinyin.

Bere dirnen kamtinja bere kura danduku minyanya goyen sope yiryin

(Mak 5:21-43; Luk 8:40-56)

18 Be, Yesu go saba yirde hikeyab gor nin doyan al kura wan Yesu diliñ mar dokolhon yugulun tenbe, “Wernebe gayamun ga kama. Goyenbe kun hange ulinde kerkeb sopte huwaryen,” inyin.

19 Irkeb Yesu go huwarde al goya kwaryum. Komatmiñ yago wor gama irde kwamiñ.

20-21 Be, hako kuñ hikeyab bere kura dama 12 gayen danduku manañ hiyen gore dufaymiñde po, “Kuñ meñere niñ uliñhormiñ po sisan ureñbe igiñ hewen,” yeñ nurdeb kame belen mat wañbe Yesuyen meñe diba uliñhor goyen murunde sisan uryiñ. 22 Be, bere gore gwaha tikeb Yesu belen fulgan kañ kinyiñ. Irdeb, “Werne, kandukneñ ma nurayiñ. Dufayge ne niñ sañiñ irha gore sope girke igiñ haha geb,” inyiñ. Irkeb goya goyen po igiñ hiriñ.

23 Be, Yesu go kuñbe doyañ al wañ tupi ten kwaryum al gote yare forok yeñbe ya binde hurkuriñ. Hurkuñbe doloñde niñ buleluñ fuk yird yird marya esen marya gabu irde hinhan go yinyiñ. 24 Irdeb, “Bere gabe ma kama. Duliñ ferde hi. Niñgeb kat siñare kunañ!” yinyiñ. Irkeb mel goreb hinmañ fayken iramiñ. 25 Be, al buda go yakira tike megen kuñ pasi hamiñ. Irkeb Yesu po hurkuñ bere go haniñde tanarkeb kamiñde mat huwariñ. 26 Irkeb gote mere momoñmiñbe al naña bana go hinhan gobe nurde tukutiñ ala tiyamiñ.

Diliñ titmiñya mohon kattinya guram yiryiñ

27 Be, Yesu mel go yubul ten kuñ hikeb diliñ titmiñ al irawa belen kuware, “Dewit Urmiñ, bunineñ dirde farañ dura be,” inen gama iraryum. 28 Goyenbe Yesube nurd nurd yare hurkuriñ. Irkeb al irawa goyen manañ gama irde kukeb, “Der gayen epte sope diryen yeñ ne niñ dufaytiriñ sañiñ irde har?” yinen gusuñañ yiryiñ.

Irkeb, “Gwahabe, Doyan Al Kurun,” inaryum. ²⁹ Gwaha yekeb Yesu beley dilinyan sisan yurdeb, “Ne nin dufaytirin taren irhar geb, nurhar gwahade po forok yiyyen,” yinyin. ³⁰ Irkeb dilin wuk yeke nankenaryum. Irkeb, “Sope dirhem gake al kura ma po momon yiriryen,” yinen sanin po utan yiryin. ³¹ Gega irem go sinare kunbe Yesu beley sope yiryin goyen tagalde tukukeb al nana bana gon nin gobe nurde pasi hamin.

³² Be, Yesuya komatminya goyen sinare hen kun hikeb unguira ketal urke mohon kattin al kura goyen Yesu hitte tawayamin. ³³ Irkeb Yesu beley unguira go takira tikeb al mohon kattin goyen mere tiyyin. Irkeb al buda kurun gobe hurkunat tenbe, “Israel nana bana gan mata gwahade kura ma kenen hityen!” yamin. ³⁴ Goyenbe Farisi marbe, “Ungurayen kurunmin gote tarende unguira yakira ten hi,” yamin.

Al Kurunyen meten marbe budam mon

³⁵ Be, Yesu go taunyaanya tiyunyanya kurun goyen kunbe Yuda marte gabu yayan mere igin Al Kurun beley alya bereyamin doyan yird yird goke saba yirde hinhin. Irde al garbam min kurayen kurayen goyen sope yirde hike igin hen hinhan. ³⁶ Gwaha ten kun henya al buda go yinyin. Irdeb al buda gobe sipsip kura yewek minmon hen buninen buninen ten yingen gwaha mat kura sanin hetek mon yara yenenbe buninen wor po nurd yunyin. ³⁷ Irde komatmin yago siraw mere mat, “Bingebe sak yen ep han gega, binge goyen yad yad meten marbe budam mon. ³⁸ Ningen binge meten gote Doyan Al Kurun gusunan irkeb

meten̄ mar budam yad yerke meten̄min̄de gor kun̄ bin̄ge yade hinayin̄,” yinyin̄.

10

Yesuyen mere basan̄ mar 12

(Mak 3:13-19; Luk 6:12-16)

¹ Be, Yesu belen̄ komatmin̄ 12 goyen yinke kun̄ gabu irkeb garbammin̄ kurayen kurayen sope yird yirdya un̄gura yakira ten̄ ten̄ taren̄ya yunyin̄.

² Yesuyen mere basan̄ mar 12 gote den̄embe gago: mehen̄debe Saimon den̄em kurabe Pita. Irde kulin̄ Andruya, Sebedi urmin̄ waran̄ Yemsya kulin̄ Yonya. ³ Filipya Batolomiyuya Tomasya teks yad yad al Matiyuya. Irde Tadiusya Alfius urmin̄ Yemsya. ⁴ Irde Saimon Selotyabe* Yesu asogom hanin̄de kiryin̄ al Yudas Iskariotya.

Mere basan̄ marm̄in̄ meten̄ yunyin̄

(Mak 6:7-13; Luk 9:1-6)

⁵ Yesube go mar 12 goyen yad yerke kunin̄ tiyamin̄. Kunin̄ tikeb saba gahade yiryin̄: “Al min̄ hoyan̄ Yuda mar moñ hitte ma kunayin̄. Irde Samaria marte taun kura bana ma po kunayin̄. ⁶ Israel marbe Al Kurun̄yen sipsip gega, meremin̄ ma nurde duwi hamin̄ geb, yen̄ hitte kunayin̄. ⁷ Kun̄ hen̄yabe, ‘Al Kurun̄ belen̄ alya bereyamin̄ doyan̄ yird yird nalu gobe binde hihi,’ yinen̄ tagalde hinayin̄. ⁸ Irde garbam mar sope yirde, al kamtin̄ yisan̄ heñ, al busuka min̄yan̄be sope yirde, al un̄guram yan̄be un̄gura go yakira

* **10:4:** Yesu hinhin̄ goyenterbe Roma gabman asogo irde han̄yen mar kura hinhan. Go mar gobe Selot yinen̄ hinhan.

teŋ kuŋ hinayiŋ. Tareŋ gobe duliŋ tahaŋ geb, gwahade goyen po deŋ wor muruŋgem moŋ duliŋ al faraŋ yurde hinayiŋ. ⁹⁻¹⁰ Irkeb meten teŋ hinayiŋ goke al beleŋ faraŋ durde hinayiŋ. Niŋgeb kuniŋ yeŋbe hora unkuŋen muŋ kura ma po teŋ kunayiŋ. Irde kalwa ma yawarnayiŋ. Uliŋhorbe uliŋde haŋ gog ep geb, hoyan ma yawarnayiŋ. Kahaŋbasanya genunya wor hoyan ma yawarnayiŋ. ¹¹ Taunyaŋya tiyunyaŋya kuŋbe al kura gargar dirtek al goke nankenen yenenbe yeŋya hinayiŋ. Yeŋya heŋ kuŋ kuŋ metenŋin pasi irhet yeŋ nurdeb yubul teŋ hoyande wor kunayiŋ. ¹² Be, al gote yare kuŋbe ya miŋ mar goyen, 'Al Kurun beŋ bitin yisikamke ga hinayiŋ,' yinnayiŋ. ¹³ Irke mel go deŋ ge igin nurke yenenbe biŋ kamke heŋ heŋ mata goyen gor po tubul tike hiyeŋ. Munan igin ma denke yenenbe biŋ kamke heŋ heŋ mata gobe deŋ hitte mulgan hiyeŋ. ¹⁴ Al kura gargar ma dirde meretiŋ ma nurkeb mel gore Al Kurunyen mere pel irhet yeŋ bebak tinaŋ yeŋbe kahaŋtinde niŋ tupi go busan heŋ gab ya wet ma taun wet kura goyen tubul teŋ kunayiŋ. ¹⁵ Fudinde wor po dinen hime. Taun goyenter niŋ marbe kame Al Kurun beŋ al iginya bulunya pota yiryen nalureb mata bulunmin gote muruŋgem bulun wor po tenayiŋ. Bikken Sodomya Gomoraya taunde niŋ mar beŋ mata bulun teŋ hinhan gote muruŋgem tamin gote folek wor po tenayiŋ geb," yinyiŋ.

*Kanduk kurayen kurayen forok yenayiŋ
(Mak 13:9-13; Luk 21:12-17)*

16 Be, Yesu go sopte gaha yinyiñ: “Den kunayin bana gonbe bulun dirtek marbe budam han. Ningeb sipsip yad yermeke kulu duwi kahal bana kutnen tiniñ tahañ. Ningeb den meten ten kun henyañ beñ kunere beñ kenkela dufay hen ga mata ten hanyen go gwahade goyen po ten hinayin.† Kalyingibe bulun gog kura tiya yen ma nurde hityen. Ningeb den wor matatin gwahade po ten kun hinayin. 17 Irdeb al niñ nurde ga meten ten hinayin. Mel gore merem yan dirke merere huwarnayin. Irde kurabe gabu yayan dukun dusulak tinayin. 18 Ne niñ bulun nurde han mar beñ dukun megen niñ doyan mar kurayen kurayen diliñde merere derde hinayin. Irkeb ne niñ gusunon dirkeb mel goya Yuda mar mon al miñ hoyanya goyen momon yirnayin. 19-20 Ningeb wan dade merere dukun gusunon dirkeb daha yiniñ tihit yen barbar ma yenayin. Goyenter daha mat mere ten ten dufay dunen dunen albe den mon. Goyarebe Holi Spirit beñ dufay dunke mere tinayin geb, goke kanduknen ma nurde hinayin.

21 “Be, goyenterbe ire itinya igin ma hen kura beñ al hay heke wan gasa yirke kamde hinayin. Irde naniñ beñ wor dirnen wen gwahade po yirnayin. Irde dirin beñ huwarde naniña miliñyat mere ma nurde asogo yirde gasa yirke kamnayin. 22 Al tumnon ne niñ igin ma nurde han mar beñ asogo dirde hinayin. Goyenbe gwaha dirde hike goke kafura ma hen sanin po

† **10:16:** Yesu beñ kunere niñ yirin gobe bulun mat ma yirin. Kunerebe kenkela dufay hen ga mata ten hanyen goke nurde yirin.

heñ hinayiñ. Kuñ kuñ funańdebe Al Kuruñ belen dawaryeñ. ²³ Nińgebe ne niñ teñ buluñ buluñ dirkebe busaharde hoyańde kuñ hinayiñ. Fudinde wor po dineñ hime. Deńbe Israel nańa bana niñ taun kuruñ gayen meten teñ kuñ pasi ma irkeya ne Al Urmiñ gayen mulgañ hewen.

²⁴⁻²⁵ “Be, dirińbe saba almiñ gote dufay epte ma fole iryen. Dufaymińbe kuñ saba almiñ gote dufayya tuńańde heńbe gor po bada hiyyen. Be, meten al wor doyañ almińde meten goyen fole ma iryen. Metenmińbe kuñ doyañ almiñ belen meten teñ hi gwahade po teńbe gor po bada hiyyen. Gwahade goyen po, deńbe nere yufukner hañ. Nińgebe al belen ne buluñ nirde uńgurayen kuruñmiñ Belsebul nineñ hañ kenem deńbe daha dirnayiñ? Buluñ wor po dirnayiñ. Al mali dentiñ ga moñ yeñ nurde duneńbe mere buluñ mat wor po dirde hinayiñ.

²⁶ “Goyenpoga gwaha dirnayiñ mar goke ma kafura henayiñ. Dufayya mataya kura epte ma po banare hinayiñ. Banare hitiñ kuruñ gobe kame kawan po forok yeke al tumńań nurnayiñ.

²⁷ Nińgebe kamebe deñ momoñ dirde himyen gayen kawan po tagalde hinayiñ. Balmińde mere dirde himyen goyen wor kawan tagalde hinayiñ.

²⁸ Al mudunke kamnayiñ mar goke kafura ma heñ hinayiñ. Yeńbe uliñ go po buluñ irnayiñ. Munañ go kamere tontińbe epte ma daha wet kura irnayiñ. Gwahade yarabe ulińya tontińya kak alare yemeytek albe uńkuren go po gab kafura irde hinayiñ.

²⁹ “Fińfuńbe nu mukneñ wor po gwahade kura

yeŋ yentek moŋ gega, Al Kurunbe biŋ sir ma yirde hiyen. Niŋgeb nu goyen kura daha wet kura tiyyeŋ gob Al Kurunbe nurde hike ga tiyyeŋ. ³⁰ Tonanŋiŋ yuwalŋeŋ epte ma kapyaŋ hetek goyen wor Al Kurunbe gwahade haŋ yeŋ keŋkela nurde hi. ³¹ Niŋgeb deŋbe Al Kurun dilindeb fiŋfuŋ buda damum gote folek wor po yeŋ denen hi geb, heŋ heŋtiŋ ge kafura ma heŋ hinayiŋ,” yinyiŋ.

Yesu niŋ tagalde hinayiŋ

(Luk 12:8-9,51-53; 14:26-27; Mak 9:41)

³² Be, Yesu go sopte gaha yinyiŋ: “Al kura al hoyan diliŋ mar dufaymiŋ ne niŋ saŋiŋ irde hiyen goyen tagalyeŋbe ne wor Nanne saŋiŋ miŋyaŋ gote diliŋ mar, ‘Al gabe nere,’ inen. ³³ Munan al kura ne niŋ yeŋ al hoyan diliŋ mar, ‘Nebe ma nurde unhem,’ yinyeŋ al gobe ne wor kame Nanne saŋiŋ miŋyaŋ gote diliŋ mar, ‘Al gobe ma nurde unhem,’ inen.

³⁴ Be, ga nurnaŋ ko. Nebe fuleŋa mata isikamde kamde niŋ ma megen gar katmiriŋ. Ne wamiriŋ gake teŋbe fuleŋare hinayiŋ. ³⁵ Nebe megen haŋ mar beleŋ mata gaha teŋ hinayiŋ yeŋ wamiriŋ. Mata gobe gahade:

‘Urmiŋ beleŋ naniŋ asogo iryeŋ.

Wirin beleŋ miliŋ asogo iryeŋ.

Bere beleŋ huwarde unde miliŋ asogo iryeŋ.

³⁶ Gwahade goyen po al asogo wor po yirtek marbe yiŋgeŋ miŋ bana gore po asogo yirnayiŋ.’ *Maika 7:6*

³⁷ “Irde al kura miliŋya naninŋya niŋ uguŋ po nurde ne ma gama niryeŋ al gobe epte ma

komatne hiyyeñ. Irde al kura urmiñya wiriñya niñ uguñ po nurde ne ma gama niryeñ al goyen wor epte ma komatne hiyyeñ. ³⁸ Irde ne niñ teñ kanduk yeneñ kamde kamde niñ bada henayiñ marbe epte ma komatne henayiñ. ³⁹ Irde al kura megen heñ heñmiñ ge uguñ po dufay heñ hiyeñbe Al Kurunya epte ma hiriryen. Goyenpoga ne niñ teñ al kura heñ heñmiñ ge ma nurde gama nirde hiyeñ al gobe Al Kurunya heñ heñ gobe yende hiyyeñ.

⁴⁰ “Be, deñ meten teñ kuñ hikeya igiñ dirde gargar dirde hinayiñ gobe ne gayen nirde hañ yeñ nuren. Gwaha niryeñ gobe ne po moñ. Nanne nad nerke wamiriñ al goyen manañ igiñ igiñ iryeñ. ⁴¹ Irde al kura, ‘Al gabe Al Kuruyen mere basañ al,’ yeñ keneñ igiñ irde gargar iryeñ al gobe mere basañ alyen muruñgem tiyyeñ. Irde al kura, ‘Al gabe al huwak,’ yeñ keneñ igiñ irde gargar iryeñ al gobe Al Kurun beñ al huwakyen muruñgem unyeñ. ⁴² Irde al deñem moñ gar hañ gayen kura komatne yeñ keneñ bebak teñ fe kura unke melak bida iryeñbe gote muruñgembe soñ ma hiyyeñ,” yinyiñ.

11

*Yesu beñ Yon Baptais niñ yiriñ
(Luk 7:18-35)*

¹ Be, komatmiñ 12 goyen saba yirde yirdeb yubul tike kwamiñ. Irkeb Yesube gor mat Galili naña bana goñ niñ taun hoyanyañ wor Al Kuruyen saba yirde meremiñ tagale yeñ kuriñ.

² Gwaha ten kun hikeb Yon Baptais koyare hinhinde gor po henbe Yesu Kristuyen mere mon goyen nuryin. Irdeb komatmin kura hulyan yirin. ³ Irkeb kunbe, “Ge gayenbe Yon belen al kura kame wayyen yeke nurde hityen al goyenbe ge gago ma al hoyan nin doyan hen hitek?” inen gusanan iramin. ⁴ Irkeb, “Mulgan hen kunbe dindiken mere nurde hanya mata ten hime nenen hanya kurun goyen Yon momon irnain. ⁵ Al dilin titminbe nankenen han. Kahan titminbe taren hen harde kun han. Al busuka minyanbe ulin igin hen han. Irde kirmin titminbe mere nurde han. Al kamtin manan sopte huwarde kun han. Irde Al Kurun belen megen nin alya bereya faran yurd yurd mere igin gobe al buninen wor nurde han gayen kun momon irnain. ⁶ Irdeb, ‘Al kura ne nin ten Al Kurun nin dufaymin taren irtin goyen go ma katyenbe Al Kurun belen guram irde sanin iryen,’ yihi innain,” yinyin.

⁷ Gwaha yinkeb Yonyen komatmin go mulgan hen kwamin. Kukeb Yesu belen Yon nin momon yire yenbe gaha yinyin: “Denbe sawsawa po kurun nanja bana gonbe da kinnin yen kwan? Dulin yamun kura mene belen tama yurtin goyen yinnin yen kwan? ⁸ Goyen mon kenem da wor po kinnin yen kwan? Al kura umna igin titin kura kinnin yen kwan? Mon. Al horam yan umna igin ten det igin igin nin po nurde han marbe megen nin doyan mar karkuwanen yayan po han. ⁹ Goyenbe da kun kinnin yen kwan? Al Kurunyen mere basan al? Gwaha, fudinde. Gega yenbe Al Kurunyen mere basan mar hoyan goyen

yara moŋ. Yenbe gote folek. ¹⁰ Al goyen goke tenbe Al Kurunyen asanđe gahade katiŋ hi:

‘Mere basan alne ten kermeke yen wa mehen hen kuyen.

Mehen hen kunbe belenđe sope irde gunyen,’
yitiŋ hi. *Malakai 3:1*

¹¹ Be, yitiŋ gwahade po meten tiyuŋ al gobe al hoyan moŋ. Yon Baptais belen tiyuŋ. Niŋgeb fudinde wor po, bere belen kawan yirtiŋ han kurun gayen Yonyen meten goyen fole irtek epte moŋ hinhan. Yen belen meten tiyuŋ gobe meten hoyan kurun gote folek wor po tiyuŋ. Goyenbe yenbe ne gayen nenkela ma hen hi. Niŋgeb al kura denem moŋ gega nenkela hen bebak tenbe Al Kurun belen yende alya bereya doyan yirde hi bana goŋ hiyen al gobe Al Kurun diliŋdeb Yon folek yen kinyen.

¹²⁻¹³ “Be, Moseyen sabaya Al Kurunyen mere basan marte sabaya asanđe katiŋ gobe Al Kurun belen yende alya bereya doyan yird yird goyen tagalke wan wan Yon Baptais wor tagaluŋ. Niŋgeb Yon hitte mat wan wan gayen nalu hitere gabe Al Kurun belen alya bereyamin doyan yird yird mata kawan forok yen hike yenenbe al budam bana goŋ kuniŋ yen nurde kurut wor po yen han. Goyenbe tarenminde ten hikeb Al Kurun belen alya bereyamin doyan yird yird goyen buluŋ irde han. ¹⁴ Yonbe bikken Elaia belen meten ten hinhin gwahade meten tiyuŋ. Niŋgeb al kura kame Elaia wayyen yen Moseyen sabaya Al Kurunyen mere basan mar belen tagaltiŋ goyen fudinde yen nurde han kenenbe Yon Baptais gobe

al gogo yeŋ nurnayiŋ. ¹⁵ Al kirmiŋ miŋyaŋbe mere gayen keŋkela nurnaŋ ko.

¹⁶ “Be, gayenter niŋ marbe al matam dahade haŋ yewen? Be, go mar gobe diriŋ kura gabu gasuŋde heŋ kari teŋ heŋya yiŋgeŋ uliŋ kadom mohonŋde teŋ hanŋen go gwahade. Diriŋ gobe kari teŋ heŋya kadom gineŋ teŋbe, ¹⁷ ‘Neŋ beleŋ buleluŋ fuk irde tikiŋ heŋ dunhet gega, gege ma tahaŋ. Irde esinayiŋ daw yeŋ al hakwa ambo irde irdere niŋ tikiŋ heŋ dunhet gega ma esahaŋ,’ yineŋ kwep kwep yirde hanŋen go gwahade.

¹⁸ Niŋgeb diriŋ teŋ hanŋen gwahade goyen po, mel gobe mere fudinde nurtek ma yirde hi. Niŋgeb Yon Baptais beleŋ beretya wainya ma neke keneŋbe, ‘Al gobe unŋuram yaŋ,’ ineŋ hihan. ¹⁹ Munanŋ ne Al Urmiŋ gabe biŋgeya wainya nemeke neneŋbe, ‘Al gabe dulare niŋ al wor po. Irde yeŋbe teks yad yad marya Moseyen saba keŋkela ma gama irde hike “mata buluŋ mar” yineŋ hityen mar gote kadom,’ nineŋ hanŋen. Goyenpoga al kura dufay wukkeŋ miŋyaŋbe matamiŋ beleŋ gab kawan forok irde hiyeŋ geb,” yinyiŋ.

Biŋ mulgaŋ ma heŋ haŋ mar
(Luk 10:13-15)

²⁰ Be, Yesu go gwaha yineŋbe Al Kurunŋen tareŋde mata tiŋeŋ kurayen kurayen budam teŋ hike ga bebak ma teŋbe mata buluŋmiŋ yubul ma teŋ Al Kurunŋ hitte biŋ mulgaŋ ma hamiŋ mar goyen goke igiŋ ma nurde gaha yiriŋ: ²¹ “Be, deŋ Yuda mar Korasin taundeya Betsaida taundeya haŋ marbe ne beleŋ mata tiŋeŋ kurayen kurayen

tenj himeke nenenj bebak titek yara gega, gwaha ma tenj asogo nirde hanj. Niñgeb denj Yuda marte mata gwahade goke Al Kurunj belej binj ar yeke gote murunjem bulunj wor po dunyenj geb, goke buninjenj nurd dunenj hime. Ne belej Yuda mar monj al minj hoyanj hanjen taunde Tairya Saidonya gor kunj mata tinenj forok yirmirinj manhan mel gob aranj po bebak tenj mata bulunminj ge kanduknenj wor po nurde amil erekke hor yirde tupi sam tenj mata bulunminj go yubul tenj Al Kurunj ninj binj mulganj hewonj. ²² Fudinde wor po dinenj hime. Tairya Saidonya taunde ninj marte mata bulunj gote murunjembe kurunj yarham. Goyenbe denj Yuda mar merene gama ma irde hanjen gote murunjembe yende folek, bulunj wor po tenayinj geb. ²³ Irde denj Kapeneam taunde ninj mar, denjbe dindikenj ge yenj, ‘Nenjbe denjininj yanj,’ yenj turunj turunj tenj Al Kurunj ninj bitinj ma mulganj henj hanj? Al Kurunj belej kak ala bana demeyke kurkunayinj geb. Mata tinenj kurayen kurayen denj hitte forok yenj hike yenenj hanj gayen Sodom taunde forok yenj hinhan manhan gor ninj mar belej mata goyen yenenjbe mata bulunminj yubul tenj Al Kurunj ninj binj mulganj hewonj. Irkeb bulunj ma irkeb gaha nanja gayenbe taun gobe hiwonj. ²⁴ Fudinde dinenj hime, kame Al Kurunj belej al iginjya bulunnya pota yiryen nalureb Sodom ninj marbe mata bulunj tenj hinhan gote murunjem bulunj tenayinj. Goyenbe denj Kapeneam taunde ninj marbe Sodom ninj mar belej kanduk tenayinj gote folek wor po tenayinj geb,” yinyinj.

*Kanduk minyan marbe Yesu hitte wanayin
(Luk 10:21-22)*

²⁵ Be, goya goyenbe Al Kurun mere irde, “Adone, gebe nanƙinya megenya gote Doyan Al Kurun. Gebe al yingen dufaymin wukkek yen nurde han marya megen nin alyen saba karkuwan yawartin marya hittebe meten ten hime kurun gate min goyen bana kerde hayen. Goyenbe dirin belen nanin milin hitte tawun hitin yara al kura yingende saninde epte mon yen nurde Al Kurun belen gab faran duri yen han mar hitte yikala yiran goke amanen wor po nurde turun girde hime. ²⁶ Fudinde, buniyengebe kurun geb, mata gwahade forok iran,” yirin.

²⁷ Irdeb, “Adone belenbe det kurun gayen doyan yird yird meten gobe ne nunyin. Nebe yende Urmin wor po geb, yen po gab kenkela nurde nunen hi. Al hoyanbe gwahade ma nurd nunen han. Irde Nannebe neya al kura ne belen basin yirde hime marya po ga nurd unen hite. Al hoyanbe gwahade mon. ²⁸ Ningen den kanduk kurayen kurayen yenen goke bitin misin nurde han marbe ne hitte wanan. Irkeb faran durmeke bitin yurum heke hinayin. ²⁹ Nebe delne kamtin, irde dufayne manan kipirtin. Ningen wan sabane nurde gama nirnayin. Irkeb faran durmeke bitin yurum hekeb hinayin. ³⁰ Sabane nurde gama irnayin dinen hime gobe metenen mon. Ne belen kanduk dunen hime gobe hipirken geb, ne hitte wanan,” yinyin.

*Yesube Sabat nalu gote miñ al
(Mak 2:23-28; Luk 6:1-5)*

¹ Be, Yesu go Sabat nalu goyenter komatmin yagoya wit meten kahalyañ kuñ hinhan. Kuñ henyabe komatmin yago goyen binje yirkeb wit bilmin kura yade igineñ nene hinhan. ² Irkeb Farisi mar belen yenenbe, “Mel ga yena! Mel gabe Sabat nalure mata gwaha ma ten hinayin yen bisam irtin goyen ten han!” inamin. ³ Irkeb Yesu belen wol henbe, “Denbe Al Kurunyen asande Dewitya kadom yagoya binje kamde mata tiyamin gote baranmin goyen ma wor po kapyan hen nurde hanjen?” ⁴ Dewitbe Al Kurunyen ya balem bana hurkunbe beret Al Kurun untin himam, Al Kurun doloñ ird ird mata doyan marte kudineñ goyen kadomya yad namin. Dewitbe Mose belen gwaha ma ten hinayin yitin goyen wor gogo tiyyin gega, goke kanduk kura ma kinyin. ⁵ Irde Al Kurun doloñ ird ird mata doyan marbe Sabat nalure Al Kurunyen ya balem bana hen meten ten henbe Moseyen saba bulun irde hinhan. Goyenbe gote kanduk kura ma keneñ hinhan goyen Al Kurunyen asande katinbe ma kapyan hen hanjen? ⁶ Fudinde dinhem. Mel gobe Sabat nalure Al Kurunyen ya balem bana meten ten hikeb mata bulun tahan ma yineñ hanjen. Munañ nebe ya gote folek geb, komatne yago neya tumñañ hen Sabat nalure mata tahan gabe mata bulun moñ geb. ⁷⁻⁸ Ne Al Urmin gabe Sabat nalu gote Doyan Al Kurun. Ningeb Al Kurunyen mere asande, ‘Nebe al belen galak nird nird nin ma nurde hime. Kadom bunineñ gird gird goke

gab amanen nurde hime,' yitiŋ goyen deŋ belen mere gote miŋ nurde haŋ manhan uliŋde merem moŋ mar gayen buluŋ buluŋ ma yirde hiwoŋ," yinyiŋ.

*Sabat nalure al haniŋ simsimam kura sope iryiŋ
(Mak 3:1-6; Luk 6:6-11)*

⁹ Be, gwaha yinenbe gor mat kuŋ Yuda marte gabu yare kuriŋ. ¹⁰ Bana goŋbe al kura haniŋ simsima hitiŋ goyen gor hinhin. Irke Farisi mar gore da misiŋde kura uliŋde merem yaŋ irniŋ yeŋbe Yesu gusuŋaŋ iramiŋ. "Sabat nalurebe al kura garbam miŋyaŋ goyen sope irtek gobe Mo-seyen sabarebe igiŋ yitiŋ ma dahade?" inamiŋ. ¹¹ Gwaha inkeb, "Deŋ gayen sipsiptiŋ kura Sabat nalure mete titmiŋ bana kurkuyeŋbe igiŋ keneŋ wasak tinayiŋ? Moŋ, kuŋbe teŋ isaŋ heŋ siŋare kernayiŋ geb. ¹² Al Kuruŋ diliŋdeb sipsipbe det diriŋeŋ, munan albe det kuruŋ wor po. Niŋgeb Sabat nalurebe mata igiŋ igiŋ po ga teŋ hitek," yinyiŋ. ¹³ Irde al go, "Hange giŋ ira," inyiŋ. Irke haniŋ giŋ irkeb haniŋ kurhan igiŋ hiyen go gwahade igiŋ wor po hiriŋ. ¹⁴ Goyenbe Farisi mar gobe siŋare kuŋ yiŋgeŋ uliŋ daha mat Yesu mayteke kami yeŋ mere sege iramiŋ.

Yesube Al Kuruŋ belen basiŋa irtiŋ

¹⁵ Be, Farisi mar belen mata tiniŋ teŋ hinhan goyen bebak teŋbe gasuŋ go tubul teŋ hoyande kuriŋ. Kukeb al budam po gama irde kwamiŋ. Irkeb garbam miŋyaŋbe tumŋaŋ sope yirke igiŋ hamiŋ. ¹⁶ Gwaha yirde al buda go guram dirhem gake al hoyan ma momoŋ yirnayiŋ yeŋ hayhay

yiryiñ. ¹⁷ Mata kurunñ tiyyiñ gobe Al Kurunñ belenñ mere basañ almiñ Aisaia mere irke asañde kayyiñ gote igineñ kawan forok yiriñ. Merebe gahade:

¹⁸ “Al gabe nere metenñ al, basiña irmiriñ goyen.

Yenbe bubulkuñne wor po yenñ nurde unenñ hime.

Irde yenñ ge amanenñ wor po nurde hime.

Holi Spirit tenñ kermeke ketal uryenñ.

Irkeb ne belenñ al iginya bulunya pota yirde gote murungem yunenñ yunenñ goyen megen al hike kwa kurunñ gayen momonñ yirde tukuyenñ.

¹⁹ Yenbe al kuraya kadom mohonñde tenñ kwep kwep ma tiyyenñ.

Irde belenyanñ mere kuware ma tenñ hike nurnayiñ.

²⁰ Al kura bisike kokañ go gwahade, bulunñ hiniñ tenñ hinayiñ goyen bulunñ ma yiryenñ.

Irde al kura bulunñ henñ hulsi aymuk irtiñ yara hinayiñ goyen wor bulunñ ma yiryenñ.

Matamiñ gobe bada ma hiyyenñ.

Gwahade po tenñ tenbe alya bereyamiñ tumñanñ yumulganñ tenñ pasi iryenñ.

²¹ Irke al miñ hoyanñ Yuda mar monñ gore yenñ ge hekkeñ nurde faranñ yurd yurd niñ doyanñ irde hinayiñ,” yitiñ hi. *Aisaia 42:1-4*

Yesuya Belsebulya

(Mak 3:20-30; Luk 11:14-23; 12:10)

²² Be, gwaha yenñ hikeyabe al kura unñgura ketal urtiñ goyen tenñ wayamiñ. Al gobe diliñ titmiñ irde mohonñ manañ kattinñ. Be, al gobe Yesu belenñ sope irkeb nanñkeneñ mere tenñ tiyyiñ.

²³ Irkeb gabu iramiŋ mar beley mata go kenen hurkunƙat wor po teŋbe, “Mesaia Dewit Urmiŋ kame wayyen yen hanŋen gobe al gago wet?” yamiŋ. ²⁴ Goyenbe Farisi mar beley mere go nurdeb, “Moŋ, uŋgurayen kurunmiŋ Belsebulyen tarende uŋgura gogo yakira teŋ hi,” yamiŋ. ²⁵ Irkeb Yesu gobe al dufay heŋ hinhan goyen yenen bebak teŋbe gaha yinyiŋ: “Tiyuŋ kurun kura bana al beley yinŋen uliŋ kadom asogo gird teŋ bur yenayiŋ gobe saŋiŋ ma heŋ buluŋ henayiŋ. Irde al miŋ dirŋen kura wor gwahade po, yinŋen uliŋ kadom asogo gird teŋ bur yenayiŋbe tumŋaŋ saŋiŋ ma heŋ hinayiŋ. Taunde niŋ al wor gwahade po, awalikde ma hinayiŋbe epte ma saŋiŋ heŋ hinayiŋ. ²⁶ Niŋgeb gwahade goyen po Satan beley yen yufukde haŋ uŋgura buda goyen haram yirde yakira tiyyenbe dahadem saŋiŋ henayiŋ? Hubu geb. ²⁷ Goyenbe deŋ beley Belsebulyen tarende uŋgura yakira teŋ hi nineŋ haŋ. Munan deŋ gama dirde haŋ mar wor uŋgura yakira teŋ hanŋen goyenbe ganunŋen saŋiŋde mata go teŋ haŋ yen nurde haŋ? Belsebulyen tarende ma Al Kurunŋen tarende? Mel gobe uŋgura yakira teŋ teŋ saŋiŋbe Al Kurun hitte mat waŋ hi yen nurde haŋ geb, deŋ beley ne nineŋ haŋ gobe usi wor po irde haŋ yen nurd dunnayiŋ. ²⁸ Niŋgeb nebe Al Kurunŋen saŋiŋde uŋgura yakira teŋ himyen geb, Al Kurun beley doyan dird dird gobe bikken deŋ hitte gago forok yihi.

²⁹ “Be, daha matbe al kura gore kuŋ al hoyan tareŋ miŋyaŋ gote yare hurkuŋ samunmiŋya det-

minya yade kuyen? Gwaha tiye yenbe al gore kun sanin minyan al go wa ten fere ten gab epte yaminde nin detya samunminya goyen yawaryen.

³⁰ “Be, al kura ne nin ma hen han marbe asogone. Irde al kura Al Kurun hitte al yukun yukun nin faran ma nurde han marbe al bur yirde meten go bulun irde han yen nuren. ³¹ Ningeb al kura mata bulunya sukal mereyamin ge ten Al Kurun pohogay irkeb igin halde unyen. Goyenpoga al kura Holi Spirit sukal iryen gobe Al Kurun belen epte ma wor po halde pasi ird unyen. ³² Al kura ne Al Urmin gayen asogo nirde mere bulun tiyyenbe pohogay nirke igin halde pasi irde unen. Goyenbe al kura Holi Spirit belen meten ten hi yen nurd nurd ga asogo irde mere bulun tiyyen gobe epte ma wor po mata bulunmin goyen halde unyen. Megen gar henya, ma kame Al Kurunyen nature gor wor epte ma halde unyen.

³³ “Hebe iginen belen gab dikala dirke he igin ma he bulun yen hanyen. Ningeb iginen igin forok yewon yen nurdeb he go sope irde haran henayin. He goyen sope irde haran ma henayinbe iginen bulun bulunen forok yenayin. ³⁴ Denbe kunere duwi yara bulun wor po geb. Meretinya matatinyabe bulun ala po. Ningeb den gwahade belen mere kura igin ma po tinayin. Hubu wor po. Bitin bana dufay bulun belen makin hitin gore mohahtinde mat kat kun hiyen. ³⁵ Ningeb al iginbe binde dufay igin hinayin goyen yade kawan yirde hiyen. Munan al bulunbe binde dufay bulun hinayin goyen kawan yirde hiyen. ³⁶ Goke tenbe fudinde wor po dinen hime, Al

Kurun belen al iginya bulunya pota yiryen nalure gorbe melaktin son heke ne nin mere bulun mat yitin kurun goke merere huwarde danin gwaha yamin goyen Al Kurun momon irnayin. ³⁷ Ningeb mohontinde mat mere kat kuyen gore gab nalu goyenter mere ten hanjen gote murungemigin dunyen ma bulun dunyen goyen nurnayin,” yinyin.

Al Kurunyen saninde det kura irke kinnin inamin

(Mak 8:11-12; Luk 11:29-32)

³⁸ Be, Farisi mar kuraya Moseyen saba marya belen, “Tisa, Al Kurunyen saninde mata tinen kura irke kinnin yen nurde hite,” inamin. ³⁹ Irkeb Yesu belen wol henbe, “Dufay bulun kerde mata manan bulun ten han mar goreb mata tinen Al Kurun belen po ga irtek goke po gusunan hen hanjen. Goyenbe bikken Al Kurunyen mere basan al Yona belen mata ten mere tiyyin goyen po ga nurnayin. Mata tinen hoyan kura ma kennayin. ⁴⁰ Yonabe makan dapna kurun binde wawun karwo gon hinhin gwahade po, ne Al Urmin gayen wor megen binde nan kahalya wawunya karwo hen. ⁴¹ Irde Niniwe taunde nin mar gobe Yona belen kun Al Kurunyen mere basan hen tagalkeb mata bulunmin yubul ten Al Kurun nin bin mulgan hamin. Goyenbe alya bereya gayenter gayenbe ne saba ten hime gabe Yonayen saba gote folek gega, go ma nurde han. Ningeb Al Kurun belen al iginya bulunya pota yiryen nalurebe Niniwe nin mar belen huwardeb merene ma nurde han

mar gayen minje yirnayin. ⁴² Bikken Solomon beley Israel nana doyan irde hinhinyabe nana gisaw nin doyan bere kurun kura Siba beley Solomonyen dufaymin wukken goyen nure yen wayyin. Goyenbe alya bereya gayenter nin gayenbe ne Solomonyen dufay folek gare saba yirde hime gega ma nurde han. Ningeb kame Al Kurun beley al iginya bulunya pota yiryen nalureb doyan bere Siba beley huwardeb merene ma nurde han mar gayen merem yan yiryen.

⁴³ “Be, uncura kura al ulinde takira tike kat kuyen gobe mali nana al ma hitek bana gon kun usan hen hen gasun nin nankenen kun hiyen. Goyenbe gasun kura ma kinyen. ⁴⁴ Irdeb, ‘Bikken hinhem gasunde gor mulgan hewen,’ yiyyen. Irdeb mulgan hen wanbe gasun bikkek gobe Al Kurunyen mere binde ma kiryin geb, halde haran hen sope irtin yara kinyen. ⁴⁵ Irdeb kunbe sopte uncura 7 yende sanin folek goyen yupi ten tunnan wanbe al goyen ketal urnayin. Gwaha tikeb al gobe han kanya hinhin gwahade mon, bulun wor po hiyyen,” yinyin.

*Yesuyen kulinya hayminya
(Mak 3:31-35; Luk 8:19-21)*

⁴⁶ Be, Yesu go hako po al buda kurun goyen mere yirde hikeb milinya kulinya beley mere irnin yen wan sinare hen doyan irde hinhan. ⁴⁷ Irkeb al kura beley go yenenbe kun Yesu goyen, “Momkeya kolge wenya ginnin yen wan sinare ga han,” inyin. ⁴⁸ Irkeb wol henbe, “Ganunbe mamne? Ganunbe kolne yago?” inyin. ⁴⁹⁻⁵⁰ Irdeb komatmin yago yenen hen yabe, “Al kura Nanne

Al Kurun sanin minyan gote mere nurde go po gama irde han marbe kolne, hayneya mamne yagoya. Ningeb mamneya kolne wenyabe gago han,” inyin.

13

*Yasun tej tej gote maya mere
(Mak 4:1-9; Luk 8:4-8)*

¹ Be, go nana fay goyenter po Yesube hiyen ya go tubul tej kun fe ala kurun sinare kura gor kipiryin. ² Irkeb sopte al buda karim ma wan gabu iramin. Irkeb bada hej hakwa kura hin-hin hende gor hurkun kipiryin. Keperde hikeb al buda kurun gob fe sinare huwarde hinhan. ³ Hakware gor hejyabe saba budam maya mere mat al buda go saba yiryin. Maya meremin kurabe gahade: “Yasun al kura det muyken tur ire yey kurin. ⁴ Metende kun tur irde tukurin. Irkeb kurabe belenyan katamin. Irke nu belen wan yenenbe namin. ⁵ Kurabe hora heren megen halgayinyan katamin. Mejen tolok mon geb, aran po kawan hamin. ⁶ Goyenbe nana forok yey temeykeb filginin sanin mon geb, gwilgwal irde kamamin. ⁷ Det muyken kurabe yamun hiran yan hinhan bana gon katen kawan hamin. Goyenbe yamun duwi gore hurkun awrum yurke nonbo hamin. ⁸ Munan det muyken kurabe megen igin wor poyan katen kawan hamin. Irde muyken unkuende matbe 100 iginej gwahade hamin. Muyken kurabe 60, munan kurabe 30 gwahade ala iginej hej tukamin. ⁹ Al kirmin minyanbe mere gayen kenkela nurnan ko,” yirin.

*Daniñ maya merere saba yird hinhin?
(Mak 4:10-12; Luk 8:9-10)*

¹⁰ Irkeb komatminj yago goyen kuñbe, “Daniñ geb maya mere mat alya bereya saba yirde ha?” inen gusunanj iraminj. ¹¹ Irkeb, “Al Kurun belen alya bereyaminj doyanj yird yird gote miñbe b-nare hi geb, al hoyanj belenj epte ma bebak titek. Goyen denbe Al Kurunyen tarende miñ goyen iginj bebak tinayinj. ¹² Niñgeb kenkela wor po merene palña irde nurde hinayinj. Al kura binde mat fudinde wor po Al Kurunyen mere nurde hikeb Al Kurun belen mereminj iginj goyen unenj tebanj irde hiyenj. Munanj al kura gwahade moñ gobe Al Kurunyen mere binde muñ kura hiyenj goyen wor tenj sinja iryenj. ¹³ Al gwahade gobe det yennayinj gega, epte ma det gote miñ nurnayinj. Irde merebe nurnayinj gega, epte ma mere gote miñ bebak tinayinj. Niñgeb gwahade po tenj hinayinj yenbe gago maya mere mat saba yirde himyen.

¹⁴ Al gwaha tenj hanj gokeb Al Kurunyen mere basanj al Aisaia belenj Al Kurunyen mere nurde asande kayyinj gobe gago forok yenj hi. Merebe gahade:

‘Denbe merene nurde hinayinj, irde kenenj hinayinj gega, bebak ma po tenj hinayinj.

¹⁵ Fudinde wor po, mel gate binbe sanj wor po. Kirminbe migisunj yurtinj, irde dilinbe mala titinj.

Moñ manhan kirminde nurde, dilinde yenenbe binde matbe bebak wor po tenj ne hitte mulgan hen wake sope yirmewonj, yitinj hi.

Aisaia 6:9-10

16-17 Niñgeb fudinde wor po dinenj hime. Bikken Al Kurunyen mere basanj marya al huwak bikken hinhan gobe daha wor denj belenj mata kurunjenenjan gajen yentewonjen nurde hinhan. Goyenbe go ma yenenjan kamaminj. Mere denj nurde hanj gajen wor nurtewonjen nurde hinhan. Goyenbe ma nuraminj. Munanjen denjbe nalu iginde forok yanjen geb, diltinjen det iginjen yenenjen, kirminjinjen mere iginjen iginjen nurde hanj gago. Niñgeb goke amanenjen nurde hinayinjen.

18 “Gwahade geb yasunjen alyen maya mere gote minjen momonjen direnjen tihim geb, kenkela nurde bebak tinanjen ko. 19 Muykenjen belenjan kataminjen gote minjenbe da? Gobe al kura Al Kurunjen belenjen yende alye bereye doyanjen yird yird saba gote minjen nurde bebak ma tiyyenjen. Irke ungunja belenjen wanjen saba go tenjen sinjan irde binjen sam irke mere goke ma nuryenjen go gwahade. 20 Megenjen halgayinjan hora araten herenjen det muykenjen kataminjen gote minjenbe gahade: al kura Al Kurunjen saba tinenjan nurdeb aranj po iginjen iginjen yenenjen gama iryenjen. 21 Goyenbe mere go kenkela ma binjen kurkunjen kipiryenjen geb, ulyanjen ma Al Kurunjen mere goyenjen gama iryenjen. Al Kurunjen saba nurde gama irde hiyenjen gega, al belenjen bulunjen bulunjen irke gote kanduk kenenjenbe bada henjen aranj po Al Kurunjen saba go tubul tiyyenjen. 22 Yamonjen duwi forok yitinjen bana det muykenjen kataminjen gote minjenbe gahade: al kura Al Kurunjen saba nurde gama irde hiyenjen. Irde megenjen ninjen mata tenjen tenjen megenjen ninjen samunjen yad yad dufay belenjen tulunjen tikeb Al Kurunjen saba goyenjen iginenjen minjonjen hiyyenjen. 23 Goyenpoga megenjen iginjanjen wor po

katamiŋ gote miŋbe gahade: al kura Al Kurunyen saba nurde bebak teŋ gama irde hiyen gob gote iginenbe budam wor po forok yenayin. Muyken kurabe iginen 100 forok yiryen. Kurabe 60, munan kurabe 30 forok yiryen go gwahade. Muyken buda gob iginen kurayen kurayen forok yenayin,” yinyin.

Yamuŋ bulunyen maya mere

²⁴ Be, Yesu go gwaha yinen saba yire yenbe maya mere hoyan gahade yinyin: “Al Kurun belen yende alya bereya doyan yird yird gobe gahade: al kura wit muyken goyen metenminde yukun tur yiryin. ²⁵ Goyenbe wawunbe al tumnan firтинde hikeb al gote asogom belen kun yamuŋ duwi muyken goyen wit muyken tur irтинyan goyen tur yirde yukunbe kuriŋ. ²⁶ Kame wit go kawan hen kun iginen hiniŋ teŋ hikeb yamuŋ duwi goyen manan forok yen tukamiŋ. ²⁷ Irkeb meten gote miŋ alyen meten mar belen wanbe, ‘Doyan al, gebe wit muyken haran gega, yamuŋ duwi gob daha mat forok yan?’ inamiŋ. ²⁸ Irkeb, ‘Asogone kura belen mata ga tiyun geb,’ yinyin. Irkeb meten marmin belen, ‘Ningeb kun wasiniŋ?’ inen gusunan iramiŋ. ²⁹ Irkeb, ‘Goŋmin. Monŋo wasehet yen wit manan tumnan wasinak ge. ³⁰ Yubul tike tumnannde karkuwan henayin. Sak nature gab wasitek. Goyare gab meten marne yamuŋ duwi wa walde kumga teŋ teŋ niŋ yad fere teŋ yernayin. Munan witbe yade yukun yadi yerd yerd ya kurunde gor yernayin,’ yinyin,” gwahade Yesu belen mel go momon yiryin.

*Mastet bilminya yisyat maya mere
(Mak 4:30-32; Luk 13:18-21)*

³¹ Be, Yesu go maya mere hoyañ wor yinyiñ. “Al Kurun belen alya bereyamin doyañ yird yird gobe mastet he bilmin dirneñ mun wor po go gwahade. Al kura belen mastet bilmin goyen tenbe metenminde haryiñ. ³² Det hoyañ muykenbe karkuwan, munañ mastet he muykenbe dirneñ mun wor po gega, kawan heñ kurun heñbe meten de gor det haryiñ goyen fole yiryen. Irkeb nu belen wan haniñ heren hagam yirde gor hinayiñ,” yinyiñ. ³³ Irdeb sopte po siraw mere hoyañ yinyiñ. “Al Kurun belen yende alya bereya doyañ yird yird gobe Bere kura yis ten palawa kurunya tigiri ten tubul tikeb palawa go ditdi nene kurun hiyyen go gwahade goyen,” yinyiñ.

*Maya mere mat po saba yirde hinhin
(Mak 4:33-34)*

³⁴ Yesu belen al buda mere gwahade yirde hinhin gobe maya mere mat po yirde hinhin. Mere kenkelak mat ma yirde hinhin. Maya mere mat po yirde hinhin. ³⁵ Ningeb Yesu belen maya mere mat saba tagalde hinhin gobe Al Kurun belen mere basan almin mere irke asan de kayyin gote iginenbe gogo forok yirin. Merebe gahade: “Sabanebe maya mere mat po tiyen. Irde det banare hitin al kura bebak titek mon goyen tagalen,” yitiñ hi. *Tikin 78:2*

Yamuñ bulunyen siraw mere gote min

³⁶ Be, Yesu gobe al buda kurun go yubul ten ya hiyende gor mulgan hiriñ. Irkeb komatmin yago

kunbe, “Yamuṅ duwi niṅ maya mere mat tagalha gote miṅ goyen momoṅ dira,” inamiṅ. ³⁷ Irkeb gaha yinyiṅ: “Wit muykenṅ igiṅ kuṅ haryiṅ al gobe ne Al Urmiṅ gayen. ³⁸ Metenṅ gobe megenṅ kurunṅ gayen gake yihim. Munanṅ wit muykenṅ gobe Al Kurunṅyen dirṅenṅ wenṅ. Yamuṅ duwi gobe Al Bulunṅyen dirṅenṅ wenṅ. ³⁹ Irde yamuṅ duwi muykenṅ tur iryiṅ al gobe unṅura. Sak nalu gobe nalu funanṅ, irde biṅge gabu ird ird mar gobe Al Kurunṅyen miyoṅ. ⁴⁰ Yamuṅ bulunṅ wasenṅ kak alare yemeyke humga kunayiṅ go gwahade goyen po, nalu funanṅdebe al hitte mata gwahade forok yiyyenṅ. ⁴¹ Ne Al Urmiṅ gare miyoṅne yad yermeke kuṅ nere alya bereya haṅ bana goṅ mata bulunṅ tenṅ hanṅyen marya mata bulunṅ tinaṅ yineṅ al biṅ yade hanṅyen marya go yukunṅ gabu yirnayiṅ. ⁴² Irde mel go yade kak ala bulunṅ wor po bana goṅ yemeynayiṅ. Irkeb goṅ po heṅ esenṅ misiṅ yiṅenṅ hinayiṅ. ⁴³ Goyabe Al Kurunṅ diliṅde alya bereya huwak hanṅyen gobe Al Kurunṅ belenṅ doyanṅ yirde hiyeṅde gor naṅa temeyke wuk yitiṅ yara wukkeṅ igiṅ wor po hinayiṅ. Al kirmiṅ miṅyanṅbe mere gayen kenṅkela nurnanṅ ko,” yinyiṅ.

Samunṅyen maya mere

⁴⁴ Be, maya mere hoyanṅ wor yinyiṅ. “Al Kurunṅ belenṅ yende alya bereya doyanṅ yirde hi gobe gahade: samunṅ kura damum hende hoyanṅ wor po megenṅ biṅde bana kirtiṅ hinhin. Kurareb al kura samunṅ gwahade gaṅ hi yeṅ ma nurdeya megenṅ goyen talde taldeb kinyiṅ. Keneṅbe sopte

aw uryiŋ. Irdeb amanŋ wor po heŋ kuŋ detmiŋ kurunŋ goyen al yunke damu tikeb gote murunŋgem tukunbe megeŋ goyen damu tiyyiŋ go gwahade. ⁴⁵ Al Kurunŋ belenŋ alya bereyamiŋ doyanŋ yirde hi gote maya mere kurabe gahade: al kura belenŋ selweŋ yara kura damum hende wor po goyen goke nankenenŋ kuŋ hinhin. ⁴⁶ Kuŋ kuŋ igiŋ munŋ wor po kura kenenbe mulgaŋ heŋ yende samunŋ kurunŋ goyen al yunke damu tikeb murunŋgem tenŋ tukunŋ det kusamunŋ wor po go damu tiyyiŋ go gwahade,” yinyiŋ.

Kamanŋ kurunyen maya mere

⁴⁷ Be, Yesu belenŋ sopte po gaha yinyiŋ: “Al Kurunŋ belenŋ yende alya bereya doyanŋ yirde hi gobe gahade: makaŋ dapŋa yawarniŋ yeŋ kamanŋ kurunŋ temeyamiŋ. Irdeb dapŋa miŋ kurayen kurayen yawaramiŋ. ⁴⁸ Dapŋa makiŋ hihi yeŋ nurdeb tulunŋ tenŋ tukunŋ siŋare irde dapŋa iginbe tiriyaŋ yeramiŋ. Munanŋ bulunbe yemeyamiŋ go gwahade. ⁴⁹ Nalu funanŋde wor pore gorbe al hitte mata gwahade go forok yiyyenŋ. Al Kurunyen miyoŋ belenŋ waŋ al huwakya al mata bulunŋ tenŋ hitiŋ marya goyen pota yirnayiŋ. ⁵⁰ Irde mata bulunŋ mar gobe yade kak ala kurunŋ bana goŋ yemeyke esenŋ misiŋ yisenŋ hinayiŋ,” yinyiŋ. ⁵¹ Irdeb, “Maya mere kurunŋ dirhem gote miŋ kenkela nurhanŋ we?” yinke, “Gwaha,” inamiŋ. ⁵² Irdeb, “Bebak tihit yahanŋ geb, denbe Moseyen saba al kura saba bikkek po moŋ sabane gergenŋ mananŋ nurde tumŋanŋ yanarde hanŋ al go gwahade denenŋ hime. Niŋgeb denbe al kura yamiŋ bana mat samunŋ bikkekya gergenya yade siŋare

katyen go gwahade goyen po saba bikkekya gergenya tumnan nurde han,” yinyin.

Nasaret taunde kurin
(Mak 6:1-6; Luk 4:16-30)

⁵³ Be, maya mere buda goyen momon yirdeb gasun go tubul ten kurin. ⁵⁴ Kunbe taun gor hen kurun hiriinde gor forok yenbe gor nin Yuda marte gabu yare kun al saba yirke hurkunƙat tenbe, “Ey, al gabe damde kun Al Kurunyen dufay wukkenya mata tinen kurayen kurayen ird ird tarenya gayen yawarun!” yamin. ⁵⁵ Irdeb, “Al gabe kapenta urmin mon? Yenbe Maria urmin. Kulin yagobe Yems, Yosep, Saimonyabe Yudasya mon? ⁵⁶ Haymin yagob gar ma tumnan hityen? Gega al gabe damde kun dufayya tarenya yawarun?” yamin. ⁵⁷ Irdeb bulun nurd unamin. Goyenbe Yesu belen, “Al Kurunyen mere basan marbe taunminde nin marya taynenya belen palap ma yirde meremin ma nurde hanen,” yinyin. ⁵⁸ Irdeb yen ge heken ma nurde hinhan geb, gorbe mata tinen budam ma forok yiryin.

14

Herot belen Yon Baptais mayke kamyin
(Mak 6:14-29; Luk 9:7-9)

¹ Be, Yesu belen mata kurun ten kun hinhin goyen Galili nana gote doyan al kurun Herot belen mere momonmin nuryin. ² Irdeb meten marmen go, “Yon Baptais maymeke kamun al go goyen sopte huwarun geb, mata tinen ird ird sanin minyan meten ten kun hi gogo,” yinyin.

3-4 Be, Yon mayke kamyin gote baranminbe gahade: Yon dilin gergen hinhinyabe Herot beley kulin Filip berem Herodias goran iryin. Irkeb Yon beley kawan po, “Mata gob bulun wor po tiyan geb,” inkeb Herot beley goke igin ma nuryin. Irdeb fulenja marmin yinke Yon fere ten tukun koyare keramin. ⁵ Irde maymeke kamwon yen nurde hinhin gega, al beley Yon gob Al Kurunyen mere basan al yen nurd unen hinhan geb, Yon mayde mayde nin kafura hen hinhin. ⁶ Be, Herot gobe milin beley kawan kiryin nalu go forok yekeb Herotya kadom wenya gabu irde dulan ten hinhan. Irde tikin hekeb Herodias wirin beley gor gabu iramin mar goke gege tiyyin. Irkeb Herot gobe aman wor po hiri. ⁷ Irdeb, “Det kuran nurde gusanan nirkeb igin gunen,” inen dilin mar binja tiyyin. ⁸ Irkeb milin beley gwaha inayin inyin gwahade po Herot inyin. “Han ka po Yon Baptais tonan koronde kerde tawan nuna,” inyin. ⁹ Irkeb doyan al go kanduknen nuryin gega, bere go hitte binja tiyyin goya al buda gor hinhan mar gore daha wet kura ninnak yen nurdeb binja tiyyin go po gama irde bere gore yirin goyen po irde unyin. ¹⁰ Irde fulenja marmin hulyan yirke koyare kunbe Yon binin walamin. ¹¹ Irdeb Yon tonan gobe koronde kerde tawan bere go unkeb yen beley tukunbe milin unyin. ¹² Be, Yon komatmin beley mere go nurdeb wan hakwam goyen tukun mete tiyamin. Gwaha ten kunbe Yon kamyin goyen Yesu momon iramin.

*Yesu beley al 5,000 binje paka yiryin
(Mak 6:30-44; Luk 9:10-17; Yon 6:1-14)*

¹³ Be, Yon kamyin mere momon goyen nurdeb Yesube komatminya hakwa ten nana almemonde dunkuren balmin hini yekwamin. Irkeb nana bana go nin taunyan nin marbe Yesube gon kwa yek nurdeb makan feren gama irde kwamin. ¹⁴ Be, Yesu go kun kun fe sina kurhan forok yenbe al buda kurun goyen yenenbe buninen yinin. Irde garbam minyan marbe guram yirke igin hamin.

¹⁵ Be, wawun hewen ten hikeb komatmin yago belen Yesu goyen, “Nana bana gab tiyun binde minmon. Irde hen ga mon kidoma hwen tiyagab, al buda kurun ga yinke tiyunan kun yingen binke kura damu ten nenan,” inamin. ¹⁶ Irkeb Yesu belen, “Mon, dani kunayin? Den belen det kura yunke nenan,” yinin. ¹⁷ Irkeb, “Gwaha dinha goyenbe nenbe beret siptesononya makan dapna yadi iraw po han,” inamin. ¹⁸ Irkeb, “Yawan nunnan,” yinin. ¹⁹ Irdeb al buda kurun go, “Yamunan keperan,” yinke keperde tukamin. Irkeb beret siptesononya makan dapna yadi irawaya goyen yade kotan kan naninde nankenen Al Kurunen saninde guram yirde yubala ten al yunan yinenbe komatmin yago yunin. ²⁰ Al buda kurun gob binke go nen nen ep po namin. Irkeb komatmin belen binke diknen buda iramin gobe tiri 12 gwahade makin yirtek hamin. ²¹ Be, binke namin mar al parguwak po kpanyan haminbe 5,000 hirin.

*Yesu fe yuwalhen hende huwarde kurin
(Mak 6:45-52; Yon 6:15-21)*

²² Be, gwaha tenbe komatmin yago, “Aranen hakwa hende hurkun fe ala sin kurhan kuan,” yinke hakwa hende hurkunbe yen wa mehen hen fe ala sin kurhan kwamin. Irkeb Yesube gor hen al buda kurun goyen, “Tiyuntin yan tiyuntin yan kuan,” yinyin. ²³ Al buda go gwaha yinenbe Al Kurunya mere tiyye yenbe dugu dabayinde kura gor hurkurin. Kun yen unku ren gon hikeb kidoma hirin. ²⁴ Munan komatmin yagobe megen tubul ten fe ala kurunde hamin. Goyenbe mene huwarke fe goyen makan duba yara karkuwan karkuwan huwamin. Irkeb hakwa gobe mun kura ma sor iryin. ²⁵ Be, nana minge hen hikeb Yesu go fe yuwalhen hende huwarde komatmin yago hitte kurin. ²⁶ Mel gore fe hende huwarde wan hike kenen kafura wor po henbe, “Gabe un gura!” yen ulin barbar yeke daha tinin tinin tiyamin. ²⁷ Goyenbe aran po Yesu belen, “Kafura ma yo. Ne wan hime geb. Taren henayin,” yinyin. ²⁸ Irkeb Pita belen, “Doyan Al Kurun, gabe fudinde ge kenenbe ninke fe hende huwarde ge hitte kwen,” inyin. ²⁹ Irkeb, “Igin ge waya,” inyin. Gwaha inkeb Pita go hakwa hende mat solok yen fe hende harde Yesu hitte kurin. ³⁰ Goyenbe kun hen yabe mene kenen kafura henbe hako ga dolok yen kenenbe, “Doyan Al Kurun, faran nura!” yen kekew tiyyin. ³¹ Irkeb goyare po Yesu belen hanin temeyde tanardeb isan hirin. Irdeb, “Danin dufay budam hen ne nin heken ma nurde ha?” inyin. ³² Gwaha tenbe hakwa hende hurkaryum. Irkeb mene kamin. ³³ Irke gab hakwa binde hinhan mar gore kenen bebak

tenbe doloŋ irde, “Fudinde wor po gebe Al Kurun Urmiŋ,” inamiŋ.

Genesaret niŋ garbam mar sope yiryiŋ
(Mak 6:53-56)

³⁴ Be, gwaha ten kuŋ kuŋbe Genesaret naŋa belen goŋ forok yamiŋ. ³⁵ Irkeb al gor niŋ belen Yesu keneŋ bebak tenbe mere kerke naŋa goyen bana niŋ mar yinke garbam mar tumŋaŋ Yesu hitte yawayamiŋ. ³⁶ Irdeb, “Garbam mar gayen yubul tike meŋe diba ulger niŋ gote muruŋ po sisaŋ urdeb igiŋ henaŋ,” inen esen mere iramiŋ. Niŋgeb al garbam miŋyaŋbe Yesu go sisaŋ urde tumŋaŋde igiŋ hamiŋ.

15

Yesu belen asem yagot mata walde yunyiŋ
(Mak 7:1-13)

¹ Be, naŋa goyen bana meten ten kuŋ hikeyabe Yerusalem taun kurunde mat Farisi mar kuraya Moseyen saba mar kuraya goyen Yesu hitte waŋbe, ² “Daniŋ geb komatge yagobe asiniŋ yagot mata ma gama irde haŋ? Yenbe dula tiniŋbe mali po biŋge nene haŋ. Haniŋ ma haldeya gwaha ten haŋ,” inamiŋ. ³ Irkeb wol henbe, “Munaŋ denbe daniŋ geb asetin yagot mata niŋ po tenbe Al Kurunyen merebe pel irde buluŋ irde hanjen? ⁴ Al Kurun belenbe, ‘Nantiŋya mamtiŋyabe palap yirde hinayiŋ,’ yitiŋ hi niŋgeb, ‘Al kura naniŋya miliŋya mere buluŋ yiryen gobe mayke kamiŋ,’ yitiŋ hi. ⁵ Goyenbe denbe saba goyen tigiri tenbe, ‘Al kura naniŋya miliŋya det kura faran yurtek goyen ma yunenbe,

“Igin faran durmewon gega, Al Kurun unen yen basina irmin geb, go ma faran duren,” yinyen gobe mata bulun mon,’ yen al saba yirde hanjen. ⁶ Niñgeb al gwaha mat saba yirke Al Kurunyen mere ma gama irde naniya miliya palap ma yirde dulin hanjen. Denbe gwahade goyen po asetin yagot mata nin tenbe Al Kurunyen mere bulun irde hanjen. ⁷ Usi mar wor wor, Al Kurunyen mere basan al Aisaia belen asande kayyin gobe fudinde wor po den gake kayyin. ⁸ Merebe gahade:

‘Mel gabe mohonde po turun nirde han.

Gega bindebe ne nin ma nurde han.

Hoyande wor po han.

⁹ Mel gabe megen nin marte saba po gama irde al saba yirde han.

Mel gabe bin hende hende po dolon nirde han,’ yitin hi geb,” yinyin. *Aisaia 29:13*

¹⁰ Be, Yesu gob mel Farisi marya Moseyen saba marya goyen gwaha yinenbe al buda kurun gor hinhan go yinke yen binde wayamin. Irkeb, “Mere ga nurde bebak tina ko. ¹¹ Det kura al mohonde mat binde kurkuyen gore Al Kurun dilinde al go bulun ma iryen. Goyenbe det kura mohonde mat kat kuyen gore po gab Al Kurun dilinde al go bulun iryen,” yinyin. ¹² Gwaha yinkeb komatmin yago belen wanbe, “Farisi marbe mere taha goke igin ma nurde han goyen yenen bebak taha?” inamin. ¹³ Irkeb wol henbe, “He kura Nanne Al Kurun tarenmin kurun gore ma haryin gobe filginin manan tumnan wasiyen. ¹⁴ Niñgeb dilin titmin buda gobe yenen wasak tina. Mel

gobe saba fudinde goyen ma bebak tenbe al mata bulunde yukun han. Al kura dilin titmin belen kadom yingen yara goyen belen ikala irde tukun hime yiyyen gobe tumnande kun mete titminde katiryen,” yinyin. ¹⁵ Irkeb Pita belen, “Maya mere gote min momon dira,” inyin. ¹⁶ Irkeb, “Den manan dufaytin mun kura ma wuk yen han? ¹⁷ Det kura al mohan de mat binde kurkuyen gobe kamebe kat kuyen gobe ma nurde han? ¹⁸ Goyenbe det mere kura al mohan de mat forok yen hanyen gobe binde mat wan hanyen geb, gore gab Al Kurun dilinde al go bulun yirde hanyen. ¹⁹ Dufay bulun, al gasa yirke kamde kamde mata, al kura berem yan gore bere hoyanya duwan ten ten mata, alya bereya fonende leplep mata, kawe mata, merere huwarde usi mat mere ten ten matayabe mere bulun mat ten ten mata kurun gobe al binde mat pul yen hanyen. ²⁰ Det gwahade gore gab Al Kurun dilinde al bulun yirde hanyen. Hani hal hal mata kenkela ma gama irde dula tinayin gore al bulun ma yiryen,” yinen saba yiryin.

*Kenan marte bere gote dufay sanin
(Mak 7:24-30)*

²¹ Be, Yesu go nana hinhin goyen tubul ten Saidon taunya Tair taunyat nana bana gon komatmin yagoya kwamin. ²² Irkeb taun iraw goyen bindere tiyun kura hinhinde gor mat Kenan mar bere kura gore Yesu hitte wanbe, “Doyan Al Kurun, Dewit Urmin, buninen nirde faran nura. Wernebe unura belen wan heren irtin hi geb, bulun bulun wor po irde han,” inen esen

uryiñ. ²³ Goyenbe Yesube meremiñ goyen mun kura haywañ ma hiriñ. Irkeb komatmiñ yago belen, “Esen durde gama dirtiñde po hi geb, takira tike kwi,” inamiñ. ²⁴ Irkeb wol henbe, “Nebe Israel mar Al Kurunyen sipsip meremiñ ma nurde duwi hitiñ goke po wamiriñ geb,” yiriñ. ²⁵ Irkeb bere gore wañ palap irde dokolhoñ yugulun tenbe, “Doyañ Al Kurun, farañ nura,” inyiñ. ²⁶ Irkeb wol henbe, “Diriñde biñgebe epte ma goran yirde yad kulumiñ yago yunke nenayiñ,” inyiñ. ²⁷ Gwaha inkeb bere gore wol henbe, “Doyañ Al Kurun, mere gobe fudinde ninha gega, diriñde biñge dikneñ katnayiñ gob kulu wor nene hanyen. Niñgeb farañ nurayiñ,” inyiñ. ²⁸ Irkeb Yesu belen, “Bere, ne niñ hekkeñ wor po nurha geb, gusunañ nirha gote igineñ forok yiyyeñ geb,” inyiñ. Be, wirin gobe goyare go po igiñ hiriñ.

Al garbam kurayen kurayen sope yiryiñ

²⁹ Be, Yesu go naña goyen tubul ten mulgan hen Galili fe ala kurun feren kun kunbe dugu dabayiñde kura gor hurkuriñ. ³⁰ Irkeb al budam wor po yeñ hitte wayamiñ. Wañ henyabe al kahan nonbo hitiñ, diliñ titmiñ, uliñ albo yirtiñ, mohon kattinyabe garbam hoyan miñyan marya goyen sope yirke igiñ henañ yeñ nurde yawañ kahan miñde yeramiñ. Irkeb sope yiryiñ. ³¹ Al gabu iramiñ mar belen mohon kattin mere tike yenamiñ. Uliñ albok hitiñ goyen igiñ hen, kahan bulun hitiñ goyen huwarde kun wañ ten, diliñ titmiñ nankenen tike yenenbe hurkunkat tenbe Israel marte Al Kurun go turun irde kasor iramiñ.

*Al 4,000 binje yunke namin
(Mak 8:1-10)*

³² Be, Yesu belen komatmin go yinke wakeb, “Al buda kurun gabe tumnande hiteke kun kun yerenkek hihi. Goyenbe det go kura netek minmon hahan. Binje ma nene tiyunmin kunayinbe belenyan kamnayin geb, buninjen yenen hime,” yinyin. ³³ Irkeb komatmin belen wol henbe, “Tiyun binde minmon nan gahade gab binje damde nin yade al buda kurun gahade gayen yunteke nenayin?” inamin. ³⁴ Irkeb, “Beretbe dahade han?” yinkeb, “Beretbe 7ya makan dapna muknen yadi kura goya po han,” inamin.

³⁵ Be, al buda gabu iramin go megen keprnan yinke keperde tukamin. ³⁶ Irkeb beretya dapnaya go yadeb Al Kurun igin nurde unenbe beretya dapnaya go yubala tenbe komatmin yago al yukun yunnan yen yunyin. Irkeb gwaha po tiyamin. ³⁷ Al buda kurun gobe binje go nene ep wor po namin. Irkeb Yesuyen komat belen binje diknen al belen ep nene yubul tiyamin goyen yade tiri 7 gwahade makin yirtek iramin. ³⁸ Bereya dirinya ma kapyan hen al parguwak po kapyan haminbe 4,000 hirin. ³⁹ Binje yunke neke gabe, “Tiyuntinyan tiyuntinyan kunayin,” yinyin. Irdeb komatminya hakwa hende hurkunbe nan kura Magadan taun binde belen gon kwamin.

16

*Mata tinen kura ira inen gusunan iramin
(Mak 8:11-13; Luk 12:54-56)*

¹ Be, Yesu go goŋ hikeb Farisi marya Sadusi marya belej Yesu hitte waŋbe tuŋaŋ urniŋ yeŋ, “Mata tiŋeŋ Al Kurun belej irtek goyen kura irke kinniŋ,” inamiŋ. ² Irkeb Yesu belej, “Deŋbe wawuŋbana heŋ naŋa buk yekeb, ‘Kadila hewen tiya,’ yeŋ haŋyen. ³ Irde wampotbe, ‘Naŋa bulun hihi geb, kigariŋ kateŋ tiya,’ yeŋ haŋyen. Deŋbe naŋkiŋ keneŋ gab kadila hewen tiya ma kigariŋ kateŋ tiya goyen keŋkela nurde haŋyen. Goyenbe gayenter niŋ mar goke teŋbe Al Kurun belej mata forok yirde hi goyen daniŋ geb yeneŋ bebak ma teŋ haŋ? ⁴ Deŋ gayenter niŋ marbe mata bulun teŋ Al Kurun harhoktiŋ unen haŋ geb, mata tiŋeŋ kurayen kurayen goke po naŋkeneŋ haŋ. Goyenbe kura kinniŋ yekeb Yona hitte mata forok yiriŋ* go gwahade goyen po kame dikala direŋ,” yinenbe mel goyen yubul teŋ hoyande kuriŋ.

*Farisi marya Sadusi maryat saba bulun
(Mak 8:14-21)*

⁵ Be, fe ala kurun go warde siŋa kurhan kwamiŋya goyenbe komatmiŋ go biŋ sir yekeb beret kura ma yade ga kwamiŋ. ⁶ Be, Yesu belej Farisi marya Sadusi marya goke komatmiŋ goyen, “Keŋkela heŋ hinaŋ ko. Moŋgo mel gote yis belej bulun diryen geb,” yinyiŋ. ⁷ Gwaha yinkeb komatmiŋ belej, “Beret kura ma yad wayhet geb, gogo dina,” yeŋ yiŋgeŋ uliŋ kadom mere gird tiyamiŋ. ⁸ Komatmiŋ go mere kusa irde hike yeneŋbe, “Daniŋ dindikeŋ uliŋ beretniniŋ

* **16:4:** Yonabe wawuŋ karwo makaŋ dapŋa kurun miliŋ gote biŋ bana heŋbe sopte siŋare katyiŋ. Gobe Yesu kamiŋde mat yereŋkek heke sopte huwariŋ gote tuŋaŋeŋ.

miŋmonŋ yeŋ haŋ? Deŋbe ne niŋ ma hekken nurde haŋ? ⁹ Muŋ kura ma po bebak teŋ haŋ? Beret siptesoŋoŋ al 5,000 namiŋ gote dikŋeŋbe tiri dahade maŋiŋ yirtek hamiŋ? ¹⁰ Goyen moŋ kenem beret 7 goyen al 4,000 naŋ gote dikŋeŋ yade tiri dahade maŋiŋ yirtek haŋ? ¹¹ Farisi marya Sadusi maryat sababe yis beleŋ palawa bana hilyaŋ kutiŋ yara al hoyaŋ kuruŋ gote dufay buluŋ yirde hi goke diŋeŋ hime. Beret niŋ ma yeŋ hime gayen daniŋ geb bebak ma teŋ haŋ? Niŋgeb sopte diŋeŋ hime, Farisi marya Sadusi maryat yis beleŋ buluŋ diryeŋkek geb, keŋkela heŋ hinayiŋ,” yinyiŋ. ¹² Be, gwaha yinke gab, “Yis beret bana irde haŋyen goke ma diŋeŋ hi. Farisi marya Sadusi maryat sababe yis yara goke hayhay dirde hi,” yeŋ nuramiŋ.

*Yesu, gebe Mesaia
(Mak 8:27-30; Luk 9:18-21)*

¹³ Be, Yesu go komatmiŋya naŋa bana go tubul teŋ kuŋ Sisaria Filipai taun binde binde heŋ heŋbe gusuŋaŋ yiryiŋ. “Ne Al Urmiŋ gayen gake al hoyaŋ beleŋ ganuŋ yeŋ haŋ?” yinyiŋ. ¹⁴ Irkeb wol heŋbe, “Al kura beleŋ gebe Yon Baptais yeŋ haŋ. Munaj kura marbe Elaia giŋeŋ haŋ. Kurabe Yeremaia ma Al Kuruŋyen mere basaj mar hoyaŋ kura goyen giŋeŋ haŋ,” inamiŋ. ¹⁵ Irkeb, “Munaŋ deŋ gayenbe nebe ganuŋ yeŋ nurd nuneŋ haŋ?” yinyiŋ. ¹⁶ Irkeb Saimon Pita beleŋ, “Gebe Mesaia, Al Kuruŋ gwahader hitiŋ al gote Urmiŋ,” inyiŋ. ¹⁷ Gwaha inkeb, “Mere gobe Nanne Al Kuruŋ saŋiŋ miŋyaŋ al gore giŋke gab gago yaha. Al kura beleŋ ma mere goyen momoŋ gira. Niŋgeb

Al Kurun belen guram girde sanin giryen. ¹⁸ Gebe ne nin dufayge hora yara taren irha geb, Pita ginen hime. Ningeb hora go hendebe nere alya bereya yeren. ¹⁹ Irde Al Kurunyen alya bereya doyan yird yird sanin goyen ge gunen. Ningeb ge belen igin yawayinbe Al Kurun wor igin yiyyen. Irde ge belen bulun yawayinbe Al Kurun wor bulun yiyyen,” inyin. ²⁰ Gwaha inenbe tumnande komatmin goyen, “Al hoyan kura hitte ne nin yen, ‘Yenbe Mesaia,’ ma yinnayin,” yinen utan yiryin.

*Kamde kamdemin ge kawan tagalyin
(Mak 8:31–9:1; Luk 9:22-27)*

²¹ Be, goyenter mat komatmin yago goyen kawan po, “Nebe Yerusalem kwen. Kumekeb Yuda marte doyan mar parguwakya Al Kurun dolon ird ird mata doyan marte karkuwan yabe Moseyen saba marya belen bulun bulun nirde mununke kamen. Goyenpoga kamen goyen yerenkek hekeb huwaren,” yinyin. ²² Irkeb Pita belen mere go nurdeb yen mun po tapat irdeb inen tenbe, “Doyan Al Kurun, gwaha ma tiyayin. Mata gobe ge hitte ma po forok yiyyen geb,” inyin. ²³ Irkeb fulgan kan Pita kenenbe, “Satan, hoyan kwa! Gebe belenne pet ten ha geb. Dufay gobe Al Kurunyen mon, alyen dufay po geb,” inyin.

²⁴⁻²⁵ Gwaha tenbe komatmin yago goyen gaha yinyin: “Al kura gama nirde kanduk yenen yingen ge kafura hen harhok nunyen al gobe kame tonenbe kanduk kinyen. Munan al kura ne gama nirde kamde kamde nin ma kafura hen kanduk kurun ten ulin misin katen hiyen al gobe

tonenbe igiñ hiyen. Niñgeb al kura ne gama nire yenbe megen niñ dufayya mataya harhok yunyen. Irdeb kanduk yenen hiyen gega, yingen ge ma nurde gama po nirde hiyen. ²⁶ Al kura megen niñ samuñ budam yade denem yañ hiyyen gega, al gobe Al Kurunñ diliñdeb kamtiñ yara hiyyen gobe daha tiyyen? Gobe igiñ moñ, bulun wor po. Niñgeb megen niñ samuñ kura teñ gore Al Kurunyen bearar bana hiyen al gob epte ma damu teñ tumulgañ titek. ²⁷ Ne Al Urmiñ gab kamebe Nanne Al Kurunyen sañiñ turuñ yañ goyen manañ katen. Goya goyenbe miyoñmiñya kattek. Irdeb alya bereyat matamiñ dahade dahade goyen gote muruñgembe gwahade po yunen. ²⁸ Goyenpoga den gar hañ gayen kurabe ma kamdeya ne Al Urmiñ gare Al Kurunyen tarende alya bereyamiñ doyañ yirde hen goyen kennayin. Mere gabe fudinde wor po dinen hime,” yinyin.

17

Yesu uliñ hoyañ hiriñ (Mak 9:2-13; Luk 9:28-36)

¹ Be, naña fay 6 kamereb Yesu belen Pita, Yemsyabe kuliñ Yonya po yade dugu kurunde kura gor hurkamiñ. ² Gor henbe Yesu go mel gote diliñ mar po uliñ hoyañ hiriñ. Dinsokdebe naña timiytiñ yara hiriñ. Uliñ umña kerde hinhin go wor faykek wor po hiriñ. ³ Gwaha tikeyab diliñ mar po Moseya Elaiaya forok yen Yesuya mere teñ hinhan. ⁴ Irkeb Pita belen Yesu goyen, “Doyañ Al Kurunñ, gar gabe nen hitek gasuñ igiñ muñ wor

po. Niñgeb ge belen ok yekeb den al karwo hitek hen hen gasuñ kura yiren. Kurabe ge niñ, kurabe Mose niñ, munan kurabe Elaia niñ,” inyiñ.

⁵ Mere gwaha ten hikeyabe kigariñkin faykek wor po kura gore wan aw yuriñ. Irkeb al melak kura gagap bana goreb, “Al gabe Urne. Yenbe bubulkuñne wor po, yen ge bener mat amanen wor po nurde hime. Niñgeb yende mere po nurde gama irde hinayiñ,” yiriñ.

⁶ Be, Yesuyen komatmiñ belen mere go nurdeb kafura wor po hen biñ tadam mat megen katamiñ. ⁷ Gega Yesu belen wan yanardeb, “Kafura hen ma, huwarnañ!” yinyiñ. ⁸ Gwaha yinke nankenenbe Yesu unkuñen po hike kenamiñ. Al hoyanbe hubu.

⁹ Be, dugure gor mat katen henyabe Yesu belen mel go saba yirde, “Hañka det kenhañ gayen gake al hoyan kura momon ma yirnayiñ. Ne Al Urmiñ gayen kameñde mat sopte huwarneke gab igiñ tagalnayiñ,” yinyiñ. ¹⁰ Irkeb mel gore, “Daniñ geb Moseyen saba mar belen Elaia wa wake gab Mesaiabe kame wayyen yen hanyen?” yen gusuñan iramiñ. ¹¹ Irkeb, “Elaia wa mehen hen det sope irke gab Mesaia wayyen yen hanyen gobe fudinde. ¹² Niñgeb Elaiabe bikken wayuñ. Goyenpoga alya bereyabe keneñ bebak ma tiyañ. Irde yingende dufay po gama irde bulun bulun irde mayke kamuñ. Mel goreb yen iran gwahade goyen po ne Al Urmiñ gayen wor gwahade po nirnayiñ,” yinyiñ. ¹³ Irke gab, “Yon Baptais niñ diniñ hi,” yen bebak tiyamiñ.

*Diriņ unġuram yaņ sope iryiņ
(Mak 9:14-29; Luk 9:37-43a)*

¹⁴ Be, mel go dugure mat kateņ al gabu kuruņ iramiņde gor forok yekeb al kura gore Yesu hitte waņ diliņ mar dokolhoņ yuguluņ teņbe, ¹⁵ “Doyaņ Al Kuruņ, urne bunineņ irde faraņ ura. Bu toneņ miņyaņ geb, uliņ misiņ kuruņ kateņ hiyen. Kurareb kak alare kateņ hiyen. Kurareb fe alare kateņ hiyen. ¹⁶ Komatge yago hitte tawayhem gega, sope ma irhaņ,” inyiņ. ¹⁷ Irkeb, “Deņ gayenter niņ marbe dahade niņgeb Al Kuruņ niņ dufaytiņ muņ kura saņiņ ma irde haņ? Tonanțiņ saņiņ wor po, saba dirmaņ dirmaņeņ. Gayak ga ma denya hityen gega, hako po haņ. Diriņ go tawanaņ,” yinyiņ. ¹⁸ Irdeb diriņ go teņ wakeb unġura diriņ bana hinhin go ineņ teņ takira tike kat kuriņ. Irkeb goyare po igiņ hiriņ.

¹⁹ Be, go kamereb yeņ yunġureņ po heņ gab komatmiņ beleņ, “Daniņ geb neņbe unġura go ma takira tihit?” inamiņ. ²⁰⁻²¹ Irkeb, “Deņ unġura takira ma tahaņ gobe Al Kuruņ niņ hekkeņ nurde haņ gobe kuruņ moņ. Niņgeb fudinde wor po dinhem. Al Kuruņ niņ dufaytiņ hek irde haņ goyen mastet he bilmiņ dirneņ muņ gwahadebe megen gar det kura irnayiņbe meteneņ ma diryeņ. Niņgeb dugu gayen ‘Gar mat siņgir teņ iror kwa!’ inkeb gwahade po tiyyeņ,” yinyiņ.*

²² Be, Yesuya komatmiņa gabu heņbe tumņaņ Galili naņa bana kwamiņ. Irdeb Yesu beleņ, “Ne

* **17:20-21:** Asaņ hoyanġebe gahade hi: 21 Goyenbe unġura gwahade goke dindiken biņge kutņa irde Al Kuruņ gusuņaņ irde takira tike gabe kat kuyeņ.

Al Urmiŋ gabe mununtek al haniŋde nernayin. ²³ Irke mununkeb kamenŋ gega, yerenkek hekeb Al Kurunŋ beleŋ sopte nisaŋ heke huwareŋ,” yinyin. Gwaha yinkeb komatmiŋbe kandukneŋ wor po nuramiŋ.

Al Kurunyen ya balem gote teks

²⁴ Be, gwaha teŋ kuŋ kuŋbe Kapeneam taunde forok yamiŋ. Irkeb Al Kurunyen ya balem niŋ teŋ teks yad yad mar beleŋ Pita hitte waŋbe, “Tisage gayen Al Kurunyen ya balem niŋ teŋ teks kura yerde hiyen?” inamiŋ. ²⁵ Irkeb, “Gwaha,” yinyin.

Be, gwaha yinenbe Yesu hinhin ya go biŋde hurkukeb goyare po Yesu beleŋ, “Saimon, megen niŋ doyaŋ mar karkuwaŋ yuntek teks kurayen kurayen gobe ganuŋ mar beleŋ gab yerde hanyen? Urmiŋ yago beleŋ yerde hanyen ma al hoyan beleŋ yerde hanyen? Gebe dahade nurde ha?” inenŋ gusuŋaŋ iryin. ²⁶ Irkeb Pita beleŋ wol heŋbe, “Al hoyan beleŋ yerde hanyen,” inyin. Irkeb, “Gwaha, doyaŋ mar karkuwaŋ gote dirneŋ weŋbe naniŋ yagonŋ teks ma yerde hanyen geb. ²⁷ Goyenpoga teks ma yertekeb dufaymiŋ buluŋ henak geb fete kuŋ funal temeyayin. Irde dapŋa meheŋde wor po tawayinŋ gobe mohonŋ takila teŋ teks yertek hora kura kenayin. Hora go tukuŋbe neya geyat teks kerayin,” inyin.

18

Ganuŋbe deŋem kurunŋ wor po hiyyeŋ?

(Mak 9:33-37; Luk 9:46-48)

¹ Be, goya goyenbe komatmiŋ hoyan beleŋ Yesu hitte waŋbe, “Ganuŋbe Al Kurunŋ beleŋ alya

bereyamin doyaŋ yirde hire gor niŋ deŋem yaŋ wor po hiyyeŋ?” yeŋ gusunaŋ iramin. ² Irkeb diriŋ diriŋeŋ kura inke komatmin yago hinhande gor waŋ huwaryiŋ. ³ Irkeb Yesu beleŋ, “Fudinde wor po dineŋ hime. Diriŋ gahade gayenbe yiŋgeŋ al deŋem yaŋ heŋ heŋ niŋ ma nurde haŋyen. Gwahade goyen po al kura yiŋgeŋ al deŋem yaŋ heŋ heŋ niŋ ma nurde haŋ marbe Al Kurun beleŋ yende alya bereya doyaŋ yirde hi bana goŋ igiŋ hurkunayiŋ. ⁴ Niŋgeb al kura diriŋ gahade ga hinayiŋ marbe Al Kurun diliŋde deŋem yaŋ wor po yeŋ yinyeŋ. ⁵ Irde al kura deŋem moŋ diriŋ gahade gayen ne niŋ teŋ gargar iryeŋbe ne gayen niryen.

⁶ “Goyenbe al kura diriŋ saŋiŋ miŋmoŋ gahade gayen ne niŋ dufaymin tareŋ irtiŋ goyen al kura beleŋ mata buluŋ tike keneŋ gama irde buluŋ tiyyeŋbe mata buluŋ miŋ uryeŋ al gobe muruŋgem buluŋ wor po tiyyeŋ. Niŋgeb al hoyan gama ma irkeya mata buluŋ miŋ uryeŋ al gobe hora kurun kura teŋ biŋiŋde feŋ teŋ makaŋ alare temeyke kamyen. Gogab gote muruŋgem buluŋ wor po goyen ma tiyyeŋ.

⁷ “Mata buluŋ titek dufaybe al biŋyaŋ hugiŋeŋ forok yeŋ tunan yurke kateŋ haŋyen. Niŋgeb megen niŋ mar dufay buluŋ go teŋ haŋ gobe Al Kurunyaŋ bearar bana haŋ geb goke bunineŋ nurde hime. Dufay buluŋ gobe hugiŋeŋ al biŋyaŋ forok yeŋ hiyeŋ gega, al kura dufay go gama irde mata tinayiŋ mar gobe Al Kurunyaŋ bearar bana hinayiŋ geb goke bunineŋ nurde yuneŋ hime. ⁸ Niŋgeb hange kura beleŋ girke mata buluŋde

katayinbe hange go walde temeyayin. Monjo hange unƙurenj gore girkeɓ ulge tumɗanƙ kak huginɗen hitinɗe gor kutek goke tenbe hange gore bulunɗe gukutek go po walde temeyayin. Irdeb igin hange kurhan titmin manan gasun iginɗe kwayin. Irde kahanɗe wor gwaha girkeɓ go wor gwahade po irayin. Irdeb iginɗe kwayin. ⁹ Irde delge kurhan beɓen girke mata bulunɗe katayinbe delge go marde temeyayin. Monjo delge unƙurenj gore girkeɓ ulge tumɗanƙ kak alare kutek goke tenbe delge gore bulunɗe gukutek go po marde temeykeɓ igin delge kurhan titmin manan gasun iginɗe kwayin,” yinyin.

*Sipsip duwi hitin gote maya mere
(Luk 15:3-7)*

¹⁰⁻¹¹ Irde sopte po gaha yinyin: “Be, al kura denem mon dirin gahade gayenbe Al Kurunyen miyon beɓen doyan yirde han. Irde miyon gobe Al Kurun sanin minyan gote dilin mar huginɗen han. Niɗgeɓ al gahade goyen denem mon yen ingogaha ma yirde hinayin.*

¹² Be, ga nurnan! Al kura sipsipmin 100 hinayin. Irke unƙurenj kura kadom yubul ten hoyanɗe kuyen. Irkeɓ gonmin yen tubul tiyyen? Mon! Sipsipmin 99 go yukun donɗonɗe kura gor yubul tenbe kun nanƙinen. ¹³ Fudinde wor po dinen hime. Unƙurenj mun goke nanƙenen kun kun kenen tenbe aman wor po hiyyen. Munan

* **18:10-11:** Asan hoyanɗebe gahade hi: 11 Ne Al Urmin gabe alya bereya Al Kurunyen dirnen wen gega, mere ma nurde duwi hitnen tiyan goyen yumulgan tiye yen wamirin.

99 goke gwahade wor po ma nuryeñ. ¹⁴ Gwahade goyen po, Nantiñ Al Kurun sañiñ miñyañ al gobe al kura diriñ gahade gayen un̄kureñ kura Al Kurun tubul teñ kanduk bana kuñ kuñ gokeb igiñ ma nurde hi,” yiniñ.

Kadge kura bulun girkeb daha tiyayiñ?

¹⁵ Irde sopte po, “Be, kadge kura bulun bulun girkeb kuñ yeñ po hikeya gabe mata bulunmiñ goke momoñ irayiñ. Irke mere go nuryeñbe al gob sopte kadge Al Kurun urmiñ gigen̄ yara hiyyeñ. ¹⁶ Goyenbe merege ma nurke kenem al hoyañ un̄kureñ ma iraw gwahade yade ga kwayiñ. Gogab al irawa ma karwo gore merege goyen tumñañ fudinde yenayiñ. ¹⁷ Al hoyañ yukayiñ gote mere wor ma nurke keneñbe mata bulunmiñ goyen Al Kurunyen diriñ weñ hoyañ goyen momoñ yirayiñ. Yende mere wor ma po nurkeb al gobe Al Kurunyen diriñ moñ, mata bulun al yeñ keneñ hinayiñ.

¹⁸ Fudinde wor po dinen̄ hime. Al Kurunyen alya bereya doyañ yird yird sañiñ goyen den̄ dunen̄. Niñgeb den̄ belen̄ igiñ yenayiñbe Al Kurun wor igiñ yiyyeñ. Irde den̄ belen̄ bulun yenayiñbe Al Kurun wor bulun yiyyeñ.

¹⁹ Sopte dinen̄ hime. Der al iraw kura megen̄ gar hen̄ya det kuran̄ nurde dufaytiriñ un̄kureñ po irde Nanne Al Kurun tareñ miñyañ al goyen gusunañ iriryen̄be yeñ belen̄ epte irde dunyen̄. ²⁰ Gwahade niñgeb al irawa ma karwo gwahade kura, ‘Neñbe Yesuyen alya bereya,’ yeñ wañ gabu irnayiñbe ne manañ wañ yen̄ya hitek,” yiniñ.

Meten al buninen minmonyen maya mere

²¹ Be, gwaha yinkeb Pita belen wanbe, “Doyan Al Kurun, kadne kura belen bulun nirkeb wawun dahadere mata bulunmin go halde unen? Wawun 7 ma dahade?” yen gusunon iryin. ²² Irkeb, “Wawun 7 po mon. Bulun girde hikeb huginen halde po unen hayin,” inenbe ²³ mata goke maya mere mat gaha yirin: “Ningeb Al Kurun belen yende alya bereya doyan yirde hi bana gon nin matabe gahade: doyan al kura belen meten marmen horamen yawaramen go wol hena yinyin. ²⁴ Irkeb al kura doyan almin hitte hora kurun wor po tirin al goyen doyan almin hitte tawayamin. ²⁵ Gega al gobe hora kurun go epte ma wol hetek hirin geb, doyan almin gore, ‘Al gote beremya dirinmin wenya detminya goyen tumnon yukun al hoyan yunke damu tina. Irkeb hora gobe ne tewen,’ yirin. ²⁶ Irkeb meten al go dilin mar gor po dokolhon yugulun tenbe, ‘Bemel nirde ma. Horage kurun gobe wol hen gunen geb,’ inen esen mere iryin. ²⁷ Irkeb buninen kenenbe, ‘Hora go wol hen hen ge ma nurayin,’ inen tubul tike kurin. ²⁸ Goyenbe kun meten al kadam hora dirnen mun kura unke ma wol hitin al goyen kinyin. Irde hapekde tenbe, ‘Aranen horane wol hawa!’ inyin. ²⁹ Irkeb kadam go kimin mar dokolhon yugulun tenbe, ‘Bemel nirde ma yo. Horage wol hen gunen geb,’ inyin. ³⁰ Goyenbe al go buninen ma irde kadam go tagal unenbe, ‘Horane wol heke gab ten sinan irnayin,’ yinke tukun koyare keramin.

³¹ “Be, meten mar kadam belen mata go

kenenbe biñ ar yamiñ. Irdeb kuñ doyañ almiñ go mata kurun al gore tiyyiñ goyen momoñ iramiñ. ³² Irkeb doyañ al belen meten almiñ go hoy irke wakeb, ‘Geb meten al bulun. Horane epte ma wol hetek geb, esen mere nirkeb buninen girde gonmiñ ginmiñ. ³³ Ne belen buninen girde kandukge kurun go pasi irde gunmiñ gwahade goyen po, ge belen wor daniñ geb kadge gwaha ma iran?’ inyiñ. ³⁴ Doyañ al go biñ ar wor po yekeb, ‘Al go koyare kernan!’ yinyiñ. Irdeb, ‘Horane tumnañ wol heke gab tubul tike kuyen,’ yinyiñ. ³⁵ Nanne Al Kurun sanin miñyan gore den wor mata gwahade goyen po diryen. Niñgeb kadtin yago bulun dirnayan goyen bitinde mat wor po halde yunen hinayiñ. Mali hende hendem ma tinayiñ,” yinyiñ.

19

Al belen bere yakira ten mata (Mak 10:1-12)

¹ Be, Yesu go mere gwahade mat al saba yirdeb Galili naña tubul ten Yodan fe gama irde Yudia nañare kurin. ² Kun hikeb al budam gama irde kun hinhan. Irke al garbam miñyanbe sope yirke igin hen hinhan. ³ Gwaha ten hikeyabe Farisi mar kura belen tunan urnin yen wanbe, “Al kura miñ goke kuram mon berem takira tiyyen gobe Moseyen sabarebe igin yitin we?” inamiñ. ⁴ Irkeb wol henbe, “Hanƙapya wor po tikula kerdyabe Al Kurun belen al irde, bere irde iryin goyen Al Kurunyen asande katin hi gobe ma kapyan hen hanyen? ⁵ Al Kurun belen gwaha yiryin geb, goke

tenje albe naninya milinya yubul ten kuñ bere-mya gabu hiriryen. Irke al belen yenenmin iraw goyen Al Kurun dilingdebe unkuren po yinyen. ⁶ Ningebe irem gobe hoyan hoyan ma hiriryen. Unkuren po hiriryen. Gwahade geb Al Kurun belen alya bereya yade gabu yiryen gobe al belen epte ma bur yirnayin,” yinyin. ⁷ Irkeb mel goreb, “Gwahade kenem danin geb Mose belen igin bere takira ten ten asan kan unenbe takira tiyayin yirin hi?” yen gusunan iramin. ⁸ Irkeb wol henbe, “Denbe tonantin sanin wor po, mere ma nurtek goke tenbe Mose belen gwaha dinyin. Goyenbe hanƙapya wor po minde matbe gwahade mon. ⁹ Ningebe al kura berem al hoyanya ma duwan ten hikeya takira ten bere hoyan tiyyenbe Al Kurun dilingde mata bulun tiya yen kinyen,” yinyin.

¹⁰ Irkeb komatmin belen, “Be, gwahade kenem bere ma ten dulin hen hen gobe igin,” yamin. ¹¹ Gwaha yekebe, “Al berem mon dulin hitek yahan gobe al tumnan gwahade hitek mon. Al yunkuren igin gwahade po hinayin yen yirtin mar gore po gab gwahade hinayin. ¹² Al kurabe bere nin ma wor po nurde hanjen. Goyen mar gobe kurab gwahade po kawan hitin. Munan kurabe al belen po min minyan gwahade yirtin. Munan kura marbe Al Kurun belen yende alya bereya doyan yirde hi gote meten po ten hiniyen yen bere ma yade hanjen. Ningebe al gwaha titek mar po gab igin gwaha ten hinayin,” yinyin.

*Dirin muknenya Yesuya
(Mak 10:13-16; Luk 18:15-17)*

¹³ Be, dirin mukneḡ go Yesu belen hanin yerde Al Kurun gusunan irke guram yirde sanin yiri yen naninya milinya belen yawayamin. Irkeb komatmin yago belen yinen ten utan yiramin. ¹⁴ Goyenbe Yesu belenbe, “Utan yirde ma. Dirin mukneḡ go yubul tike ne hitte yawanen. Al kura Al Kurunyen al hewe yenbe dirin belen naninya milinya hitte kun kun nin kama ma hen hanen go gwahade hiyyen gab Al Kurun belen yende alya bereya doyan yird yird gobe yende hiyyen,” yinyin. ¹⁵ Gwaha yinenbe dirin mukneḡ go guram yirde yubul tenbe hoyande kurin.

Al samunmin budam

(Mak 10:17-31; Luk 18:18-30)

¹⁶ Be, gon hikeb al kura gore Yesu hitte wanbe, “Tisa, da mata igin ten gab Al Kurunya huginen hiren?” inen gusunan iryin. ¹⁷ Irkeb, “Danin geb det igin nin gusunan nirde ha? Al Kurun unkenen po ga al igin geb. Yanya huginen hen hen nin nurde ha kenem Moseyen saba goyen gama irde hayin,” inyin. ¹⁸ Irkeb al gore, “Saba damin damin nin yen ha?” inyin. Irkeb, “Al ma gasa yirke kamnain, al berem yanbe bere hoyan duwan ma irde hiyen, kawe ma tiyain, merere huwarde usi mat ma mere tiyain. ¹⁹ Irde momkeya nanakeya palap yirde meremin nurde hayin. Irde gigen ge amanen nurde hayen gwahade goyen po kadge hoyan nin wor amanen nurde hayin,” inyin. ²⁰ Irkeb al gore, “Go ninha gobe tumnande nurde gama irde himyen. Da mata wor po son hen himyen geb, goyen tiyain yen ninen ha?” yen gusunan iryin. ²¹ Irkeb, “Al

Kuruñ dilinđe al huwak wor po hewe yenbe kun samunđe kuruñ goyen al yunke damu tikeb hora go yade yukun al det niñ amu heñ hañ mar goyen yunayin. Irkeb Al Kuruñ belen nere hihi yen genke gab wañ gama nirayin,” inyin. ²² Irkeb al foñen gobe samunya detminya budam wor po geb, Yesuyen mere nurdeb binde kandukñen wor po nurdeya kurin.

²³ Gwaha tikeb komatmin yago goyen, “Fudinde wor po dinen hime. Al samunmin budam wor pobe Al Kuruñ belen yende alya bereya doyan yirde hi bana goñ hurkun hurkun gobe metenjen wor po geb. ²⁴ Dapña kuruñ kamelbe det harañ heñ heñ kutum yamen dirñen mun wor po goyen bana epte ma hurkuyen. Gwahade goyen po, al samunmin budam wor Al Kuruñ belen alya bereyamin doyan yirde hi bana goñ epte ma hurkunayin. Niñgeb det irawa goyen tunñande metenjen. Goyenbe daminbe metenjen wor po yen nurde hañ? Al samunmin budam gobe metenjen wor po geb,” yinyin. ²⁵ Irkeb komatmin yago belen mere go kukuwamñen wor po nurdeb, “Niñgeb ganun mar po gab Al Kuruñ belen yawaryen?” inamin. ²⁶ Irkeb mel go yenenbe, “Mata gobe alyen tareñdebe epte moñ. Goyenpoga Al Kuruñyen tareñdebe det kura metenjen minmoñ,” yinyin.

²⁷ Irkeb Pita belen, “Be, nenbe detninin tunñan yubul ten gama girtin. Niñgeb kamebe da yawartek?” inyin. ²⁸ Irkeb gaha yinyin: “Fudinde wor po dinen hime. Nalu funande Al Kuruñ belen megenya nanñkinya gergen yiryen nature goyenter

ne Al Urmiñ gabe sañiñne turñuñ yañya maroro gasuñner keperde alya bereyane doyañ yireñ. Irde deñ 12 gama nirde hañ mar gayen manañ maroro gasuñtiñyañ keperde nere alya bereya tumñañ, al miñ 12 Israel yineñ hinayiñ goyen doyañ yirnayiñ. ²⁹ Irde al kura nere alya bereya niñ teñ yamiñ, haymiñ, babam, itiñ, kuliñ, naniñ, miliñ, diriñmiñmiñyabe metenmiñya yubul tinayiñbe gote muruñgembe budam wor po yawarnayiñ. Irde Al Kurunya hugiñeñ heñ heñ goyen manañ yende hiyyeñ. ³⁰ Goyenpoga al kura yingeneñ ge yeñ, ‘Nebe gwaha gwaha timiñ geb, gote muruñgem kurun al hoyande gote folek wor po teweñ,’ yiyyeñ al gobe diriñeñ muñ tiyyeñ. Munañ al kura nebe hako hime yeñ nurde hiyeñ al gobe muruñgem kurun wor po al hoyande gote folek tiyyeñ. Niñgeb al meheñde hiyeñ al gobe kame hiyeñ. Munañ kame hiyeñ al gobe meheñde hiyeñ,” yiniñ.

20

Wain meten marte siraw mere

¹ Be, meremiñ goke teñbe siraw mere matbe gaha yiniñ: “Al Kurun beleneñ alya bereya doyañ yird yird mata kurabe gahade: al deñem yañ kura wain metenñer al yawarmeke wañ metenñ tinañ yeñbe wampot muñ po kuriñ. ² Kuñbe, ‘Hañka nañkahal metenñ tinayiñbe denari* unñkureñ unñkureñ duneñ,’ yiniñ. Irkeb igiñ yeñ

* **20:2:** Denari: Al beleneñ wampot mat metenñ teñbe wawuñbana nanañ sul yeke bada heñbe gote hora tiyyeñbe denari unñkureñ tiyyeñ.

nurdeb metenḡde kwamiḡ. ³ Be, kuḡ 9 kilok naḡa gwahade hekeb wain metenḡ miḡ al go gabu irde hanyen gasunḡde gor kuḡ al hoyanḡ duliḡ metenḡ miḡmoḡ hinhan goyen yinyiḡ. ⁴ Irdeb, ‘Deḡ wor kuḡ metenḡner metenḡ tinaḡ. Irkeb hora gwahade igiḡ duniḡ yeḡ nurde hime goyen duniḡ,’ yinyiḡ. ⁵ Irkeb kwamiḡ. Al go sopte po naḡa baḡkahalya 3 kilok wawunḡbanaya wor kuḡ metenḡ mar yad yerke metenḡmiḡde kuḡ metenḡ tiyamiḡ. ⁶ Be, 5 kilok wawunḡbana wor po kuḡbe al hoyanḡ kura metenḡ miḡmoḡ duliḡ hike yinyiḡ. Irdeb, ‘Daniḡ duliḡ metenḡ miḡmoḡ wor po hike naḡa hubu hewenḡ tiya?’ yinyiḡ. ⁷ Irkeb, ‘Moḡ, al kura belenḡ metenḡ kura ma dunkeb gago duliḡ hite,’ inamiḡ. Irkeb, ‘Deḡ mananḡ kuḡ wain metenḡner metenḡ tinaḡ,’ yinyiḡ.

⁸ “Be, ḡumtuk urkeb metenḡ miḡ al goreb metenḡmiḡ doyanḡ ird ird al goyen gaha inyiḡ. ‘Metenḡ tahaḡ mar goyen hoy yirde murumgem yunayiḡ. Funanḡ wor po waḡ metenḡ tahaḡ mar go wa damu yirayiḡ. Irde kuḡ kuḡ funanḡbe wampot muḡ yeḡ wa wayhanḡ mar goyen damu yirayiḡ,’ inyiḡ. ⁹ Funanḡ wor po wayamiḡ mar gobe denari unḡkurenḡ unḡkurenḡ yawaramiḡ. ¹⁰ Niḡgeb go yenenḡbe wampot mat metenḡ tiyamiḡ mar gobe hora hende wor po tiniḡ tihit yeḡ nuramiḡ. Gega yeḡ mananḡ denari yunḡkurenḡenḡ po yawaramiḡ. ¹¹ Horamiḡ go yadeb metenḡ miḡ al goke igiḡ ma po nurde biḡ ar yamiḡ. ¹² Irde, ‘Al gaya-muḡ ga waḡ metenḡge tahaḡbe nenḡ hora tihit gahade po tahaḡ. Nenḡbe wampot mat naḡa misiḡ ma yeḡ metenḡ kurunḡ wor po tihit,’ inamiḡ.

¹³ Gega meten min al gore huwarde kuramin kura goyen, ‘Kadne, al hoyan po igin yirde, denbe bulun ma dirhem. Denbe igin denari unkuřen goke meten titek ma yahan?’ ¹⁴ Dufaynerbe al kamere meten ten nunhanja denyabe murungem tunande dunen yen nurhem. Niᅅgeb horatin yade kunan. ¹⁵ Horabe nigen geb daha wet kura ire yenbe gwahade po iren. Gega daniᅅ geb al buninᅅ yirde faran yurhem goke igin ma nurhan?’ yinyin. ¹⁶ Al Kurun belen yende alya bereya doyan yird yird matabe gwahade geb, al kame hiyen al gobe mehenᅅ hiyen. Munan mehenᅅ hiyen al gobe kame hiyen,” yinyin.

*Yesu belen kamde kamdemin ge sopte tagalyin
(Mak 10:32-34; Luk 18:31-34)*

¹⁷ Be, Yesu go Yerusalem kun henyaᅅbe komatmin 12 goyen po yapat yiryin. ¹⁸ Irdeb, “Neᅅbe Yerusalem kun hite gago. Irde ne Al Urmin gayen al kura belen tagal nunkeb Al Kurun dolon ird ird mata doyan marte karkuwanya Moseyen saba marya belen nade fere nirnayin. ¹⁹ Yen belen mayke kami yenbe al min hoyan Yuda mar mon hitte nad nerke kwen. Irkeb yen belenbe giwgiw nirde nusulak tenbe kuruse hende mununke kamen. Gega kameᅅde mat kun yerenkek hekeb sopte huwaren,” yinyin.

*Sebedi beremde gusunᅅan
(Mak 10:35-45)*

²⁰ Be, Sebedi berembe urmin waran yade Yesu hitte wayamin. Wanbe dokolhon yugulun tenbe gwaha nirwon yen Yesu gusunᅅan iryin. ²¹ Irkeb,

“Daniɗ wor po nurde ha?” inyiɗ. Irkeb bere gore, “Igiɗ yeɗ keneɗbe ge beɗeɗ alya bereya doyaɗ yirde hayiɗde gorbe urne waraɗ gayen ketalger heɗ tumɗaɗde al doyaɗ yirde hinayiɗ,” yiriɗ. ²² Irkeb Yesu beɗeɗ, “Miɗ gwahade niɗ gusaɗaɗ hihit yeɗ nurdeya ma gusaɗaɗ hahan geb. Kanduk kurun tewen ten hime gayen epte tenayiɗ?” yinyiɗ. Irkeb, “Epte tetek,” inamiɗ. ²³ Irkeb Yesu beɗeɗ, “Fudinde kandukbe tiriryen gega, neya heɗ al doyaɗ yird yird niɗ gusaɗaɗ nirhaɗ gobe ne beɗeɗ igiɗ ma bulun ma diɗeɗ. Ne ketalner kurhan kurhan heɗ deɗem yaɗ heɗ heɗ gobe Nanne beɗeɗ hakot al basiɗa yirtiɗ haɗ gore yawarnayiɗ,” yinyiɗ.

²⁴ Be, komatmiɗ hoyan 10 gore mere go nurdeb ire itinya goke biɗ ar yamiɗ. ²⁵ Irkeb Yesu beɗeɗ tumɗaɗ hoy yirdeb gaha yinyiɗ: “Megen niɗ doyaɗ mar karkuwanbe al kafura yirkeb yeɗ yufukde po hanɗen. Irde yende meten marmin manan deɗniniɗ yaɗ hihit yeɗ nurdeya al kanduk yunen hanɗen. ²⁶ Gega deɗbe gwahade moɗ. Al kura deɗ kahal bana gayen al kurun hewe yeɗ nuryen gobe yiɗgeɗ ge ma nurde dende meten al po hiyyen. ²⁷ Niɗgeb deɗ bana al kura doyaɗ al hewe yeɗbe yiɗgeɗ ge ma nuryen. Irde deɗ ge po dufay heɗ dende meten al po hiyyen. ²⁸ Gwahade niɗgeb, ne Al Urmiɗ gayen wor al beɗeɗ igiɗ igiɗ nirnan yeɗ ma katmiriɗ. Ne beɗeɗ po al igiɗ yire yeɗ katmiriɗ. Irdeb alya bereya budam gote mata bulunmiɗ gote murunɗem yiɗgeɗ yawartek goyen ne beɗeɗ yawaren goke ten darine wok irde kameɗ yeɗ katmiriɗ,” yinyiɗ.

*Al irawa diliŋ titmiŋ naŋkenaryum
(Mak 10:46-52; Luk 18:35-43)*

²⁹ Be, Yesuya komatmiŋya goya Yeriko taun tubul teŋ kuŋ hikeyabe al buda kurunŋ gama irde kuŋ hinhan. ³⁰ Goya goyenbe al irawa diliŋ titmiŋ kura belenŋ siŋare keperde hinaryum. Irde Yesu gago waŋ kuŋ hi yinke nurdeb, “Doyaŋ Al Kurunŋ, Dewit Urmiŋ, bunineŋ nurd duneŋ faraŋ dura be!” yeŋ hokde po gwaha inaryum. ³¹ Irkeb al buda gore nurde yineŋ teŋbe, “Balmiŋ hiri!” yinamiŋ gega, ug po, “Doyaŋ Al Kurunŋ, Dewit Urmiŋ, bunineŋ nurd duneŋ faraŋ dura be!” inaryum. ³² Irkeb Yesu go tek yeŋ huwarde hoy yirdeb, “Daha dirwoŋ yeŋ nurde har?” yinyiŋ. ³³ “Doyaŋ Al Kurunŋ, naŋkenyewoŋ yeŋ nurde har.” inaryum. ³⁴ Be, Yesu gob bunineŋ wor po yenenbe diliŋyaŋ sisaŋ yurkeb goyare po naŋkeneŋ gama irde yeŋ kuŋ hinhin belenŋ goŋ kwaryum.

21

*Yesu Al Kurunŋyen ya balem bana hurkurinŋ
(Mak 11:1-11; Luk 19:28-40; Yon 12:12-19)*

¹ Be, Yesuya komatmiŋya go Yerusalem binde binde hamiŋ. Tiyuŋ kura deŋem Betfage gobe Olip dugu dabayiŋ belenŋ hinhin. Be, Yesube gor forok yeŋbe komatmiŋ irawa kura hulyanŋ yirdeb, ² “Kuri. Kuŋ tiyuŋ iroyenter forok yeŋbe doŋki al diriŋ foŋeŋ kura gor miliŋya yeŋ titiŋ yenenbe yugu teŋ yade wayiryenŋ. ³ Al kura belenŋ goke daha wet kura dinkeb, ‘Doyaŋ Al Kurunŋ belenŋ goke yihi,’ inkeb yubul teŋ dunkeb yade

wayiryen,” yinyiñ. ⁴ Yesu go tiyyiñ gobe bikken Al Kurunyen mere basañ heñ heñ al belen yiriñ goyen fudinde forok yen yen ge tiyyiñ. Merebe gahade:

⁵ “Yerusalem* niñ mar goyen gaha yinnañ.
 ‘Doyañ Al Kurunñiñ deñ hitte wañ hi.
 Al gobe yiñgeñ ge turuñ turuñ ma teñ hi.
 Niñgeb al gobe doñki hende wañ hi.
 Doñki gobe foñeñ,’ yinnayin,” yitiñ hi.
Aisaia 62:11; Sekaraia 9:9

⁶ Be, Yesu komatmiñ go kuñbe yinyiñ gwahade po tiyaryum. ⁷ Doñki foñeñya miliñya go yawakeb komatmiñ belen uliñhormiñ yugu teñ go hende ugamkeb hurkuñ kipiryiñ. ⁸ Al budam Doyañ Al Kurunñiniñ waya yen uliñhormiñ yugu teñ belen yañ ugamamiñ. Kurabe patila haniñ yufuñ tiyamiñ goyen belenyañ sar irde tukamiñ. ⁹ Al kurabe meheñ hekeb kurabe kame hamiñ. Irdeb tumñañ ala turuñ iramiñ.

“Dewit Urmiñ turuñ irniñ ko.”

“Doyañ Al Kurunyen deñemde wañ hi gobe Al Kurun belen guram irde sañiñ iryen!” *Tikiñ 118:25-26*

“Al Kurun turuñ irniñ ko.”

¹⁰ Be, Yesu go kuñ Yerusalem forok yekeb taunde gor niñ mar gob tumñañ hurkuñkat wor po teñbe, “Al gab ganuñ?” yamiñ. ¹¹ Irkeb al buda goreb, “Al gabe Yesu Al Kurunyen mere basañ al. Yenbe Galili naña bana goñ niñ tiyuñ Nasaret niñ al,” yinamiñ.

* **21:5:** Deñem hoyañbe Saion.

*Yesu beley Al Kurunyen ya balem harañ hirinj
(Mak 11:15-19; Luk 19:45-48; Yon 2:13-22)*

¹² Be, Yesu go Al Kurunyen ya balem koya beley po milgu irtinj bana gonj gabu gasunj kurunde hurkunbe al buda gor det damu tenj hinhan go kwep kwep yirde yakira tiyyinj. Irde hora kapyanj hej hej mar beley hora yirtinj gasunya damure ninj kalyingji yawanj yerdeb keperde hanyen gasunya goyen yade yabolonj tenj yunyinj.†
¹³ irdeb, “Al Kurunyen mere asande katinbe gahade: ‘Ya gabe ne mere nird nird gasunj. Gar wanj gabu irde mere nird nird ya hiyyen,’ gwahade yitinj hi. Goyenbe denj beleybe tenj ‘kawe marte gasunj’ irde hanj,” yinyinj.

¹⁴ Be, Yesu go ya balem bana gonj po hikeya al dilinj titminya kahanj simsimanya goyen yen hitte wake sope yiryinj. ¹⁵ Irkeb dirinjbe bana gonj, “Dewit Urminj turunj irninj ko!” yenj hewhow tenj hinhan. Irkeb Al Kurunj doloj ird ird mata doyanj mar pris buda gote karkuwanminya Moseyen saba maryabe Yesu beley mata tinen forok yiryinj goyen kenaminj, irde dirinj beley Yesu goyen Dewit Urminj yenj turunj iraminj goyen nurdeb binj ar wor po yaminj. ¹⁶ Irdeb wanj Yesu gusunanj iraminj. “Gebe dirinj mere tenj hanj gayen nurde ha?” inkeb wol hejbe, “Gwaha, nurde hime. Denjbe dirinj beley mata tenj hanj goke Al Kurunyen asandeb, ‘Dirinj kahanyanj hitinja dirinj mamure ninja beley turunj nird nird ninj gitik yirtinj,’ yitinj

† **21:12:** Hora kapyanj hej hej marbe Roma gabmanyen horaya Yuda marte hora goyen al beley yenj yunke Al Kurunyen ya balemde ninj hora tenj wolminen al go yunke gab Al Kurunj galak irninj yenj ya bana gonj yerde hanyen.

gobe kapyañ ma heñ hañyen?” yiniñ. ¹⁷ Gwaha yinenbe yubul teñ Betani taunde kuñ go wawuñ gobe gor hinhin.

*Yesu belen fik he karan uryiñ
(Mak 11:12-14,20-24)*

¹⁸ Be, fay urkeb wampot muñ Yesu go mulgañ heñ Yerusalem kuñ heñyabe belen biñge iryiñ. ¹⁹ Irkeb fik he yuwalñen digula urtiñ goyen belen siñare hike kenenbe iginen minyañ daw yeñ kuñ kinyiñ. Kuñ miñde mat kinyiñbe iginen miñmoñ, yuwalñen belen po aw urtiñ. Gwahade kenenbe Yesu belen he goyen, “Tebañ iginen ma hawayiñ,” inen karan uryiñ. Irkeb goyare po gwilgwaliñ.

²⁰ Be, Yesuyen komatmiñ go fik he goyen goyare po kamtiñ heke kenenbe diliñ fot yamiñ. Irdeb, “Dahade geb he gob bemel po gwilgwaliñ ira?” yamiñ. ²¹ Irkeb Yesu belen wol heñbe, “Fudinde wor po dinen hime. Al Kurun niñ hekkeñ nurde dufay irawam ma irnayiñbe ne belen fik he irhem gwahade igiñ tinayiñ. Irdeb dugu wor, ‘Kuñ makañ alare kurka,’ inkeb gwaha po tiyyeñ. ²² Al Kurun niñ hekkeñ nurde det kurañ gusunañ irkeb tumñañ dunyen,” yiniñ.

*Yesu tareñmiñ ge gusunañ iramiñ
(Mak 11:27-33; Luk 20:1-8)*

²³ Be, Yesu go Al Kurunyen ya balem koya belen po milgu irtiñ bana sawsawa al gabu irde hañyende gor hurkuñ al saba yirde hinhin. Irkeb pris buda gote karkuwanmiñya Yuda marte doyañ mar parguwakya belen Yesu hitte wañbe, “Mata teñ ha kurun gayenbe da tareñde teñ ha? Ganun belen igiñ gwaha teñ hayiñ ginun?”

inamiņ. ²⁴ Irkeb, “Ne wor gusuņaņ kura direņ tihim gayen wol henayiņ. Irke gab nebe goyen saņiņde teņ hime yeņ momoņ direņ,” yinenbe gaha yinyiņ. ²⁵ “Yon Baptais belen al baptais yirde hinhin gobe Al Kurunyen tareņde ma alyen tareņde? Momoņ nirnaņ,” yinyiņ. Irkeb mel goyen yingēn uliņ mere sege irdeb, “Daha intek? Al Kurunyen saņiņde intek gob, ‘Munaņ daniņ sabamiņbe fudinde yeņ gama ma irde hinhan?’ dinyeņ. ²⁶ Munaņ alyen saņiņde yetek gob al buda kurun gabe Yon Baptaisbe Al Kurunyen mere basaņ al yeņ nurde haņ geb, biņ ar yeke mudunnayiņ,” yamiņ. ²⁷ Irdeb mel goreb, “Go ma nurde hite,” inamiņ. Irkeb Yesu belenbe, “Ne wor al gore ok ninke teņ hime ma dinēņ,” yinyiņ.

Al kurat urmiņ waraņ gote maya mere

²⁸ Irdeb Yesu belenbe, “Ga dinēņ tihim gayen dahade nurnayiņ goyen tagalke nureņ. Be, al kura urmiņ irawam yaņ hinhin. Kurarebe urmiņ kurun hitte kuņbe gaha inyiņ. ‘Eke, haņkabe kuņ wain metēnde metēņ tiyayiņ,’ inyiņ. ²⁹ Irkeb urmiņ kurun goreb, ‘Badne,’ inyiņ. Goyenbe kamebe dufaymiņ mulgaņ hekeb kuņ metēņ tiyyiņ. ³⁰ Be, al gob urmiņ dirneņ hitte wor kuņbe urmiņ kurun inyiņ gwahade po inyiņ. Irkeb urmiņ dirneņ goreb, ‘Be, doyaņ al, gwaha tiyeņ geb,’ inyiņ. Goyenbe kuņ metēņ ma tiyyiņ. ³¹⁻³² Niņgeb diriņ damiņbe naniņde mere nurde gama iryiņ?” yinyiņ. Irkeb mel gore wol heņbe, “Urmiņ kurun gore,” inamiņ. Irkeb Yesu belen wol heņbe, “Deņbe Yon Baptais belen waņ Al Kurun diliņde huwak heņ heņ niņ yekeb meremiņ

ma nuraŋ. Irde matamiŋ goyen yenaŋ gega, meremiŋ fudinde yeŋ ma nurdeb Al Kuruŋ niŋ bitinŋ mulgaŋ ma hiyuŋ. Goyenbe teks yad yad marya bere belen niŋyabe fudinde yeŋ nuraŋ. Niŋgeb fudinde wor po dinhem. Teks yad yad marya bere belen niŋyabe deŋ fole dirde yeŋ wa Al Kuruŋ belenŋ alya bereyamiŋ doyaŋ yirde hi bana goŋ hurkunayiŋ,” yinyiŋ.

Wain metenŋ doyaŋ irde hinhan mar gote maya mere
(Mak 12:1-12; Luk 20:9-19)

³³ Irdeb Yesu gobe tebaŋ gaha yinyiŋ: “Maya mere hoyanŋ ga nurnaŋ. Al kura wain metenŋ harde koya kerde milgu irdeb wain fimiŋ gilyan heŋ heŋ niŋ mete talde det gitik yiryiŋ. Irdeb ya kawan kura al gor heŋ wain metenŋ go doyaŋ ird ird niŋ iryiŋ. Irdeb metenŋ gobe metenŋ mar hoyanŋ haniŋde kerdeb naŋa gisaw kuriŋ. ³⁴ Be, wain igineŋ yad yad nalu hekeb miŋ al gore metenŋ mar miŋ karwo hulyanŋ yirkeb wain igineŋ kura yawarniŋ yeŋ kwamiŋ. ³⁵ Goyenbe mel goreb gasa yiramiŋ. Unŋkureŋ maydeb kurabe mayke kamiŋ. Irdeb funanŋbe horare mayamiŋ. ³⁶ Be, al gob tebaŋ po metenŋ mar miŋ kura budam hulyanŋ yirke kwamiŋ. Kukeb meheŋde yiramiŋ gwahade po yiramiŋ. ³⁷ Irkeb funanŋ wor pobe, ‘Urne hulyanŋ ire. Gogab palap irde meremiŋ nurnayiŋ geb,’ yeŋbe urmiŋ teŋ kerke kuriŋ. ³⁸ Gega wain metenŋ doyaŋ irde hinhan mar gobe kadom momoŋ gird teŋbe, ‘Metenŋ gate miŋ al gote urmiŋbe gago geb, mayteke kami. Gogab metenŋ gayen naniŋ miŋmoŋ hekeb nende

hiyyeñ,' yamiñ. ³⁹ Irdeb meteñ miñ alyen ur-
 min go teñ tukuñ meteñ siñare mayke kamiñ.
⁴⁰ Gwaha tikeb meteñ miñ al gore wañbe daha
 yiryen yeñ nurde hañ?" yinyiñ. ⁴¹ Irkeb Al Kurun
 doloñ ird ird mata doyañ marya Yuda marte
 doyañ mar parguwakya beleñ wol heñbe, "Mata
 bulun tinayiñ mar go gasa yirke kamnayiñ. Irde
 meteñmiñ go teñ al hoyañ haniñde kiryen. Irkeb
 mel gore gab wain igineñ yad yad nalurebe yeñ
 untekebe uneñ hinayiñ," inamiñ. ⁴² Irkeb Yesu
 beleñ wol heñbe, "Deñbe Al Kurunyen mere ga-
 hade katiñbe ma keneñ hanyen? Merebe gahade:
 'Ya yird yird mar beleñ igiñ moñ yeñ nurde pel
 iramiñ hora goyen al hoyañ beleñ teñ go
 hende ya sañiñ wor po iryiñ.

Go iryiñ gobe Doyañ Al Kurun beleñ iryiñ.

Niñgeb Al Kurun beleñ iryiñ gob dilniniñdebe
 igiñ wor po yeñ keneñ hite,' yitiñ hi. *Tikiñ*
118:22-23

⁴³ "Niñgeb fudinde wor po dineñ hime. Deñbe
 Al Kurun beleñ alya bereyamiñ doyañ yirde hi
 bana goñ hitek gega, dakira teñbe Al Kurun
 diliñde mata igiñ teñ hinayiñ mar goyen po gab
 yunyen. ⁴⁴ Niñgeb Al Kurunyen asañde hora niñ
 yitiñ gobe ne gago. Niñgeb al kura hora go hende
 takteñ mayyenbe mugol niyyen. Irde hora gore
 kateñ hika tiyyen al gobe umetek tiyyen. Niñgeb
 al kura neneñ bebak ma tinayiñ mar hittebe
 kame mata gwahade forok yiyyen," yinyiñ.

⁴⁵ Be, pris buda gote karkuwanmiñya Farisi
 marya go Yesuyen maya mere go nurdeb, "Neñ
 ga po dineñ hi," yeñ nuramiñ. ⁴⁶ Irdeb daha
 mat kura teñ fere titewoñ yeñ nuramiñ. Irdeb

Yesube al buda gore yenbe Al Kurunyen mere basan al yen nurde hinhan geb, al buda goke kafura haminj.

22

*Bere tenj tenje ninj dula mata gote maya mere
(Luk 14:15-24)*

¹ Be, Yesu go tebanj po maya mere mat al gaha yinyinj: ² “Al Kurun belen alya bereyaminj doyanj yird yird goyen kurabe gahade: doyanj al kurun kura urminj bere tewe yekeb dula mata kurun gitik tiyyinj. ³ Irdeb metenj marminj hulyanj yirdeb, ‘Kun dula mata gake al hoy yirminj mar goyen yinke wananj,’ yinyinj. Goyenbe kunj yinkeb bada haminj. ⁴ Irkeb metenj marminj hoyanj wor sopte hulyanj yirdeb gaha yinyinj. ‘Kunbe, “Doyanj al kurunjinj belen bulmakaw firfurnenj gasa yirde det tumnanj gitik tenj ep ira. Irdeb wanayinj yen denj ge keya hihi geb wake kuninj,” yinnayinj,’ yinyinj.

⁵ “Be, metenj marminj gore kunj al hoy yiryinj mar goyen yenenbe doyanj alminj belen yinyinj gwahade po yinaminj. Goyenpoga yende mere go ma nuraminj. Irdeb dufayminj de dufayminj de kwaminj. Al kurabe binje metenjinj de kurinj. Munanj kurabe hora metenjinj de kurinj. ⁶ Al kura marbe doyanj al kurunde metenj mar buda goyen yade bulun bulun yirde gasa yirke kamaminj. ⁷ Gwaha tikeb doyanj al kurun go bin ar yekeb fulenja marminj yad yerke kwaminj. Kunbe al buda metenj marminj gasa yiraminj goyen

gasa yirke kamkeb tiyuŋmiŋ go manan kumga tiyamiŋ.

⁸ “Gwaha tenbe doyaŋ al kurun go meten marmiŋ yeŋa hinhan go hoy yiryiŋ. Irdeb gaha yinyiŋ. ‘Dawetbe tumnan gitik ten ep irtiŋ gega, al watek mar wor pobe waŋ waŋ niŋ bada hahan. ⁹ Niŋgeb kuŋ beleyen alya bereya kura yenenbe mali po yinkeb dula mata tiyen tihimde gar wanayiŋ,’ yinyiŋ. ¹⁰ Gwaha yinkeb meten marmiŋ gobe taun bana goŋ niŋ beley haniŋ haniŋ gama yirdeb kuŋ al bulunya iginya goyen yenenbe mali po yinke wayamiŋ. Be, al go waŋ keperamiŋbe yabe maŋiŋ wor po hiriŋ.

¹¹ “Irkeb doyaŋ al kurun beley al gabu iramiŋ go yene yeŋ waŋbe al kura dula matare niŋ umna ma titiŋ goyen kinyiŋ. ¹² Kenenbe, ‘Dula matare niŋ umna ma taha gega, daha mat bana gaŋ wayha?’ inkeb al gob mere ma po tiyyiŋ. ¹³ Irkeb doyaŋ al kurun goreb, ‘Ten kahanya haniŋya fere ten siŋare kidoma bana temeynan. Gorbe esen misiŋ isiŋ bana goŋ hiyeŋ,’ yeŋ meten marmiŋ hulyaŋ yiryiŋ. ¹⁴ Be, maya mere ga nurhan gwahade goyen po, Al Kurun beleybe al budam hoy yirde hi gega, yunƙureŋ yunƙureŋ po gab nigen yeŋ basiŋa yirtiŋ han,” yinyiŋ.

Farisi mar beley teks kerd kerd niŋ Yesu gusuŋaŋ iramiŋ

(Mak 12:13-17; Luk 20:20-26)

¹⁵ Be, Farisi mar go meremiŋ nurde biŋ ar yekeb siŋare katenbe Yesu go soŋ hekeb merere kertek yeŋ yinŋeŋ uliŋ mere sege iramiŋ.

¹⁶ Irdeb yinŋende komatmiŋ yad yerke Yesu hitte

kwamiñ. Herot gama irde hanjen mar manañ yenya tumñañ kwamiñ. Kuñbe Yesu goyen, “Tisa, gebe mata fudinde po ga tej hayen. Irdeb Al Kurunjen merebe fudinde mat po saba tej hayen. Gebe al denem yanja denem moñja goyen mereya matayabe tunande po yirde hayen. ¹⁷ Niñgeb gebe dahade nurde ha? Neñ Moseyen saba gama irde hite mar gayen Roma gabmanyen doyañ al kurun Sisar niñ teks kertek gobe igiñ ma dahade? Igiñ momon dirayiñ?” inamiñ.

¹⁸ Goyenpoga Yesu gob dufaymiñ bulun gob bikken yenen bebak tejbe, “Usi mar wor wor, daniñ tunañ nirde hañ? ¹⁹ Teks yerde hanjen hora go nikala nirke kene,” yinyiñ. Irkeb denari unñkuren tawayamiñ. ²⁰ Irkeb al toneñ hora hende gor keneñbe, “Gabe ganun toneñja denemya?” yinyiñ. ²¹ Irkeb mel gore wol henbe, “Sisaryen,” inamiñ. Irkeb wol henbe, “Gwahade niñgeb, det kura niñ Sisar beñ dinyen gobe Sisar unnayiñ. Munañ Al Kurun beñ det kura niñ dinyen gobe Al Kurun unnayiñ,” yinyiñ.

²² Be, Yesu beñ mere tiyyiñ go nurdeb dinon kok yekeb tubul tej kwamiñ.

Sadusi mar beñ al kamtiñ huward huward niñ Yesu gusunañ iramiñ

(Mak 12:18-27; Luk 20:27-40)

²³ Be, naja fay goyare goyen po Sadusi mar beñ Yesu hitte wayamiñ. Go mar gobe al kamtiñde mat epte ma huwarnayiñ yen hanjen. Be, mel go Yesu hitte wanbe gusunañ iramiñ. ²⁴ “Tisa, Moseyen sabarebe, ‘Al kura diriñ miñmon henja berem tubul tej kamkeb kuliñ

kura hiyyen̄ gore itin̄de beretap go ten̄be itin̄ nin̄ dirin̄ forok irde unyen̄,' gwahade yitin̄ hi. ²⁵ Be, al kura kulin̄ 6 min̄yan̄ goyen̄ nenȳa hi-tyen̄. Al gobe bere tirin̄ gega dirin̄ min̄mon̄ hen̄ya kamyin̄. Irkeb kulin̄ belen̄ beretap go tirin̄. ²⁶ Goyenbe yen̄ wor gwahade po dirin̄ min̄mon̄ hen̄ya kamyin̄. Irkeb yen̄ kamekken̄ gore wor beretap go tam̄in̄ goyen̄ dirin̄ kura ma forok irdeya kamamin̄. ²⁷ Irke funan̄be bere go wor kamyin̄. ²⁸ Be, al goya kulin̄ wen̄ya gote berembe un̄kuren̄ gogo po hinhin̄ geb, kame al kamtin̄ huward huward naturebe bere gobe ganun̄de berem wor po hiyyen̄?" inamin̄.

²⁹ Gwaha inkeb Yesu belen̄ wol hen̄be, "Den̄be Al Kurun̄yen̄ tarenya meremya asan̄de katin̄ goyen̄ kenen̄ wuk ma yen̄ hanyen̄. Gwahade geb son̄ hen̄ go ma kenen̄ han̄. ³⁰ Al kamtin̄ huwar-nayin̄ natureb al belen̄ bere yade bere belen̄ al ma kunayin̄. Yen̄be Al Kurun̄yen̄ miyon̄ yara po henayin̄. ³¹ Al kamtin̄ huward huward matabe Al Kurun̄ belen̄ asan̄min̄de, ³² 'Nebe Abraham, Aisakyabe Yekopyat Al Kurun̄,' yirin̄ goyen̄ gobe kapyan̄ ma hen̄ hanyen̄? Mel gobe kamtin̄ gega, tonen̄be yen̄ya han̄ geb, gogo yirin̄. Nin̄geb Al Kurun̄be al dilin̄ gergen̄ han̄ gote Al Kurun̄, al kamtin̄ gote mon̄," yinyin̄. ³³ Be, al buda gobe meremin̄ nurdeb dinon̄ kok wor po yamin̄.

Moseyen saba gote min̄ wor pobe da?

(Mak 12:28-34; Luk 10:25-28)

³⁴ Be, Yesu belen̄ Sadusi marte gusun̄an̄ go ken̄kela po wol hekeb gwaha mat kura mere titek mon̄ hamin̄. Irkeb Farisi mar belen̄ go nurdeb

wan̄ Yesu hinhinde gor gabu iramiñ. ³⁵ Irdeb un̄kuren̄miñ kura Moseyen saba ken̄kela nurde hitiñ al gore wan̄be tun̄añ ure yeñ gaha inyiñ: ³⁶ “Tisa, saba kurun̄ gabe nurde hite. Goyenbe damiñbe saba kurun̄ gote folek wor po?” inyiñ.

³⁷ Gwaha inkeb Yesu belen̄ wol hen̄be, “Bublikun̄ge, tonge, dufaygeya tareñgeya tum̄añ Doyañ Al Kurun̄ge, Al Kurun̄ hitte po hugiñeñ kuñ hiyeñ. ³⁸ Gabe Moseyen saba kurun̄ gote folek wor po. ³⁹ Gote kurhan̄be gigen̄ ge aman̄eñ nurde hayen gwahade goyen po kadge hoyañ niñ wor aman̄eñ nurde hayiñ. ⁴⁰ Moseyen sabaya Al Kurun̄yen mere basañ marya belen̄ saba kayamiñ kurun̄ gote miñbe irawa gago po,” inyiñ.

Yesu belen̄ Farisi mar go Mesaia niñ gusun̄añ yiryiñ

(Mak 12:35-37; Luk 20:41-44)

⁴¹ Be, Farisi mar go gabu irde hikeb Yesu belen̄be gusun̄añ yiryiñ. ⁴² “Deñ gayen Mesaiabe ganun̄de urmiñ yeñ nurde hañ?” Gwaha yinkeb Farisi mar gore wol hen̄be, “Yeñbe Dewit urmiñ,” inamiñ. ⁴³ Irkeb Yesu belen̄be, “Dewit urmiñ yeñ hañ gega, dahade niñgeb Holi Spirit belen̄ Dewit ketal urkeb urmiñ goyen, ‘Gebe Kurun̄ne,’ inyiñ? Dewit belen̄ Mesaia niñ gaha yiriñ:

⁴⁴ ‘Al Kurun̄ belen̄ Doyañ Al Kurun̄ne gaha inyiñ: “Wañ ketalner hen̄ al deñem yañ wor po hawayiñ. Irkeb asogo girde hañ mar goyen bul yirde yawameke gasa yirde yufurka tiyayiñ,” inyiñ, ’ yitiñ hi.

110:1

Tikiñ

⁴⁵ Ningeb kapyañ heñ hanjen gwahade po, Dewit beleş Mesaia goyen ‘Doyañ Al Kurunje’ inyiñ. Ningeb dahade geb Mesaia gobe Dewityen urmiñ hiyyen? Gobe epte moñ geb!” yinyiñ. ⁴⁶ Be, gwaha yinkeb al kura beleş muñ kura wol ma hiriñ. Irde goyenter matbe al kura wañ Yesu tunañ urde merem yañ irniñ yeñ gusunañ irde hinhan gobe bada po hamiñ.

23

Yesu beleş Farisi marya Moseyen saba maryat sikkenj tagalyiñ

(Mak 12:38-39; Luk 11:43,46; 20:45-46)

¹ Be, Yesu gob komatmiñya al buda kurunya goyen saba yirde henyañbe gaha yinyiñ: ² “Moseyen saba gote miñ tagal tagal metenbe Moseyen saba marya Farisi marya beleş teñ hanjen. ³ Ningeb mel gore saba dirkeb kenkela gama irde hinayiñ. Goyenpoga yingenbe saba teñ hanjen goyen ma gama irde hañ geb, matamiñ po gab gama ma yirde hinayiñ. ⁴ Mel gobe mata gama irtek metenjen wor po goyen budam forok yirdeb gama yirnayiñ yeñ tagalde hanjen. Irkeb albe kanduknen wor po nurde hanjen. Goyenpoga bindebe muñ kura gama irtek ma yirde hiyen. ⁵ Mata teñ hanjen kurun gobe al beleş dennañ yeñ mata teñ hanjen. Al Kurun dolon ird irdde niñ bisi pelyen wor po kura Moseyen mere go hende katiñ goyen tonande yerde hanjen. Irde Al Kurun dolon ird irdde niñ uliñ umña murun beleş niñ sinšanen goyen ulyañ wor po yirdeb hor yirde hanjen. ⁶ Yenbe

dula mata karkuwan̄ya gabu yayan̄ kuñ hen̄be al den̄em yan̄de gasun̄yan̄ po kepertek nurde han̄yen. ⁷ Irdeb gabu gasun̄yan̄ kuñbe al belen̄ yenen̄ palap yirde ‘Tisa’ yinen̄ yinen̄ niñ aman̄en̄ nurde han̄yen.

⁸ “Goyenbe Doyan̄ Al Kurun̄tin̄be un̄kuren̄ po, irde den̄be tum̄nan̄ yende dir̄nen̄ wen̄ niñgeb, den̄be daniñ ‘tisa’ ma dinhan̄ yen̄ ma nurde hinayin̄. ⁹ Nantin̄be Al Kurun̄ san̄in̄ min̄yan̄ yen̄ un̄kuren̄ gog po geb al kura ‘Ado’ ma inen̄ hinayin̄. ¹⁰ Tisatin̄be Mesaia yen̄ un̄kuren̄ po geb, den̄be daniñ ma ‘Tisa’ dinen̄ han̄ yen̄ ma nurde hinayin̄. ¹¹⁻¹² Niñgeb al kura yin̄gen̄ turun̄ turun̄ irde hiyen̄ al gobe Al Kurun̄ belen̄ yen̄be den̄em mon̄ iryen̄. Irde al kura yin̄gen̄ nebe den̄nem mon̄ yen̄ hiyen̄ al gobe Al Kurun̄ belen̄be den̄em yan̄ iryen̄. Niñgeb den̄ bana gayen̄ al kura doyan̄ al hewe yiyyen̄ al gobe dende meten̄ al hiyyen̄,” yinyin̄.

Farisi marya Moseyen saba marte mata bulun̄ goke yirin̄

(Mak 12:40; Luk 11:39-42,44,52; 20:47)

¹³⁻¹⁴ Irdeb al buda gor gabu irde hinhan̄ goyen gaha yinyin̄: “Be, den̄ Moseyen saba marya Farisi maryabe usi mar wor po. Den̄be Al Kurun̄yen bearar bana han̄ goke bunin̄en̄ wor po nurd dunen̄ hime. Den̄ belen̄be Al Kurun̄ belen̄ alya berayamin̄ doyan̄ yirde hire gor kuñ kuñ belen̄min̄ pet ten̄ han̄. Dindiken̄be bana gon̄ ma hurkuñ han̄. Irde al hoyan̄ goyen bana gon̄ hurkunin̄ yen̄ kurut yen̄ han̄ mar wor belen̄min̄

pet ten haɲ.* ¹⁵ Deɲ Moseyen saba marya Farisi maryabe usi mar wor po. Deɲbe Al Kurunyen bearar bana haɲ goke buninɛɲ wor po nurd duneɲ hime. Deɲbe, ‘Al yawarteke mataniniɲ gama irnanɲ,’ yeɲbe al unɲkureɲ muɲ kura goke wor kahaɲtinɛde kurab hakwa hende kuɲ naɲa kurunɲ gayen pasi heɲ hanɲen. Irkeb al gore mataɲinɲ gama irkeb Al Kurunyen saba bulunɲ irde hanɲen. Irkeb al gote mata bulunɲminɲbe dende folek wor po kak alare kutek po yirde hanɲen.

¹⁶ “Deɲbe al diliɲ titminɲ belɛɲ al kadom belɛɲ ikala irde tukuyeɲ go gwahade goyen ten haɲ. Niɲgeb deɲbe Al Kurunyen bearar bana haɲ goke buninɛɲ wor po nurd duneɲ hime. Deɲbe al saba gahade yirde hanɲen: ‘Al kura Al Kurunyen ya balem deɲe urde biɲa tiyyɛɲ goyen ma gama iryeɲ goke kandukɲɛɲ ma nuryeɲ. Goyenpoga al kura ya bana gol hora hiyen goyen deɲe urde biɲa tiyyɛɲ gobe gama po iryeɲ,’ gwaha yeɲ hanɲen. ¹⁷ Duliɲ kukuwa! Dilitiɲ titminɲ buda! Dabe det kurunɲ? Gol hora ma ya goyen? Gol hora yeɲ uliɲbe det himam moɲ. Goyenbe ya goyen bana hi goke tenɲbe himam hiyyeɲ. Niɲgeb ya gobe det kurunɲ. ¹⁸ Sabatiɲ kurabe gaha yeɲ hanɲen: ‘Al kura alta deɲe urde biɲa tiyyɛɲ goyen ma gama iryeɲ goke kandukɲɛɲ ma nuryeɲ. Goyenpoga Al Kurunɲ galak ire yeɲ alta hende

* **23:13-14:** Asaɲ hoyanɛdebe gahade hi: 14 Deɲ Moseyen saba marya Farisi maryabe usi mar wor po. Deɲbe beretapyeɲ samunɲya horaya komkom heɲ hanɲen. Goyenbe al hoyanɲ belɛɲ denɛɲ turunɲ dirnanɲ yeɲ Al Kurunɲ mere irhet yeɲbe mere ulyaɲ wor po tulunɲ tenɲ hanɲen. Niɲgeb deɲbe gote murunɲgem bulunɲ wor po Al Kurunɲ belɛɲ yunyeɲ.

kirtin goyen deŋe urde biŋa tiyyeŋ gobe gama po iryeŋ,' yeŋ hanŋyen. ¹⁹ Diltin titmin buda! Dabe det kurun? Alta ma det go hende hi goyen? Det go yeŋ ulinbe himam mon gega, alta hende kerkeb himam hiyyeŋ. Niŋgeb altabe det kurun. ²⁰ Niŋgeb al kura alta deŋe urde biŋa tiyyeŋbe alta go mun po mon, det go hende Al Kurun galak irtin go manan deŋe uryeŋ. ²¹ Irde al kura Al Kurunyen ya balem deŋe urde biŋa tiyyeŋbe ya go mun po mon, det ya go bana hinayin kurun goyen manan gog po deŋe yuryeŋ. ²² Irde nanŋinbe Al Kurunyen maroro gasun. Niŋgeb al kura nanŋin deŋe urde biŋa tiyyeŋbe maroro gasun go po mon, go hende keperde hi Al goyen manan gog po deŋe uryeŋ. Niŋgeb biŋa tinayinbe go po gama irde hinayin.

²³ “Be, deŋ Moseyen saba marya Farisi maryabe usi mar wor po. Deŋbe Al Kurunyen bearar bana han goke bunineŋ wor po nurd dunen hime. Deŋbe binŋe hapek yird yird det harde hanŋyen goyen yade buda 10 yirdeb unŋkurenbe Al Kurun unen hanŋyen. Goyenbe deŋbe Moseyen saba kurun wor po goyen pel irde hanŋyen. Al kura deŋ nurd yunen han mar po ga igin igin yirde, go ma nurd yunen han marbe gwaha ma yirde hanŋyen. Kadtin bunineŋ nurd yuntek goyen bunineŋ ma yirde hanŋyen. Irde Al Kurun nin hekkeŋ nurtek goyen go ma po gwaha teŋ hanŋyen. Goyenbe Al Kurun galak ird ird mataya kadtin bunineŋ nurd yunen yunen mataya gobe tumnan gama po irde hinayin. ²⁴ Goyenpoga deŋbe Moseyen saba karkuwan

karkuwanbe pel yirdeb mukneɗ mukneɗ goke po gabe ug po yeɗ hanɗen. Goke tenbe denbe fe ninɗ yeɗ det mukneɗ muɗ kirkida gwahade goyen goke kenkela yakkelyan ten yade siɗa yirde gab nene haɗ gega, dapɗa kurun kamel netek moɗ wor go ma nurde henya yohogo ten haɗ yara denen hime. Denbe al kura dilin titmin gore al kadam beɗen ikala irde tukuyeɗ go gwahade ten haɗ.

²⁵ “Be, den Moseyen saba marya Farisi maryabe usi mar wor po. Denbe Al Kurunyen bearar bana haɗ goke buninɗ wor po nurd dunen hime. Denbe al hoyan beɗen ultin siɗare po denenbe al wukkeɗ yeɗ denen haɗ. Goyenpoga bitin banabe kudin mataya megen nin mata bulun hapekyaɗ ten ten ninya beɗen po makin hitin. Ninɗen denbe gisuya koronya siɗare po haldeb bindebe tikiɗ yan yubul ten hanɗen yara denen hime. ²⁶ Ninɗen den dilitin titmin Farisi mar, mehenɗebe bitin bana mata bulun haɗ go wa yade siɗa yirnayin. Irke gab siɗare wor wuk yiyyen.

²⁷ “Be, den Moseyen saba marya Farisi maryabe usi mar wor po. Denbe Al Kurunyen bearar bana haɗ goke buninɗ wor po nurd dunen hime. Denbe bamba kura siɗarebe umɗa irtin haɗ. Gega bin banabe al kinɗiniɗa det mormokya beɗen po makin hitin haɗ go gwahade goyen. ²⁸ Ninɗen al beɗenbe al huwak yeɗ denen hanɗen. Goyenpoga bitin banabe usiya mata bulun ten ten dufayya beɗen po makin hitin haɗ.

²⁹ “Be, den Moseyen saba marya Farisi

maryabe usi mar wor po. Denbe Al Kurunyen bearar bana han goke buninjen wor po nurd dunen hime. Denbe Al Kurunyen mere basan mar asetin yago belej gasa yirke kamamin gote bamba gergen yirde haran hen hanjen. Irde Al Kurun dilinge al huwak hinhan mar gote bamba umna yirde hanjen. ³⁰ Irdeb, 'Nen gayen asininin yago hinhan nalu goyenter hinhet manhan asininin yago belej Al Kurunyen mere basan mar gasa yirke kamde hinhan matamin goyen yilwa yirtewon,' yen hanjen. ³¹ Gwaha yen hanjen gobe den gayenbe Al Kurunyen mere basan mar gasa yiramin mar gote fonjenmin goyen dindiken sikkenjin forok yirde han geb. ³² Ningeb asetin yago mata bulun go min uramin goyen den belej tukunbe sol irnaying.

³³ "Denbe kunere duwi wor po! Al Kurunyen beararbe daha mat busahartek yen nurde han? Kak alare po ga kunaying geb. ³⁴ Ningeb Al Kurunyen mere basan marya al dufay wukke minyanja saba marya yad yermeke den hitte wanaying. Goyenbe go mar goyen kurabe gasa yirke kamnaying, kurabe kuruse hende gasa yirke kamnaying. Munan kurabe gabu yatinyan yukun yusulak ten, kurabe gasa yirnin yen taun kurar mat kurar gama yirde yukun hinaying. ³⁵ Ningeb al huwak kurun megen gar hike gasa yirke kamnaying gote kanduk goyenbe den gayenter nin manan tenaying. Gobe Abel mayke kamiyinde mat wan wan Berekia urmin Sekaraia goyen Al Kurunyen ya balem bana gasun himamya altaya kahalte asetin yago belej mayke kamiy gote

kanduk. ³⁶ Niñgeb fudinde wor po dinen hime. Kanduk kurun dinen hime gabe tumñan den gayenter nin mar gare tenayin,” yinyin.

Yerusalem nin mar goke buniñen nuryin
(Luk 13:34-35)

³⁷ Irdeb sopte po, “Awo, Yerusalem nin mar, buniñen wor po nurd dunen hime. Al Kurun belen den ge nurde mere basan marmin yad yerke wan hanjen. Goyenbe den belenbe kurab hora po gasa yirde, kurabe mali gasa yirde hike kamde hanjen. Tatirok miliñ belen dirnen yawan tapen belen po aw yurde hiyen go gwa-hade goyen po, ne belen den goyen dade doyan dirde himewon yen hugiñen dufay hen himyen. Goyenbe dindiken po merene pel irde yilwa nirde hanjen. ³⁸ Niñgeb ga nurnan. Al Kurun belen tauntin tubul tiyyen. Irkeb nanan hoyande nin mar belen wan tauntin goyen gwamun urkeb det kura bana gon ma hinayin. ³⁹ Nebe dubul ten kumekeb epte ma nennayin. Irde kun kun kame sopte wayen. Irkeb ne nenenbe dindiken mohtoninde wor wor, ‘Doyan Al Kurunyen denemde waya al gabe Doyan Al Kurun belen guram irde igin wor po iryen,’ yen turun nirnayin,” yinyin.

24

Al Kurunyen ya balem bulun hen hen nin yirin
(Mak 13:1-13; Luk 21:5-19)

¹ Be, Yesu gob Al Kurunyen ya balem goyen tubul ten hoyande kun hikeyab komatmin yago belen wanbe, “Ya balem ga kena,” inamin. ² Irkeb Yesu belen, “Ya kenhan kurun gayenbe fudinde

wor po dinen hime. Hora ya irtin yenen han gabe unjkuren mun kura epte ma gasunen de hiyen. Tumnan pir irnayin,” yinyin. ³ Yesu go gwaha yinenbe kun Olip dondonde kipiryin. Irkeb yen yunjkuren po henyabe komatmin yago belen, “Da mata forok yeke yenen gabe nalu funan go wan wan nalube forok yewen tiya yen bebak titek?” inamin. ⁴⁻⁵ Irkeb wol henbe, “Nalu funan binde hekeb al budam wan, ‘Mesaiabe ne gago,’ yinen al budam wor po usi yirnayin. Ningeb kenkela hen hinan ko. Monjo al kura belen usi dirnayin geb. ⁶ Kurabe fulen karkuwan forok yeke nurde hinayin. Irde fulen forok yenayin mere momon wor nurde hinayin. Goyenbe goke kafura hen hurkun kat ma tinayin. Mata gwahade gobe forok yen hinayin gega, nalu funanbe kame ga wayyen. ⁷ Goyenterbe al min kura belen huwarde al min hoyanya fulen ten hinayin. Gabman kura belen gabman hoyanya fulen gird ten hinayin. Albe binje nin kamde hinayin. Niniya karkuwan nana kurar kurar forok yen hinayin. ⁸ Kanduk kurun gob bere kura dirin kawan kere yen mehen de wor po ulin misin katyen go gwahade goyen po, nalu funan binde hen hikeb mata goyen forok yenayin.

⁹ “Goyenterbe al belen merem yan dirde bulun bulun dirde mudunke kamnayin. Irde al min kurayen kurayen kurun gore ne nin igin ma nurde den haram dirde hinayin. ¹⁰ Goyarebe al budam ne nin dufaymin sanin irde hinayin goyen yubul tinayin. Irdeb kadam haram gird ten asogom haniinde yerde hinayin. ¹¹ Irde al

budam beley, ‘Nenbe Al Kurunyen mere basan mar,’ usi tenbe wan al budam usi yirde hinayin. ¹² Mata bulun beley po nana tiyyen. Irkeb al kadom nin amanen nurd nurd mata gobe hubu hiyyen. ¹³ Goyenbe al kura sanin hen kanduk go fole irde kun kun funandebe Al Kurun beley al go tiyyen. ¹⁴ Mere igin Al Kurun beley doyan dird dird goyen go wa megen kurun ga tagalde tukuke al nurde hinayin. Irke gab nalu funan go forok yiyyen,” yinyin.

Kanduk kurun wor po forok yiyyen
(Mak 13:14-27; Luk 21:20-28)

¹⁵ Irdeb sopte yinyin. “Al Kurunyen mere basan al Daniel beley asande, ‘Det kura Al Kurunyen ya balem bulun wor po irtek goyen ya bana gon forok yiyyen,’ yitin goyen forok yiyyen. (Mere kayhem gayen kapyan hen han marbe kenkela dufay hen gab bebak tina.) ¹⁶ Be, mata goyen forok yekeb Yudia nanare hinayin marbe busaharde dugure kun bana kunayin. ¹⁷ Goyenterbe al kura ya hende hiyen goyen katen yamin bana hurkun detne kura yade ga busahare ma yiyyen. ¹⁸ Al kura metenmin tubul ten kun amilne ten ga ma yiyyen. ¹⁹ Goyen nalurebe bere bin yanya bere dirin besare nin minyanyabe metenen wor po yiryen. ²⁰ Ningeb kanduk kurun goyen nana nalu bulunde, ma Sabat nalure forok ma yewon yen goke Al Kurun gusunan irde hinayin. ²¹ Goyen nalureb megen ga kanduk kurun wor po tiyyen. Han kapy Al Kurun beley tikula kiryinde mat wan ga hitere, irde kame wor kanduk gwahade kura ma kentek. Go kanduk goyenbe baran

wor po duryeñ. ²² Niñgeb Al Kurun beleş nalu goyen sobamde po tubul tike manhan al tumñan kamwon. Goyenbe al nigen yiriñ goke teñbe nalu go wer irde dolfon iryeñ. ²³ Goyen nalure al kura beleş, ‘Mesaiabe gago hi,’ dinnayiñ, irde hoyan beleş, ‘Moñ, iror hi,’ dineñ inñogaha dirke goya go ma nurde gama yirnayiñ. ²⁴ Mesaia falkukya Al Kurunyen mere basan mar falkukya beleş alya bereya Al Kurun beleş basiña yirtiñ goyen usi yirteke katwon yeñ mata tiñeñ karkuwan kurayen kurayen forok yirde hinayiñ. ²⁵ Mere gabe nalu go ma forok yeñ hikeya gago momon dirde hime geb, keñkela heñ hinañ ko.

²⁶ “Niñgeb Al kura beleş, ‘Mesaiabe sawsawa po kurun nañare hi,’ dinke ga kuñ kinniñ kinniñ ma tinayiñ. Irdeb, ‘Mesaiabe gañ banare hi,’ dinke goya fudinde yeñ ma nurnayiñ. ²⁷ Dagamel tikeb al naña wañ waña naña kurkurya beleş tumñande keneñ hanñyen gwahade po, ne Al Urmiñ gayen wamekeb wawun unñkureñde po megen niñ mar kurun gayen tumñande nennayiñ. ²⁸ Det kamtiñ hinayiñdebe det bidak nen nen nu beleş wañ hanñyen gobe bebakkeñ wor po geb, goke epte ma kadom mohonñde titek gwahade goyen po, ne Al Urmiñ gayen wamekeb tumñan neneñ nalu funañbe gago yeñ bebak tinayiñ.

²⁹ “Kanduk kurun goyen kamere po,
 ‘Naña kidoma hiyyeñ, irde gagasi ma timiyyeñ.
 Nañkinñde mat dinambe suk yeñ katnayiñ.
 Irdeb det kurun hende hañ gobe hambor yiryen,’
 yitiñ *Aisaia 13:10; 34:4*
 gwahade po forok yenayiñ.

³⁰ “Goyenterbe ne Al Urminj wayeɗ timekeb mata kura nanƙiɗde forok yiyyeɗ. Irkeb ne Al Urminj gabe tareɗne turɗuɗ yaɗ goya kigariɗkiɗ faykek hende kateɗ. Irkeb megen niɗ mar ne niɗ ma nurde haɗ mar tumɗaɗ neneɗbe biɗ misin nurde esinayiɗ. ³¹ Miyonje yad yermeke belɗ meheɗ heɗ ne waɗ waɗ niɗ bigul fu irkeb al tumɗaɗ nurnayiɗ. Irde kateɗbe alya bereya naɗa kuruj hike kwa bana goɗ niɗ basaɗa yirtin goyen gabu yirnayiɗ.

³² “Fik hebe yeneɗ hanjen gogo. Fik he go beda urke yeneɗbe kadila heweɗ tiya yeɗ hanjen. ³³ Gwahade goyen po, mere dirhem kuruj gayen forok yeke yeneɗbe nalu funaɗbe binde gag po wer ira yeɗ nurnayiɗ. ³⁴ Fudinde wor po dinɗ hime. Mata gobe forok yenayiɗ geb. Irde mata go forok yenayiɗ nalure al hinayiɗ mar gobe mata goyen yennayiɗ. ³⁵ Irdeb megenya nanƙiɗyabe hubu hiriryɗ. Goyenbe merenebe saɗin miɗyaɗ geb, hubu ma hiyyeɗ. Huginɗ alya bereya nurde fudinde wor po yeɗ gama irde hinayiɗ,” yiniɗ.

Nalu funaɗbe bebakkeɗ moɗ

(Mak 13:32-37; Luk 17:26-30,34-36)

³⁶ Irdeb sopte yiniɗ. “Nalu funaɗ goyen al kura bebakkeɗ ma nurde hi. Hubu wor po. Adone po ga nurde hi. Urmiɗya miyonmiɗya wor ma po nurde haɗ. ³⁷ Ne Al Urminj gayen waɗ waɗ nalurebe alya bereya bikkeɗ Noa hinhin nalure mata teɗ hinhan gwahade teɗ hinayiɗ. ³⁸ Go mar gobe dula niɗ po teɗ, kukuwa fe nene, al belɗ bere yade, dirɗeɗ weɗ yade al yertek niɗ po teɗ Al Kuruj niɗ ma nurde hinhan. Irde kuɗ

kuŋ nalu forok yekeb Noa hakwa biŋde hurkuriŋ.
³⁹ Mel gobe kame mata gwahade forok yiyyeŋ yeŋ ma nurde hinhan. Irkeb fe ala kuruŋ forok yeŋ gwamuŋ yuryiŋ. Niŋgeb ne Al Urmiŋ gayen wor al beleŋ gwaha naŋa wayyeŋ yeŋ ma nurde hikeya wayeŋ. ⁴⁰ Goyen nalurebe mata gahade forok yiyyeŋ: al iraw kura metenmiŋde meten teŋ hiriryen. Irke Al Kuruŋ beleŋ unkuŋen teŋbe kurabe tubul tiyyeŋ. ⁴¹ Irde bere irawa palawa irye yeŋ wit bilmiŋ hora po karka teŋ hikeya bere unkuŋenbe Al Kuruŋ beleŋ teŋbe kurab tubul tiyyeŋ. ⁴² Goke teŋbe keŋkela heŋ ga hinaŋ ko! Doyaŋ Al Kurunŋiŋ waŋ waŋ nalube bebakkeŋ moŋ geb. ⁴³ Be, ga nurde ga hinaŋ ko. Ya miŋ al kura wawuŋ kurare kawe al beleŋ waŋ yane upew uryeŋ yeŋ nurde hiyeŋdebe yamiŋ keŋkela doyaŋ irde hike kawe al beleŋ epte ma waŋ yamiŋ upew uryeŋ. ⁴⁴ Niŋgeb gwahade goyen po, ne Al Urmiŋ gare wor nalu goyare wayeŋ tiya yeŋ ma nurde hikeya wayeŋ geb, hugiŋeŋ ne niŋ pet teŋ doyaŋ nirde hinayiŋ,” yinyiŋ.

*Meten al igiŋya bulunyat maya mere
 (Luk 12:42-46)*

⁴⁵ Irdeb maya mere mat gaha yinyiŋ: “Be, ganuŋ meten albe dufaymiŋ wukkeŋ, irde gore doyaŋ almiŋ ge fudinde wor po meten teŋ unen hiyeŋ? Meten al gwahade gobe doyaŋ almiŋ beleŋ naŋa gisaw kwe yeŋbe meten almiŋ goyen, ‘Meten mar kadge doyaŋ yirde biŋge yuntek nalu hekeb yuneŋ hayiŋ,’ inen kuyeŋ. ⁴⁶ Be, doyaŋ almiŋ go mulgaŋ heŋ waŋbe meten al gore meremiŋ po gama irde meten teŋ hike keneŋbe

igin igin irkeb meten al gobe aman wor po hiyyen. ⁴⁷ Fudinde wor po dinen hime. Meten al gobe doyan almin belen, 'Samunne kurun gayen wor doyan irde hayin,' inyen. ⁴⁸ Goyenbe daha wet kura ten meten al goreb, 'Doyan alnebe nana gisaw po kun ningeb, aranen ma wan hi,' yenbe ⁴⁹ meten mar kadam alya bereya goyen, 'Merene ma nurde han,' yinen gasa yirde dulan po ten wain nene kukuwa hen hanjen marya wain nene hinayin. ⁵⁰ Irkeb doyan almin go nalu goyenter wayyen yen ma nurde hiyende gor mulgan hiyyen. ⁵¹ Irdeb mata bulunmin gote murungem kurun wor po unyen. Irdeb meten al go tukun kak ala bana esen misin yisen hanjende gor tukukeb usi marya gor hinayinm," yinyin.

25

Bere 10 gote maya mere

¹ Be, Yesu go sopte maya mere mat saba gahade yiryin: "Nalu funan goyenterbe Al Kurun belen alya bereyamin doyan yird yird goyen kurabe gahade: meten bere fonen 10 belen, 'Doyan alnininde urmin belen berem ten wayyen tiya go,' yen, 'Kun belen tupi ten wani,' yen hulsimin yusun yurde kwamin. ² Bere siptesononbe dufaymin wukkek mon. Munan kurabe dufaymin wukkek. ³ Bere siptesonon dufaymin wukkek mon gobe hulsiminbe yawaramin gega, femin pet yeke sopte yunen yunenbe kura ma yadeya kwamin. ⁴ Munan bere siptesonon dufaymin wukkek gobe hulsimin yade femin kame yuntek manan yalin bana goya yade kwamin.

⁵ “Be, bere tenj mulgañ heñ watek al gobe aran ma wakeb bere 10 gobe dukpu yirke tumñañ feramiñ. ⁶ Irke kuñ wawuñ binde heke gab al kura gore kuware, ‘Bere tihi albe wañ hi! Niñgeb wañ tupi tinañ!’ yiriñ. ⁷ Be, bere 10 gore go nurdeb huwarde hulsimiñ ommok hinhan goyen sope yirke melak sañiñ hamiñ. ⁸ Goyenbe bere dufaymiñ igiñ moñ goreb bere dufaymiñ wukken goyen, ‘Hulsiniñ kamniñ tahañ geb, femiñ kura dunnañ,’ yinamiñ. ⁹ Irkeb, ‘Moñ geb, fe gabe denya neña tumñañde epte ma diryeñ geb, dindiken kuñ al hitte damu tinayiñ,’ yinamiñ. ¹⁰ Irkeb bere siptesoñ dufaymiñ wukkeñ moñ goyen fe damu niñ kukeb goyarebe bere tiriñ al go wayyiñ. Irkeb bere siptesoñ gitik tenj hinhan goyen al go wakeb tupi tenj yare dula mata kuruñ tiniñ tiyamiñde gor kwamiñ. Irkeb yamebe tayamiñ.

¹¹ “Be, goyen kamereb bere siptesoñ hulsire niñ fe damu tiniñ yeñ kwamiñ go mulgañ heñbe, ‘Doyañ al, Doyañ al, yame hol irde dunke hurkuniñ,’ inamiñ. ¹² Goyenbe al bere tiriñ gore wol heñbe, ‘Fudinde wor po dinyañ hime. Deñbe ma nurde dunañ hime,’ yinyiñ. ¹³ Be, maya mere dirhem gwahade goyen po ne Al Urmiñ wañ wañ nalu funañbe ma nurde hañ geb, gitik tenj hinayiñ,” yinyiñ.

*Al karwoyen siraw mere
(Luk 19:11-27)*

¹⁴ Irde sopte maya mere mat yinyiñ. “Be, Al Kuruñ belañ alya bereya doyañ yird yird goyen kurabe gahade: al kura naña gisaw kwe yeñbe

detne doyaŋ yirde hinayiŋ yeŋ meteŋ marmin hayhay yiryiŋ. ¹⁵ Irdeb meteŋ al unjkurenbe hora siptesoŋoŋ unyiŋ. Kurabe hora irawa, irde kurabe unjkuren unyiŋ. Meteŋ mar gobe al gwahade mat igiŋ meteŋ tinayiŋ yeŋ nurdeya gab hora goyen yunyiŋ. Irdeb yubul teŋ kuriŋ. ¹⁶ Meteŋ al hora siptesoŋoŋ tiriŋ al gobe goyare po tukun meteŋ unenbe go hende hora siptesoŋoŋ iryiŋ. ¹⁷ Meteŋ al hora irawa tiriŋ al goyen wor gwahade po, tukun meteŋ unenbe go hende hora irawa iryiŋ. ¹⁸ Goyenbe meteŋ al hora unjkuren tiriŋ al gobe kun mete taldebe doyaŋ almiŋde hora goyen goŋ bana kiryiŋ.

¹⁹ “Be, doyaŋ al go naŋa gisaw kun goŋ sobamde po heŋ heŋ gab wayyiŋ. Irdeb waŋ meteŋ marmin hora yunyiŋ goyen daha yiramiŋ yeŋ gusuŋaŋ yiryiŋ. ²⁰ Irkeb meteŋ al hora siptesoŋoŋ unyiŋ gobe sopte hora siptesoŋoŋ yawaŋbe doyaŋ almiŋ gaha inyiŋ: ‘Hora siptesoŋoŋ goyen doyaŋ irayiŋ yeŋ nunen kwariŋ geb, gore sopte 5 irmiŋ gago,’ inyiŋ. ²¹ Irkeb doyaŋ almiŋ belen wol heŋbe, ‘Gebe meteŋ igiŋ wor po tiyaŋ. Gebe meteŋ al igiŋ, merene nuraŋ. Det ug ma gunmiriŋ gega, kenkela doyaŋ yiraŋ ningeb, det budam wor gunmeke doyaŋ yirayiŋ. Irdeb wake tumŋaŋ neya dula teŋ amaŋ heŋ hireŋ,’ inyiŋ.

²² “Be, al hora irawa unyiŋ al gore wor waŋbe gaha inyiŋ: ‘Hora irawa doyaŋ irayiŋ yeŋ nunen kwariŋ gobe gore po meteŋ unenbe hora irawa tebaŋ irmiŋ gago,’ inyiŋ. ²³ Irkeb doyaŋ almiŋ belen wol heŋbe, ‘Gebe meteŋ al igiŋ, merene po nuraŋ. Det ug ma gunmiriŋ gega, kenkela

doyaŋ yiraŋ. Niŋgeb det budam gunmeke doyaŋ yirayiŋ. Irdeb wake neya dula teŋ aman heŋ hireŋ, inyiŋ.

²⁴ “Be, meten al hora unƙuren unyiŋ gore waŋbe gaha inyiŋ: ‘Doyaŋ al, gebe al misiŋen yaŋ wor po nurde gunen himyen. Biŋge ge ma hartiŋ goyen yawarde hayen. Irde ge ma tur irtiŋ wor kuŋ wasen haŋyen. ²⁵ Goke teŋbe kafura heŋ horagebe tukun mete talde goŋ bana kirmiriŋ. Niŋgeb hora gebe gago,’ inyiŋ. ²⁶ Gwaha inkeb doyaŋ almiŋ beŋen wol heŋbe, ‘Gebe kumhaka al, meten al bulun wor po. Gebe detne beŋen ma hartiŋ goyen yawarde himyen, irde detne beŋen ma tur irtiŋ goyen wasen himyen yeŋ nurde ha? ²⁷ Gebe ne gwahade yeŋ nurdeb horanebe hora yerde haŋyen yare kerariŋ manhan horane tolok hitiŋde ga temewoŋ,’ inenbe meten mar buda hoyan hoy yirke wakeb, ²⁸ ‘Hora go goran irde teŋ meten al hora 10 miŋyaŋ al go unnaŋ. ²⁹ Al det unke keŋkela doyaŋ irde igiŋen kurun forok iryen al gobe teban det yawaryen. Irkeb detmiŋ budam wor po henayiŋ. Munaŋ det unke kumhaka heŋ igiŋen ma forok yiryen al gobe yende det mun kura hiyen goyen wor goran irke det miŋmoŋ wor po hiyen. ³⁰ Niŋgeb meten al bulun gobe tukun siŋare kidoma bana esen misiŋ yiŋen haŋyende gor temeynaŋ,’ yinyiŋ geb,” gwaha yiriŋ.

Doyaŋ Al Kurun beŋen alya bereya matamde pota yiryen

³¹ Be, Yesu go sopte gaha yiriŋ: “Ne Al Urmiŋ gabe tareŋne turun yaŋ heŋbe miyoŋneya tunan katted. Goyenterbe Doyaŋ Al Kurunyen

maroro gasunɗe keperen. ³² Irkeb al megen niɗ kurunɗ gayen ne hitte po gabu irnayin. Irkeb sipsipya memeya yewek belenɗ pota yirde hiyen go gwahade yiren. ³³ Ne belenɗbe sipsip yadeb hanne yase belenɗ mat yerdeb memebe yade tapa belenɗ yeren. ³⁴⁻³⁶ Irkeb ne Doyanɗ Al Kurunɗ gare al hanne yase belenɗ mat hinayin goyen gaha yinen: ‘Ne binɗe nirkeyabe binɗe nunamin. Fe niɗ kammekeyab fe nunamin. Albak henɗ kunɗ himekeb gargar niramɗ. Ulinɗhornem monɗ himekeb ulinɗhor nunamin. Garbam hemekeyab doyanɗ nirde faranɗ nurde hinhan. Koyare himekeb wanɗ nenenɗ hinhan. Goke tenɗbe Nanne belenɗ guram dira. Niɗgeb Al Kurunɗ belenɗ alya bereyaminɗ doyanɗ yird yird bana gonɗ hurkunɗ hurkunɗ gobe tikula kiryinɗa denɗ gake gitik irtinɗ hiyen geb wanɗ tenanɗ,’ yinen. ³⁷ Gwaha yinkeb Al Kurunɗ dilinɗe al huwak goreb, ‘Daha nanɗa binɗe kamke genenɗ binɗe guntirinɗ? Irde daha nanɗabe fe niɗ kamke genenɗ fe guntirinɗ? ³⁸ Daha nanɗa albak henɗ kunɗ hike gargar girtirinɗ? Irde daha nanɗa ulinɗhorgem monɗ hike genenɗbe ulinɗhor guntirinɗ? ³⁹ Daha nanɗa garbam heke doyanɗ girde faranɗ gurtirinɗ? Irde daha nanɗa koyare hike kunɗ gintirinɗ?’ ninnayin. ⁴⁰ Irkeb ne Doyanɗ Al Kurunɗ gare wol henɗbe gaha yinen: ‘Fudinde wor po dinenɗ hime. Nere al denɗem monɗ gayen kura gwaha iraminɗ kenenɗbe ne gayen niramɗ,’ gwaha yinen. ⁴¹⁻⁴³ Irdeb tapa belenɗ mat hinayin mar gobe gaha yinen: ‘Denɗbe binɗe nirkeb binɗe kura ma nunamin. Irde fe niɗ kammeke fe kura ma nunamin. Albak henɗ kunɗ himeke gargar ma niramɗ. Ulinɗhornem monɗ

himekeb kura ma nunamiņ. Garbam himekeb farañ ma nuramiņ. Irde koyare himekeya wor waņ ma neneņ hinhan. Goke teņbe denbe Al Kurunyen bearar bana haņ. Niņgeb nubul teņ kuņ kak ala Satanya miyoņmiņa niņ gitik irtiņ bana goņ kunaņ, yineņ. ⁴⁴ Gwaha yinmekeb al buda gore wol heņbe, ‘Doyaņ Al Kurun, daha naņa biņgeya feya niņ kamke geneņ wasak titiriņ? Irde daha naņa uliņhorgem moņ hike kura ma guntiriņ? Irde daha naņa garbam heke doyaņ ma girdeb farañ ma gurtiriņ? Irde daha naņa albak geneņ gargar ma girtiriņ? Irde daha naņa koyare hike go ma kuņ gintiriņ?’ ninayiņ. ⁴⁵ Irkeb ne Doyaņ Al Kurun gare wol heņbe gaha yineņ: ‘Fudinde wor po dineņ hime. Nere al denem moņ gayen kura gwaha ma iramiņ keneņbe ne gayen farañ ma nuramiņ,’ gwaha yineņ. ⁴⁶ Mel gobe mata buluņmiņ gote muruņgem hugiņeņ kanduk kurun teņ hinayiņ. Munañ Al Kurun diliņde al huwak gobe Al Kurunya hugiņeņ hinayiņ,” yinyiņ.

26

*Yesu mayniņ yeņ mere sege iramiņ
(Mak 14:1-2; Luk 22:1-2; Yon 11:45-53)*

¹ Be, Yesu gob sabamiņ kurun goyen pasi irdeb tigiri teņ komatmiņ yago gaha yinyiņ: ² “Pasoba dula nalu kurun gobe molye go yeņ nurde haņ gogo. Go nalurebe ne Al Urmiņ gayen kuruse

hende mununen mununen niŋ asogo haniŋde nernayiŋ,”* yiriŋ.

³ Be, goyenterbe pris buda gote karkuwaŋmiŋya Yuda marte doyaŋ mar parguwak yagoya beleŋ pris buda gote kurunŋmiŋ Kaiafasyen yare gabu iramiŋ. ⁴ Irdeb daha mat kura Yesu go usi irde teŋ mayteke kamyen yeŋ mere sege iramiŋ. ⁵ Goyenbe yiŋgeŋ mere maydeb, “Dula nalu kurunŋ gayenter ma gwaha titek. Moŋgo goke igiŋ ma nurde al beleŋ fulenŋa dirnayiŋ geb,” yamiŋ.

Bere kura beleŋ det fimiŋ hamiŋeŋ igiŋ wor po goyen Yesu tonanŋde wok iryiŋ

(Mak 14:3-9; Yon 12:1-8)

⁶ Be, Yesu go komatmiŋ yagoya Betani taunde Saimonyen yare hinhan. Saimonbe bikkeŋ busuka mananŋ hinhin. ⁷ Be, Yesu go keperde hikeyab bere kura gore det fimiŋ hamiŋeŋ igiŋ wor po alabasta hora beleŋ po irtiŋ yaliŋ kusamuŋ goyen bana hitiŋ go tawaŋ tonanŋde wok iryiŋ. ⁸ Det fimiŋ damum hende wor po goyen bere gore Yesu tonanŋde wok irke keneŋbe komatmiŋ yago beleŋbe biŋ ar hende daniŋ bulunŋ ira yeŋ gusuŋanŋ hamiŋ. ⁹ “Go tukuŋ al yunke

* **26:2:** Bikkeŋ Israel mar Isip naŋa tubul teŋ Kenan kuniŋ tiyamiŋyabe Al Kurun beleŋ sipsip al diriŋ dirneŋ gasa yirde darim yade yame kantayanŋ sam yirnayiŋ yinyiŋ. Munanŋ al kura gwaha ma tiyamiŋ marbe Al Kurunŋyen miyonŋ beleŋ waŋbe mel gote urmiŋ mataliŋya dapnamiŋ mataliŋya goyen tumŋanŋ gasa yirke kamamiŋ. Gega meremiŋ gama iramiŋ marbe miyonŋmiŋ beleŋ yubul tiyamiŋ goke dufay heŋ heŋ ge dula mata teŋ hinhan.

manhan hora kurunđe po damu tike hora go ten al buninjen faran jurwon, ” inamin.

¹⁰ Be, Yesu go mere ten hinhan goyen nurdeb, “Denbe danin bere go tagal unen bulun irhan? Yenbe mata igin wor po nira. ¹¹ Al buninjenbe denya huginjen hinayin. Goyenbe nebe denya huginjen ma hitek. ¹² Bere gare det fimin ulner wok ira gabe ne kammeke mete nirnayin goke gitik nira. ¹³ Ninjenb fudinde wor po dinen hime. Kame al belen ne nin nanja kurun ga tagalde tukun henjabe bere gare mata tiya gake wor tagalde hinayin, irde matamin goke dufay hen hinayin, ” yinyin.

*Yudas Iskariot belen Yesu asogo haniinde kiryin
(Mak 14:10-11; Luk 22:3-6)*

¹⁴ Be, Yesu komatmin 12 bana goyen al denjem Yudas Iskariot inen hanyen gore pris buda gote karkuwanmin hitte kurin. ¹⁵ Kunbe, “Yesu hantiinde kermekeb murungembe dahade nun-nayin?” yinyin. Irkeb silwa hora kapyan heke kun 30 hekeb unamin. ¹⁶ Go kamereb Yudas go Yesu goyen daha mat kura asogom haniinde keren yen belen nin nankenen hinhin.

*Dula funan
(Mak 14:12-21; Luk 22:7-13,21-23; Yon 13:21-30)*

¹⁷ Be, Yesuyen komatmin go hanja wawunbe beret yis minmon nen nen nalu hewen tiya yenbe Yesu gusunan iramin. “Damde kunbe Pasoba binje gitik irde netek yen nurde ha?” inamin. ¹⁸ Irkeb Yesu belen wol henbe, “Yerusalem taun bana kunbe al kura gor kenenbe gaha inayin.

‘Tisa belenbe, “Nalunebe binde hihi. Niñgeb neya komatneyabe gere yare Pasoba binje netek,” yihi,’ gwaha innayiñ,” yinyiñ. ¹⁹ Irkeb komatmiñ yago goyen Yesu yinyiñ go po gama irde kuñbe Pasoba binje nen nen gitik tiyamiñ.

²⁰ Be, wawuñbana wor po hekeb Yesuya komatmiñ 12 goya Pasoba binje niniñ yeñ keperamiñ. ²¹ Binje nene henyaabe Yesu belenbe, “Fudinde wor po dinen hime. Deñ gayen kuratiñ kura belen asogoner haniñde niryen,” yinyiñ. ²² Irkeb komatmiñ yago gobe kandukñen wor po nuramiñ. Irdeb kura kame yuñkuren yuñkuren, “Doyañ Al Kurun, ne niñ wet yeñ ha?” yeñ gusuñañ iramiñ. ²³ Irkeb wol henbe, “Al kura neya tumñañ haniñ teñ fe koron bana kera gore asogo haniñde niryen. ²⁴ Ne Al Urmiñ gabe Al Kurunyen mere basañ mar belen bikken asañde kayamiñ goyen po gama irde kameñ. Goyenbe al kura asogoner haniñde niryen al goke buninñen wor po nurde unen hime. Al go kawan ma hiriñ manhan kanduk bulun goyen go ma kenwon,” yinyiñ. ²⁵ Irkeb Yesu asogomiñ haniñde kertek al Yudas belen, “Tisa, ne niñ daw yeñ ha?” inyiñ. Irkeb wol henbe, “Gwaha, gobe ge po geb,” inyiñ.

*Yesu belen beretya wainya komatmiñ yunyiñ
(Mak 14:22-26; Luk 22:14-20; 1 Korin 11:23-25)*

²⁶ Be, binje nene henyaabe Yesu belen beret tenbe Naniñ turun irdeb ubala tenbe, “Beret dunhem gahade gayen po nebe deñ ge ten kameñ. Niñgeb goke tenbe beret gabe gasonne geb, ten nenañ,” yinyiñ. ²⁷ Irdeb wain fimiñ gisu bana hitiñ go tenbe sopte Al Kurun turun irde, “Deñ

tumɲaŋ ga teŋ nenaŋ. ²⁸ Al megen haŋ kurun gote mata buluŋ halde yunen yunen niŋ teŋ Al Kurun beŋe biŋa tiyyiŋ goke teŋ darine wok irde kameŋ. Niŋgeb wain ga teŋ nenaŋ. ²⁹ Fudinde diŋeŋ hime. Wain fimiŋ gayen tebaŋ ma neweŋ. Kuŋ kuŋ Nanne beŋe alya bereyamiŋ doyaŋ yiryenya goyenter gab denya tumɲaŋ wain fimiŋ gergeŋ sopte netek,” yinyiŋ.

³⁰ Be, go kamereb Yesuya komatmiŋ yagoya goyen tikiŋ heŋbe Olip doŋdoŋde hurkamiŋ.

*Pita helwan hiyyeŋ goke tagalyiŋ
(Mak 14:27-31; Luk 22:31-34; Yon 13:36-38)*

³¹ Be, hurkuŋ gor heŋbe Yesu beŋe gaha yinyiŋ: “Haŋka wawuŋbe ne mununniŋ yeŋ fere nirkeb deŋbe tumɲaŋ nubul teŋ busaharnayiŋ. Mata goke Al Kurunyen asaŋde gahade katiŋ hi:

‘Sipsip doyaŋ al maymeke sipsipmiŋbe burgagaw kernayiŋ,’ yitiŋ. *Sekaraia 13:7*

³² Goyenbe kame sopte huwardebe ne wa meheŋ heŋ Galili naŋare kweŋ,” yinyiŋ. ³³ Irkeb Pita beŋebe, “Al hoyeŋbe tumɲaŋ gubul tinayiŋ. Goyenbe nebe epte ma wor po gubul tiyeŋ,” inyiŋ. ³⁴ Irkeb Yesu beŋe wol heŋbe, “Fudinde wor po giŋeŋ hime. Haŋka wawuŋbe tatirok ma mere tikeyabe ge beŋe wawuŋ karwore ne niŋ yeŋ, ‘Al gobe go ma nurde uneŋ hime,’ yawayiŋ geb,” inyiŋ. ³⁵ Goyenpoga Pita beŋebe, “Nebe al beŋe mununnayiŋ gega, ge niŋ yeŋ, ‘Yeŋ ma nurd unhem,’ ma wor po yeweŋ,” inyiŋ. Irkeb kadom yago manan tumɲaŋ gwaha ala inamiŋ.

*Yesu Getsemani heñ Al Kurun mere iryin
(Mak 14:32-42; Luk 22:39-46)*

³⁶ Be, gor mat kun naja denje Getsemani gor forok yenbe komatmin yago, “Gar keperde doyan nirde hike neb irar ira kun Al Kurun mere ireñ,” yinyin. ³⁷ Irdeb Pitaya Sebedi urmin waran Yonya Yemsa yadeb gasun hoyande kwamin. Goyareb Yesube dufayminya binjabe kanduk wor po hirin. ³⁸ Irdeb mel karwo go yinyin. “Kanduk kurun wor po mununke kamtek nurhem geb, neya gar henbe Al Kurun mere irdeya ga hinayin!” yinyin. ³⁹ Gwaha yinenbe gor mat mun kura singir ten kunbe bin tadam mat wulgurut yenbe, “Ado, igin kenem kanduk kurun gayen ten sin irayin. Goyenbe nere dufay ma gama irayin. Gere dufay po gama irayin,” inyin. ⁴⁰ Gwaha tenbe mulgan hen kunbe komatmin karwo gob firtin yinyin. Irdeb Pita isan henbe, “Mel, denbe neya mun kura hitnen ten Al Kurun mere irde ga ma fernayin?” yinyin. ⁴¹ Irdeb, “Ferde ma Al Kurun mere irde hinayin. Gogab unjura wan tunan durkeb epte ma katnayin. Tontinbe Al Kurun mere ird ird nin wilaknen nurde han. Gega ultinbe pinen hen han,” yinyin. ⁴² Irdeb sopte yubul ten kun Al Kurun mere irdeb, “Ado, kanduk ga ne belen ma tewenbe kanduk gayen pasi irtek belen minmon hiyen kenem nebe dufayge po gama irdeb tewen,” yirin.

⁴³ Be, Al Kurun mere irde pasi henbe sopte mulgan hen kun komatmin karwo gob dilin kanduk hekeb firtinde hike yinyin. ⁴⁴ Yenenbe yubul ten sopte mulgan hen kunbe Al Kurun mere iryin

gwahade po sopte mere iryiņ.

⁴⁵ Be, mulgaņ heņ kuņbe komatmiņ yago goyen, “Denbe usaņ heņ firtiņde po haņ? Ga kennaņ! Ne Al Urmiņ gayen mata buluņ mar haniņde nerd nerd nalu gobe bikkeņ gago forok yihi.

⁴⁶ Huwarke kuņiņ! Asogo haniņde nertek albe bikkeņ gago waya geb,” yinyiņ.

Yesu teņ fere tiyamiņ

(Mak 14:43-50; Luk 22:47-53; Yon 18:3-12)

⁴⁷ Be, Yesu gobe gwaha yeņ hikeyabe komatmiņ kura Yudas gobe al yade wayamiņ. Al buda gobe fulenare niņ bidilaya nukwaya yade wayamiņ. Mel gobe pris buda gote karkuwanmiņya Yuda marte doyaņ mar parguwakya belen yad yerke wayamiņ.

⁴⁸ Yesu go asogom haniņde kertek al goreb tetek mar go gaha yinyiņ: “Kuņ forok yeņbe mata kura tiyeņ geb. Al kura amaņ amaņ irde uluņde u irmeke keneņbe al gobe gog po yeņbe kuņ tenayiņ,” yinyiņ.

⁴⁹ Be, Yudas go bikkeņ mere gwahade yinyiņde geb, kuņ forok yeņ Yesu hitte kuņbe, “Wawuņ, Tisa,” inenbe uluņde u iryiņ.

⁵⁰ Irkeb Yesu belen wol heņbe, “Kadne, gwaha tiye yeņ wayha go gwaha tiya,” inyiņ. Irkeb al wayamiņ mar goreb waņ teņ fere tiyamiņ.

⁵¹ Irkeb Yesu komatmiņ kura yeņ binde hinhin goreb fulenare niņ bidilamiņ marde pris buda gote kuruņmiņde meten almiņ kura kirmiņ sapa iryiņ.

⁵² Irkeb Yesu belen, “Bidilage go gasuņenđe kera! Al kura bidila belen al gasa yiryen gob haniņ wol hekeb gwaha mat po mayke kamyen.

⁵³ Adone gusuņaņ irmekeb goyare po miyoņmiņ budam wor po yad yerke kateņ faran

nurnayiñ gobe ma nurde ha? ⁵⁴ Goyenbe mata gwahade tiyenbe Al Kurunyen asanđe mata gwahade gwahade forok yiyyen yitiñ goyen daha mat forok yiyyen? Epte moñ,” inyiñ.

⁵⁵ Gwaha inenbe Yesu go yen ten fere titek mar goyen, “Ne gayen kawe mar yad kuñ hime geb, gago fulenare niñ bidilaya nukwaya manañ wañ nawarniñ ten hañ? Nebe nanƙahalmiñ nanƙahalmiñ Al Kurunyen ya bana saba tagalde himekeyabe ma nade hanjen. ⁵⁶ Goyenbe Al Kurunyen asanđe mere basañ marmiñ belen kame mata gwahade forok yiyyen yen kayamiñ goyen den belen gago ten hañ,” yinyiñ. Be, komatmiñ yagobe tumñan Yesu tubul ten busaharamiñ.

Yesu pris buda gote kurunmin diliñ mar huwariñ

(Mak 14:53-65; Luk 22:54-55,63-71; Yon 18:13-14,19-24)

⁵⁷ Be, Yesube pris buda gote kurunmin Kaiafas hitte tukamiñ. Gorbe Moseyen saba marya Yuda marte doyañ mar parguwak yagoya gabu iramiñ.

⁵⁸ Be, Pita go mel gore Yesu ten kuñ hikeya gisaw yarham po hen gama irde kuriñ. Kuñ kuñbe pris buda gote kurunmin Kaiafasyen ya koya belen po milgu irtiñ bana goñ al gabu irde hanjen sawsaware hurkuriñ. Hurkuñbe daha kura tike keneñ yen ya go doyañ irde hanjen mar keperde hinhande gor kuñ kipiryiñ.

⁵⁹ Be, pris buda gote karkuwanminya Yuda marte doyañ marya goyen tumñan gabu irde da misiñde wor po Yesu go mayteke kamyen yen mere sege iramiñ. Goyenbe miñ kura ma

kenenbe goke nankenaminj. ⁶⁰ Irkeb al budam wan Yesu tagal unen unen nin usi mere budam yad forok yiraminj. Gega Yesu maytek mereminj iginj kura ma kenaminj. Irkeb kunj kunj funanj al irawa kura wanbe, ⁶¹ “Al gareb, ‘Al Kurunyen ya balem goyen upew urde sopte gergen irde nana fay karwore pasi irenj,’ yeke nurarunj,” yaryum.

⁶² Be, pris buda gote kurunminj Kaiafas belen huwardeb Yesu goyen, “Mere kurun ulger irhar gabe wol ma hawayinj?” inyinj. ⁶³ Goyenbe Yesu go mereminj ma wol hen balminj po hinhin. Irkeb sopte, “Ne belen Al Kurun gwahader hitinj gote sanjinde ginhem geb, gebe Mesaia Al Kurun Urminj ma dahade goyen momonj dira,” inyinj. ⁶⁴ Gwaha inkeb Yesu belen wol henbe, “Dindiken gog po yahanj. Goyenbe ne belenbe den kurun gayen gaha dinenj. Kame ne Al Urminj gabe Al Kurun sanj minyanj Al gote haninj yase belen mat keperde nanjinj gagap hende katenj himeke nennayinj,” yinyinj. ⁶⁵ Irkeb pris buda gote kurunminj gore mere goyen nurdeb, “Al gabe Al Kurun sukal ira,” yen bin ar yeke ulinhorminj erek irdeb, “Ningeb daninj mere hoyanj nin nanjentek? Al Kurun sukal ira gobe den tumnanj nurhanj gago. ⁶⁶ Ningeb denbe dahade nurde hanj?” yinenj gusujanj yiryinj. Irkeb wol henbe, “Kamyen po!” inaminj. ⁶⁷ Irdeb al gor hinhan goreb Yesu kiminde meyanj iraminj. ⁶⁸ Irdeb kiminj mala tenbe haninj mupi irde mayaminj. Kura belenbe palasi irdeb, “Mesaia, ganun belen muguna? Momonj dira!” inaminj.

Pita beley Yesu niŋ helwan hiriŋ
(*Mak 14:66-72; Luk 22:56-62; Yon 18:15-18,25-27*)

⁶⁹ Be, goyarebe Pita go ya go biŋ bana saw-saware gor keperde hinhin. Irkeb meten bere kura gore wanbe, “Ge manan Yesu Galili niŋ al goya kuŋ hinaryum,” inyiŋ. ⁷⁰ Irkeb Pita beleybe al tumnan gor hinhan gote diliŋ mar helwan henbe, “Neb goke kura yeŋ ha yeŋ ma nurde hime,” inyiŋ. ⁷¹ Irdeb gasuŋ hinhin go tubul tenbe kuŋ yamere huwarde hikeb bere kura gore wan kenenbe al buda gor hinhan goyen, “Al gabe Nasaret niŋ al Yesuya kuŋ haryen,” yiriŋ. ⁷² Irkeb Pita gore teban po helwan henbe, “Fudinde wor po, nebe al gobe ma nurde unen hime,” yiriŋ.

⁷³ Be, hitnen muŋ kura tenbe al gor hinhan goreb Pita goyen, “Mere tike melakge nurhet gobe Yesu gama irde hanyen mar al kurabe ge gago yeŋ nurhet,” inamiŋ. ⁷⁴ Irkeb Pita beleybe mere fudinde po tihim yeŋ biŋa tenbe, “Fudinde wor po dineŋ hime. Neb al goke yeŋ haŋ yeŋ ma nurde hime,” yinyiŋ. Irkeb goyare po tatirok mere tiyyiŋ. ⁷⁵ Irkeb Pita go Yesu beley, “Tatirok ma mere tikeyabe ne niŋ yeŋ wawuŋ karwore, ‘Al gob ma nurde unen hime,’ yawayiŋ,” inyiŋ goke biŋ bak yiriŋ. Irkeb sinare katen kuŋ mata tiyyiŋ goke biŋde misiŋ wor po nurdeb esiriŋ.

27

Yesu go Pailat hitte ten kwamiŋ
(*Mak 15:1; Luk 23:1-2; Yon 18:28-32*)

¹ Be, wampot muñ wor pobe pris buda gote karkuwanmiñya Yuda marte doyañ mar par-guwakya beleş mere maydeb, “Yesube mayteke kamyen,” yamiñ. ² Irdeb haniñ fere tenbe Pailat hitte tukamiñ. Pailatbe Roma gabman al Yudia naña doyañ irde hiyen.

*Yudas kamyin
(Aposel 1:18-19)*

³ Be, asogo haniñde kiryiñ al Yudasbe Yesu go merem yañ irde mayke kamtek heke keneñbe mata buluñ tiyyiñ goke bunineñ nuryiñ. Irdeb silwa hora 30 damu iramiñ goyen pris buda gote karkuwanmiñya Yuda marte doyañ mar par-guwakya hitte yumulgañ tiyyiñ. ⁴ “Mata buluñ miñmoñ al goyen kami yeñ hantiñde kirmiñ. Niñgeb mata buluñ timiñ,” yinyiñ. Irkeb wol henbe, “Gobe nende samuñ moñ be. Gere kanduk geb,” inamiñ. ⁵ Gwaha inkeb biñ ar yekeb hora go Al Kurunyen ya balem bana goñ yemeyde kuriñ. Kuñbe beñe ten kamyiñ.

⁶ Be, hora yimiyyiñ gobe pris buda gote karkuwanmiñ beleş pilgañ henbe, “Hora gabe al kami yeñ damu titiñ. Moseyen sabarebe hora gahade gayen epte ma Al Kuruñ niñ unnayiñ yitiñ. ⁷ Niñgeb hora ga yade naña hoyande niñ mar Yerusalem wañ kamke mete ten hitek yeñ kuwe ird ird alyen megen goyen damu titek,” yeñ mere sege iramiñ. ⁸ Goke tenbe naña tapum gobe “Al Kamtiñde” inamiñ. Gayenter wor gwahade po inen hañ. ⁹ Niñgeb Al Kurunyen mere basañ al Yeremaia beleş mere kayyiñ gobe gwaha mat igineñ kawan hiriñ. Merebe gahade:

“Israel marbe yeŋ mayteke kami yeŋbe silwa hora 30 gore al damu tiyamiŋ.

- ¹⁰ Irde Doyaŋ Al Kuruŋ beleŋ gwaha gwaha tiyayiŋ ninyiŋ gwahade po,
mel gobe hora go teŋbe kuwe ird ird alyen megeŋ damu tiyamiŋ,” yitiŋ hi. *Sekaraia 11:12-13; Yeremaia 32:6-9*

Gebe Yuda marte doyaŋ al kuruŋ we?

(Mak 15:2-5; Luk 23:3-5; Yon 18:33-38)

¹¹ Be, mel go goŋ gwaha teŋ hikeyabe Yesu gobe Roma gabman al Yudia naŋa doyaŋ irde hiyen al Pailat diliŋ mar huwaryiŋ. Irkeb, “Ge gayenbe Yuda marte doyaŋ al kuruŋ we?” inyiŋ. Irkeb, “Gwaha, gigeŋ yaha gog po,” inyiŋ.

¹² Be, pris buda gote karkuwaŋmiŋya Yuda marte doyaŋ mar parguwakya beleŋ tagal unamiŋ. Gega Yesube meremiŋ wol ma hiriŋ.

¹³ Irkeb Pailat beleŋ, “Mel gare miŋge girde tagal guney haŋ gabe kura ma wol hawayiŋ?” inyiŋ.

¹⁴ Goyenpoga Yesu beleŋ mel gote mere go muŋ kura ma po wol hiriŋ. Irkeb Pailat beleŋ go keneŋbe diliŋ fot yiriŋ.

Pailat beleŋ Yesu tubul timeke kwi yiriŋ

(Mak 15:6-15; Luk 23:13-25; Yon 18:39-19:16)

¹⁵ Be, goyenterbe damam damam Pasoba dula nalurebe Pailat beleŋ koyare hinhan mar goyen al kura teŋ siŋa irde hiyen. Al gobe Yuda mar beleŋ al gwahade inke gab gwaha teŋ hiyen.

¹⁶ Be, goyenterbe al buluŋ wor po yeŋ nurd uney hanyen al Barabas goyen koyare hinhin.

¹⁷⁻¹⁸ Be, Pailatbe yiŋgeŋ dufaymiŋdeb, ‘Yuda marte doyaŋ mar gabe al budam Yesu gayen

gama irde hike yenenbe daniñ neñ gwahade moñ yeñ nurdeb yeñ ge iğin ma nurde mayke kami yeñ gago tawayhan,' yeñ nuryin. Niñgeb al buda kurun goyen gabu irkeb, "Al damin tubul timeke kuyen? Barabas ma Mesaia inen han Yesu gayen?" yeñ gusunan yiryin.

¹⁹ Be, Pailat go mere nurd nurd gasunde keperde hikeyabe berem belen mere gahade asande kan ten kerke wayyin: "Al go daha wet kura ire ire ma tiyayin. Yenbe merem moñ. Han ka mite tihim. Niñgeb bener ga yeñ ge kanduknen wor po nurde hime. Tubul po tiyayin," inyin. ²⁰ Goyenbe pris buda gote karkuwanminya Yuda marte doyan mar par-guwakya belen al buda kurun gabu iramin goyen hakot bin yawaramin. Irde, "Barabas tubul tike kwi. Munan Yesube mayke kami,' innayin," yinamin.

²¹ Be, Pailat belen al buda go, "Al irawa gayen ganunbe tubul timeke kuyen?" yinen gusunan yiryin. Irkeb, "Barabas," yamin. ²² Irkeb wol henbe, "Niñgeb Mesaia inen han al gab daha iren?" yinyin. Irkeb al buda kurun goreb, "Kuruse hende mayke kami!" yamin. ²³ Irkeb Pailat belen, "Daniñ? Al gabe da mata bulun kura tiyun?" yinyin. Gega ugun po, "Kuruse hende mayke kami ko!" yamin.

²⁴ Be, Pailat go gwaha kura titek ma hirin. Irde al buda kurun go fulen forok irnin tike yenenbe fe ten mel gote dilin mar hanin halyin. Irdeb, "Al ga kamen tiya gabe neya neya moñ. Gabe dende samun po geb," yinyin. ²⁵ Irkeb, "Igin,

yeŋ kamyen gote merembe nenya dirininiŋ yago kame forok yenayin gore tetek,” inamin. ²⁶ Irkeb Barabas go mel gote mere nurdeb tubul tike kurin. Goyenbe Yesu go usulak teŋ kuruse hende maynaŋ yeŋbe fulenja marmin haninde tubul tiyyin.

*Fulenja mar belej Yesu giwgiw iramin
(Mak 15:16-20; Yon 19:2-3)*

²⁷ Be, Roma gabmanyen fulenja mar go Yesu teŋ Pailatyen ya kurun bana goŋ tukamin. Irdeb fulenja mar kadom goya tumŋaŋ Yesu milgu iramin. ²⁸ Irdeb ulinhormin tumŋaŋ yugu teŋ gab doyaŋ marte ulinhor bukken yara goyen kerd unamin. ²⁹ Irdeb kaŋ hirwanen yaŋ goyen bili bili irde doyaŋ al kurunyen tonan umŋa irhet usi teŋ tonande keramin. Irde doyaŋ alyen kutum kura teŋ hanin yase belej kerde fulenja mar gore Yesu dilinde waŋ dokolhon yugulun teŋbe, “Fudinde wor po, Yuda marte doyaŋ al kurun,” inen giwgiw irdeb bak mayde iramin. ³⁰ Irde meyan irde kutum tanarde hihin goyen po goran irde tonande mayde teban irde hihan. ³¹ Gwaha irde giwgiw irdeb ulinhor bukken yara go tugu teŋbe yende ulinhor wor po goyen yerde unamin. Irdeb tukun kuruse hende maytek yeŋ teŋ kwamin.

*Kuruse hende mayke kamyin
(Mak 15:21-32; Luk 23:26-43; Yon 19:17-27)*

³² Be, beleyen hako kun henyaŋbe al kura Sairini taunde nin al denem Saimon kenenbe Yesuyen kuruse tawa inen pakku irke tirin. ³³ Be, kun kun naŋa deŋe kura Golgota gor forok yamin. Golgota gote minbe “al tonan kininiŋde”.

³⁴ Gorbe wainya he fimiñ urekya suluk irtin goyen unke ninam uryin gega, nen nen nin bada hirin. ³⁵ Yesu go kuruse hende kerde hikeb ulin umñamin ganun beñ yawaryen yen yende matare tilin tanardeb pota yiramin. ³⁶ Gwaha tenbe daha kura tike kenteñ yen keperde kenen hinhan. ³⁷ Irde da misiñde Yesu mayamin goyen he parwek hende katin goyen kuruse tonan beñ keramin. Merebe gahade:

AL GABE YESU. YUDA MARTE DOYAN AL KURUN

³⁸ Be, kawé al irawa kura goyen wor kuruse hende yeramin. Kurabe Yesuyen kuruse yase beñ mat, munan kurabe tapa beñ mat keramin. ³⁹ Al kun wan ten kenenbe birun birun ten giwgiw irdeb, ⁴⁰ “Ge gayen Al Kurunyen ya balem upew urde sopte gergen irde nanã fay karworeb pasi ireñ yawan al gobe ge gago? Irde geb Al Kurun Urmin kenenbe tareñger kuruse hende mat kata,” inamin. ⁴¹ Irde pris buda gote karkuwanminya Moseyen saba marya Yuda marte doyan mar parguwakya beñ wor gwahade po inen ayan keramin. ⁴² “Al gabe al hoyanbe faran yurde hinhin gega, yingenbe epte ma faran uryen. Yenbe Israel marte doyan al kurun go. Kuruse hende mat katke kenen gabe dufayninin yen ge sanin irnin be! ⁴³ Yenbe Al Kurun nin hekenñ nurde hiyen, irde ‘Neb Al Kurun Urmin,’ yen hiyen geb, tubul tike Al Kurun beñ faran ureñbe faran uri,” inamin. ⁴⁴ Irkeb kawé al irawa kuruse hende hinaryum go wor gwahade po sukal iraryum.

*Yesu kamyin**(Mak 15:33-41; Luk 23:44-49; Yon 19:28-30)*

⁴⁵ Be, nana banƙahal wor po hekeyabe nana bana kurun gob tumnan kidoma beley aw urtinde hike kun kunbe wawunbana 3 kilok hewen tiyyin. ⁴⁶ Be, 3 kilok binde hekeb Yesu go ug po, “Eloi, Eloi, lama sabaktani!” yirin. Mere gote minbe, “Al Kurunne, Al Kurunne, daniy nubil taha!”

⁴⁷ Be, mere go al kura gor huwarde hinhan gore nurdeb, “Elaia deney urde hi,” yamin. ⁴⁸ Irdeb arany po al kura kup yey kun amil erek irde wain finin mukkuwen bana gon kerke ulin hekeb ten kutum uyande giti irdeb Yesu unyin. ⁴⁹ Goyenbe al hoyan goreb, “Elaia wet wany farany urke kentek geb, tubul tike gwaha kura tiya yey kinnin,” yamin.

⁵⁰ Be, sopte po Yesu go ugun po mere tenbe bin sul yirin. ⁵¹ Goya goyenbe Al Kurunen ya balem bana amil gasun himam wor po diba irtin hinhan goyen kahalte po hem beley mat erek yey bam beley katyin. Megey manan diririt yey hora karkuwan karkuwanbe gilgalan iramin. ⁵² Al hakwam yirtin bamba goyen hol yey tukamin. Irkeb Al Kurun dilinde al wukken hey kamamin goyen budam sopte huwamin. ⁵³ Irde bamba sinare katenbe kame Yesu sopte huwaryin nalureb Yerusalem taun kurunde kun al budam hitte forok yeke yemin.

⁵⁴ Be, Roma gabmanyen fulenya marte doyan alya fulenya marminya Yesu doyan irde hinhan goyen nininaya mata gor forok yirin kurun go

kenej kafura henbe, “Fudinde wor po, yenbe Al Kurunj Urminj,” yaminj.

⁵⁵ Bere budam Galili nanjare mat Yesu gama irde faranj urde kunj hanjen goyen wor gor henj gisaw mat kenej hinhan. ⁵⁶ Bere goyen kurabe Makdala ninj Maria, Yemsya Yosepyat milinj Maria, irde Sebedi urminj waranj Yemsya Yonyat milinj.

Yesu mete tiyaminj

(Mak 15:42-47; Luk 23:50-55; Yon 19:38-42)

⁵⁷ Be, Yesu kamyinj goyen kunj wawunjbana wor po hewenj tikeb Arimatea taunde ninj al samunminj budam kura goyen wayyinj. Denjembe Yosep. Yenj wor Yesu gama irde hiyen. ⁵⁸ Be, al gore kunjbe, “Yesu hakwam nunke mete tiye,” inenj Pailat gusunjanj iryinj. Irkeb Pailat belenj, “Iginj, gwaha tiyayinj,” inyinj. ⁵⁹ Irkeb Yosep belenj Yesu hakwam goyen tenj amil faykek gergenj belenj po mala tenj ⁶⁰ tukunbe yinjenj, “Kammeke nernayinj,” yirinj bema goyen bana kiryinj. Irde hora kurunj milinj kura goyen yenya kwaminj marya gore gilongilonj irde tukunj bema gote yamem pet tenjbe kwaminj. ⁶¹ Irkeb bere iraw kura horabok gote dilinj mar sinja hoyanj belenj mat hinaryum. Makdala ninj Mariayabe Maria hoyanj kura goya belenj gwaha tiyaryum.

Bemba doyanj irde hinhan mar

⁶² Be, Sabat nalu fay urkeb pris buda gote karkuwanminjya Farisi marya belenj Pailat hitte kwaminj. ⁶³ Kunjbe, “Doyanj al, usi al gar go hinhinyabe, ‘Kamenjde mat kunj yerenkek hekeb huwarenj,’ yenj hinhin goyen binininj bak yekeb

gago wayhet. ⁶⁴ Niñgeb fulenḡa marge hulyan yirke hanḡa mat kuñ molye bana goyen bamba go doyan irde hinayin. Moñgo komatmin yago beley wañ hakwam goyen hoyanḡe tukunbe, 'Kamtiñde mat huwarun,' yenayin geb. Irkeb al budam usi mere go nurde dufaymin bulun henayin. Gote kandukbe hanḡapya, 'Nebe Mesaia,' yineñ al usi yirde hinhin gote kanduk fole iryen," inamin. ⁶⁵ Irkeb Pailat beley, "Fulenḡa marne kura yukun den nurhan gwahade po kenkela yinke bamba go doyan irde hinayin," yinyin. ⁶⁶ Irkeb mel go kuñ bamba yamere nin hora kurun goyen al kura beley ma fegelnayin yen bisam irde go hende diba iramin. Irdeb fulenḡa mar goyen, "Gar hen kenkela doyan irde hinan ko!" yinamin.

28

*Yesu kamyinḡe mat huwaryin
(Mak 16:1-10; Luk 24:1-12; Yon 20:1-10)*

¹ Be, Sabat nalu hubu hen kuñ wawun hen fay ureñ tiyyin. Irkeb Makdala nin Mariaya Maria hoyan kura goya gore Yesu hakwam keramin gasun goyen kenye yen kwaryum.

² Be, bembare gorbe niniḡa kurun forok yirin. Gobe Doyan Al Kurun hitte mat miyonmin kura katen bamba gote yame hora kurun go kan kan irde hol irde go hende keperde hinhin geb, gogo tiyyin. ³ Yenbe uliḡya dinsokyabe dagamel go gwahade epte ma kenkela kentek hinhin. Uliñhormin manan faykek wor po.

⁴ Be, fulenja mar gor hinhan gobe miyon go kenenbe kafura wor po hej barbar yej kamtin hakwam yara haminj.

⁵ Be, miyon gore bere irawa go yenenbe, “Kafura hej ma. Yesu kuruse hende mayke kamun al goke nankenen har yej nurde hime. ⁶ Gega yenje gar ma hi. Huwarenj yej hinhin go gwahade po huwara. Iginge wan hakwam keranj gasun ga kinyi. ⁷ Irde aranj kuj komatminj yago goyen, ‘Yesube kamunde mat huwara geb, yej wa mehen hej Galili nanjare kwenj tiya. Gonj gab kuj kennayinj,’ yiniryen. Mere gayen momonj dire yej gago wayhem geb,” yinyinj.

⁸ Be, bere iraw gob kafura haryum. Goyenbe mere go nurdeb amanj haryum. Irdeb bamba go aranj po tubul tenj Yesuyen komatminj yago momonj yirye yej kup yej kwaryum. ⁹ Be, bere go mata gwahade forok yewenj tiya yej ma nurde kuj hikeya Yesu belenj forok yenje, “Wampot,” yinyinj. Irkeb irem gobe kenenj bebak tenje kuj kahanje tanarde dolonj iraryum. ¹⁰ Irkeb, “Kafura hej ma. Kuj dine yago yinke Galili nanjare kuj gab nennayinj,” yinyinj.

Fulenja mar belenj usi tenj hinhan

¹¹ Be, bere irawa go hako ga mulganj hej hikeyabe fulenja mar bamba doyanj irde hinhan mar goyen kura belenj taunde kujbe mata forok yeke yenamij kurunj goyen pris buda gote karkuwaminj momonj yiraminj. ¹² Irkeb Yuda marte doyanj mar parguwak hitte kuj momonj yirdeb mere kura sege iraminj. Irdeb fulenja mar go hora kurunj yunenbe gaha yinaminj. ¹³ “Sinjare

kuṅbe mere gahade al momoṅ yirde tukunṅ hi-nayiṅ: ‘Neṅbe wawunṅ ferde ug hetekeya komatmiṅ yago beṅeṅ waṅ hakwam goyen kawem teṅ kwanṅ,’ gwaha yeṅ hinayiṅ. ¹⁴ Munanṅ mere momoṅ gayen kuṅ doyaṅ altiṅ Pailat hitte forok yekeb neṅ beṅeṅ kuṅ keneṅbe igiṅ mat mere irtek geb, deṅbe merem yaṅ ma diryeṅ,” yinamiṅ. ¹⁵ Gwaha yinkeb fulenṅa mar gobe horamiṅ go yadeb mel gore yinamiṅ gwahade po tiyamiṅ. Niṅgeb goyen mere gobe tagalkeb waṅ waṅ gayenter niṅ Yuda mar wor tagalde haṅ.

Komatmiṅ metenṅ kurunṅ yunyiṅ

(Mak 16:14-18; Luk 24:36-49; Yon 20:19-23; Aposel 1:6-8)

¹⁶ Be, Yesu yiriṅ gwahade po komatmiṅ 11 go Galili naṅa bana goṅ niṅ dugu kura gor kunayiṅ yinyiṅde gor kwamiṅ. ¹⁷ Kuṅ keneṅbe dolonṅ irde turunṅ iramiṅ. Munanṅ kurabe dufay kura kura hamiṅ. ¹⁸ Irkeb Yesu go bindere waṅbe, “Naṅkiṅya meṅeṅya kurunṅ gayen doyaṅ yird yird tareṅbe ne nuntiṅ hi. ¹⁹ Niṅgeb deṅ beṅeṅ kuṅ al meṅeṅ hike kwa kurunṅ gayen merene basanṅ heṅ tagalde tukunayiṅ. Irde merene nurnayiṅ marbe Al Kurunṅa Urmiṅyabe Holi Spiritiyat deṅemde baptais yirde komatne yirde hinayiṅ. ²⁰ Irde mata gwaha gwaha teṅ hinayiṅ diniṅ hinhem kurunṅ goyen mel go wor gama yirnanṅ yeṅ saba yirde hinayiṅ. Fudinde wor po, nebe dubul ma wor po tiyeṅ. Deṅya tumṅaṅ hiteke kuṅ kuṅ nalu funanṅ forok yiyyeṅ,” yinyiṅ.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 3 Mar 2023 from source files dated 9 Oct 2020

dbba218f-41f3-5f08-b0b6-2a7c919093ab